

CIMELIA

0


1340

Nabyto ze pośrednictwem Biblios-
teki fund. W. Baranowskiego we Lwowie
i oprawiono w r. 1937.



1340

CIMELIA



Cim. O. 1340

LECTIONES
SACRÆ

FAUSTI SOCINI SENENSIS,

*Quibus auctoritas Sacrarum literarum
præsertim Novi Fæderis asseritur.*

Opus imperfectum.



RACOVIAE,
Typis Sebastiani Sternacii,

Anno 1618.

comp. 1 flor. 15 gr

Lectōri Christiano.

QUEM AD MODUM iis mos est, qui veterum monumenta conquirunt, ut etiam minima fragmenta edant, utilitatis aliorum dumtaxat ratione habita: ita nos etiam, Christiane lector, in edendis Fausti Socini scriptoris nobilissimi monumentis, faciendum nobis putavimus. Editis ejusdem operibus perfectis, etiam imperfectis quibusdam, nunc nonnulla illius fragmenta apud varios conquisita, licet quædã nec ab eo scripta sint, sed dictata tantum, nec postmodum recognita, e quorum numero hæc quoque sunt Lektionen Sacræ, in lucem damus, ut tuis commodis, quoad ejus fieri potest, consulamus. Nihil dubitamus, quin eam nostram operam, Christiane lector, sis approbaturus. quippe quæ tota utilitati tuæ, et promovendæ divinæ veritati, & amplificandæ Dei & Christi gloriæ impendatur. Dominus Iesus cum nostris conatibus, tum tuis successibus, Christiane lector, clementer annuere velit. Vale.

LECTIONES SACRÆ

FAUSTI SOCINI SENENSIS;

*Quibus auctoritas sacrarum litterarum,
præsertim Novi Fœderis,
asseritur.*

RERVUM divinarum scientia, earumq; in-
vestigatio, præsertim quod attinet ad ea,
quæ quæ ex Dei voluntate, vel facere vel
credere debeat, & consequenter Christianæ religio-
nis cognitio & indagatio, cujus rei causa hic conve-
nimus, duo habet præstantissima, propter quæ omni-
bus aliis scientiis, & earum indagationibus longissi-
mè anteferri debeat. Vna est, quod ejus Subjectum
& finis, nobilissimum omnium Subjectorum, & fini-
um est. Subjectum enim est Deus ipse, ejusq; volun-
tas; Finis verò, officium nostrum erga ipsum Deum,
ejusq; gloriæ amplificatio, & nostra æterna salus at-
que beatitas. Quorum prius, hoc est Subjectum, quod
ipse Deus est, quin omnia quæ mente concipi possint,
longissimo atque infinito intervallo superet, nemo est
qui dubitare ausit. Alterum verò, quod finem esse
diximus, officium nostrum erga ipsum Deum, & æ-
terna nostra felicitas, quin omnia hujus generis ex-
cellat, quæ vel cogitari quidem possunt, stultum est
ambigere. Altera res quam diximus, propter quam
hæc cognitio & investigatio divinarum rerum o-
mnibus aliis longissimè sit anteponenda, hæc est, quod
reliquæ alia cognitiones & investigationes, omissis
ipsc

ipsis mathematicis, que proprie scientie non sunt,
 sed artes potius, ut etiam vulgò appellantur, nulla
 habent propria principia, quibus penitus innitantur,
 & ex quibus facile, aut etiam cum aliqua difficul-
 tate, possit ad eas perdiscendas, & digne tractandas
 perveniri, aut si aliqua tamen principia habent, ea
 sunt adeò pauca, ut vix umquam ad ea disputando
 perveniatur. At cognitio & investigatio sacrarum
 rerum, fundamenta sua habet & principia multa,
 eaq; clara, aperta, unde eam facile assequi, & con-
 venienter in ea nos gerere valeamus. Immo, ut ple-
 rusque, & meritò quidem, placet, totam habemus
 expressam atque expositam, quatenus quidem ad
 eum pertinet finem, quem diximus ejus esse, & de
 quo acturi & disputaturi sumus; quandoquidem
 monumenta habemus scripta, que nobis Deus mira-
 bili & benignissimo consilio dedit & conservavit,
divinorum virorum, qui vel ab ipso divino spiritu
impulsi, eoque dictante, vel spiritu sancto pleni illa li-
teris commiserunt; hi sunt libri, quos Biblia, seu ve-
teris & novum testamentum vulgò appellamus. Inter
 quos, inter libros inquam veteris & novi testamen-
 ti, que differentia sit, & quatenus tam ii, quam illi
 nobis usui esse debeant, postea videbimus. Nunc in
 presentia ita statuimus, cognitionem divinarum
 rerum ad usum nostrum pertinentium, precipue
 verò Christiane religionis, quam & amplexi su-
 mus, & sanctissimam esse non dubitamus, & de qua
 ut agamus constitutum inter nos est, hisce libris omni-
 no contineri. Quare nobis, quidquid dicturi, quic-
 quid

quid conclusuri sumus, quod huc pertineat, inde omnino petendum erit.

Verum, quia dubitare quis posset, Cur libri isti tales sint, quales nos illos esse dicimus, & ambigere, an verum sit, quod illis ab iis, qui Christianauam religionem sunt amplexi, plena fides adhiberi debeat, propterea visum est ante omnia hoc ipsum probandum sumere, eo, videlicet, concesso, quod Christiana religio vera sit, libri istis fidem omnino esse adhibendam.

Primum igitur eas causas proponemus, propter quas fieri merito possit, ut quis libro alicui fidem non habeat. Nam si ostenderimus, nullam ex ejusmodi causis locum habere in libris istis, modò quis Christianam religionem veram esse statuatur, satis videbitur demonstratum, nullam causam esse cur quisquam nostrum illis fidem adhibere non debeat. De qua materia tractatum est a nobis in libello nostro de auctoritate Sacrae Scripturae. Hic tamen magna ex parte quae ibi diximus repetemus, prout necessarium esse judicabimus, etiam interim non pauca addemus, quae ibi vel omissa sunt, vel non erat cur dici deberent: cum mihi eo in loco ostendendum non sumpsissem auctoritatem istorum librorum, minime ab Ecclesiae auctoritate pendere, quod hic, Deo dante, ostensui sumus. quamquam vel ex eo ipso quod aliae causae exponentur, propter quas censendum sit libros istos veraces esse, satis constare, poterit illorum auctoritatem Ecclesiae auctoritati minime inniti.

Quatuor omnino videntur esse causae, propter

quas alicui libro fides haberi non debeat. Prima est, Si constet ejus libri scriptorem, non esse ejusmodi, qui vel noverit, vel ut ipse noverat, tradere voluerit ea de quibus in eo libro scripsit. Altera causa est, si planè nesciatur, quis sit libri auctor; unde fiat, ut nemo videre possit, cur scriptori isti credendum sit. Tertia causa est, si appareat, aut justa suspicio sit, librum, postquam scriptus fuit, fuisse corruptum ac depravatum. Quartam & ultimam causam faciemus, si testimonia aliqua fide digna adsint, non deberi libro isti fidem adhiberi.

Quod attinet ad primam causam, ea duas partes habet; Nam scriptor propterea minimè dignus fide apparet, quòd scitur qui fuerit, & inde constat eum non fuisse ejusmodi, qui ea quæ scripsit vel ipse noverit, vel ut noverat scribere voluerit. Altera pars hujus causæ est, quòd ex ipso libro propter repugnantias manifestas, ineptias, aut aliquid tale appareat fieri non posse, ut ejus scriptor vera scripserit.

Videamus igitur primùm, an scriptores istorum librorum ejusmodi fuerint, quibus non sit credendum. Et quia, ut utrique libri, tam veteris quàm Novi Testamenti, recipiantur, satis est si Novi Testamenti libri recepti fuerint, ob eam causam, quòd in ipsis manifestè Veteris Testamenti librorum auctoritas confirmatur, satis etiam erit de scriptoribus Novi Testamenti inquirere.

Iam Novi Testamenti libri in quatuor partes dividipossunt: nam vel sunt narrationes eorum, quæ Christus fecit, aut dixit, quæve illi quoquo modo ac-

side-

viderunt; vel narrationes sunt eorum, quæ ejus Apostoli ex parte fecerunt dixeruntve, quæve illi contigerunt, postquam Christus Iesus è conspectu ipsorum in cælum receptus est; vel epistolæ sunt Apostolorum quorundam ipsius Christi; vel historica narratio cujusdam visionis, quæ uni ex ipsius Christi discipulis contigit.

De primâ parte, quæ vulgò Evangelia appellantur, nihil videtur esse dubitandum, quin illorum scriptores veridici fuerint; si, quinam ipsi fuerint, consideretur. Nam ex quatuor, duo, id est Mattheus & Iohannes, fuerunt ex intimis ipsius Christi discipulis, qui etiam ejus Apostoli hoc est legati per universum mundum fuerunt. Hi enim, in quæ scribunt ferè omnibus, ut adfuerint necesse est, & consequenter veritatem eorum noverint, quæ scripserunt. Nam quòd ita scripserint, ut ipsi rem esse noverant; prorsus est statuendum. Christiana enim disciplina hoc potissimum fert, ut nemo prudens, sciens, aliis mentiatur. Quod si ex religione ista faciendum omnino id est in hujus vitæ actionibus, multò magis sentiendum est id debere fieri, cum de rebus divinis agitur. ubi mentiri scelus est planè inexpiabile, si quis, inquam, prudens sciensq; mentiatur. Reliqui duo qui Evangelia scripserunt, etiamsi ipsius Christi Apostoli non fuerint: fuerunt tamen intimi & familiares discipulorum & Apostolorum ejus; Marcus quidem Petri, Lucas vero Pauli; ut partim ex ipsa historia Actorum Apostolicorum apparet, partim ex aliis non paucis historicis, qui postea extiterunt. Quare in istis duobus etiam (quamvis non o-

minò tanta quanta in aliis duobus) apparet, propter
ea que diximus, caussa, ob quam, iis que scripserunt,
fides adhiberi debeat. Et de Marco quidem traditur,
ipsum Evangelium suum scripsisse ex iis que à Pe-
tro audiverat, aded ut Petrus ei quodammodo histo-
riam istam dictaverit. Lucas verò tam arcta consue-
tudine cum Paulo junctus fuit, de quo (utpote Chri-
sti singularissimo Apostolo, & propterea rerum ad
Christum pertinentium scientissimo) maximam fe-
rè partem eorum que scripsit, rescire tam certò po-
tuit, ac si ipse presens adfuisset: ut vel ob hoc solum
nullum dubium videatur relinqui, quin vera scripse-
rit. præsertim, cum ipsemet Lucas testetur, se veri-
tatem eorum que scripsit edocum fuisse ab iis, qui il-
la ipsi & viderant, & certâ scientiâ cognoverant.

Vidimus de prima parte, quam fecimus scripto-
rum N. Testamenti, eorum auctores eiusmodi esse,
qui, si religio Christiana vera esse concedatur, non
modò veritatem noverint eorum, que scripserunt, sed
etiam eam scribere voluerint, & porrò scripserint.
Nunc ad secundam partem veniemus, quam dixi-
mus contineri historiâ quorundam Actorum Aposto-
licorum post Christi in cælum ascensum. Hic liber
unus tantum est, usq; ab eodem Luca scriptus, qui &
Evangelium scripsit, ut ex initio utriusque operis
satis constat. Iam vero si meritò, ut arbitramur, con-
clusum à nobis est, à scriptore isto verè scripta fuisse,
ac fideliter, que in Evangelio scripsit: multo magis
statuendum est, ac concludendum, illum verè ac fi-
deliter scripsisse, qua de actis istis Apostolicis literis

mandavit. Quandoquidem non modò ea ab iis audi-
vit, qui presentes fuerunt, vel alia ratione ea certif-
simè noverant, quemadmodum in iis contigit, quæ in
Evangelio scripsit, sed ipsemet istis magna ex parte
interfuit, ut pote qui Pauli Apostoli comes fuit, de
quo bona pars scribitur libri istius, deq; ipsius actio-
nibus. Qua propter nihil videtur addendum, ad id
confirmandum, quod querimus, tantùm monendi
sumus, verisimillimum esse, ut Lucas aliis etiam quæ
Paulo non acciderunt, & in libro isto narrantur, in-
terfuerit, quippe qui inter illos quorum actiones ibi
scribuntur, vixerit, sine dubio, & commoratus fuerit.

Sed iam ad tertiam partem Novi Testamenti
scriptorum accedamus, quæ, ut diximus, epistolis cõ-
tinetur, ab ipsius Christi Apostoli scriptis; quorum
unus in hac re potissimum precipuus propter maxi-
mam partem istarum epistolarum, quæ illius sunt,
Paulus est. De quo nihil dubitari potest, quin fide-
liter ac verè scripserit, quæcunque scripsit; sive ea ad
doctrinam (quæ maximâ ex parte sunt plenæ epi-
stole istæ) sive ad historiam, sive etiam ad vaticina-
tiones, quæ aliquâ ex parte in iis traduntur, pertine-
at. Tantus enim Apostolus & tam singulariter à
Christo ad id muneris electus Paulus fuit, ut nullâ
ratione dubitari possit, quin ea quæ scripsit, sic esse
rectè noverit, & verax omnino in sua scriptione u-
niversa esse voluerit. De Iacobo porro cuius una est
istarum epistolarum, cum & is ipsius Iesu Christi A-
postolus fuerit, nefas est dubitare, eum vel nescivisse
ea quæ scripsit, vel noluisse, ut sciebat, ea scribere.

Idem concludendum est de Petro, de Iohanne, & de Iuda, quorum reliquæ sunt epistolæ, quippe qui & ipsi Christi Apostoli fuerint. In quo illud potissimum notandum est, eo posito quod Christi religio vera sit, (quemadmodum in præsentè disputatione concessio ponitur) ab omni verisimilitudine prorsus abesse, ut Apostoli isti, quod ad doctrinam attinet, quæ in ipsorum epistolis continetur, de qua potissimum agendum nobis est, voluerint aliter eam tradere ac verè se habet, & viam salutis æternæ consequendæ aliis quodammodo inviderint. Nam quod ipsi eam rectè tenuerint, nimis apertum est. Quid autem utilitatis, aut commodi, voluptativè potuissent illi sentire in lectoribus decipiendû, & aliter doctrinâ Christianâ illis proponendâ, quàm veritas ipsa ferat? Nul- lum igitur dubium esse potest, quin ea doctrina quam suis epistolis tradiderunt, verissima sit. Quia verò inter istas epistolas omnes horum Christi Apostolorum, quedam pauca sunt de quibus dubitatur, vel potius olim dubitatum est, an ab istis Apostolis, quibus tribuuntur, reverà scriptæ fuerint: aliquid hac de re in secunda caussa examinanda, propter quam libro alicui fides non adhiberi merisò queat, explicandum reservamus; ut pote loco suo.

Nunc ad reliquam quartam partem scriptorum Novi Testamenti veniamus, quæ, ut diximus, aliud nihil est, quàm mirabilis quedam visio, obscuris vaticinationibus plena, quæ illius scriptori contigit. Scriptior porrò traditur esse Iohannes Apostolus Christi, idem qui & Evangelium scripsit, quod si verum est, nul-

est nulla relinquitur dubitandi causa, quin, & verissimè & fidelissimè, visionem istam literis mandarit, quandoquidem, quòd ipsimet ea contigerit, docet nos illum ejus optimè scientem fuisse. Quòd verò Apostolus Christi fuerit, id aperte testatur eum prudentem, scientem, mentitum non fuisse: praesertim cum non modo Christi Apostolus, sed illi summè ac precipuè dilectus fuerit. Verùm quia non desuerunt olim, nec desunt hodie qui dubitent, an dilectus ille Christi Apostolus fuerit istius scripti auctor; opera precium fuerit, in secunda causa, de qua modo dicebamus, explicanda, aliquid etiam hac de re diligentius explicare. Ad quam secundam causam antequam aggredimur objectioni occurrendum est, quae iis omnibus fieri posset, quae hactenus in prima causa tractanda diximus. Dicet enim aliquis, Fateor ego quidem verissimum esse de authoritate, tum propter scientiam, tum propter fidelitatem ipsorum dubitari non posse, eorum, qui scripta N. Testamenti nobis reliquerunt, si modo illi ii essent, qui dicuntur, & quos tu esse affirmas. Sed quis est, qui me certum facias rem ita se habere, id est, & eos homines illos fuisse, qui esse dicuntur, & tales homines, quales fuisse passim creduntur? Respondemus, objectionem istam non habere in hac prima causa tractanda locum, praesertim in priore in qua adhuc sumus, ejus causa parte. Nam in ea pro concessio sumitur, sciri quinam sint auctores scriptorum istorum. Nec verò dici potest, sciri quinam sint auctores, si tantummodo, verbi gratia, sciatur, quomodo nominati fuerint, & ex
qua

qua gente, aut patriâ fuerint, sed necesse est etiam alia externa non ignorari ad ipsos pertinentia, ex quibus conjici possit de animo & voluntate ac scientia ipsorum, ut inde possit intelligi, an ipsis fides necne sit adhibenda. Quare objectio ista non ad hunc locum pertinet, sed ad illum, ubi de secunda causa agitur, quæ est, quòd nesciantur auctores librorum istorum; in qua examinanda conabimur ostendere eos esse illos qui esse dicuntur, & consequenter tales, quales fuisse traduntur.

Absolvimus priorem partem primæ hujus causæ, itaque ad posteriorem accedendum nobis est, quæ eo concinetur, quòd scriptoribus istis propterea adhibenda fides non sit, quòd ex ipsismet eorum scriptis intelligi possit, eos vera non scripsisse, quippe qui vel inter se apertè pugnantia scripserint, vel alioqui manifestè falsa. Solet autem quod ad repugnantias attinet, quæ in istis scriptis inveniuntur, potissimum Evangeliorum ratio haberi, in quibus Evangelista alius ab alio non parùm in non paucis narrandis disfidere videtur, quæ si nobis singula examinanda ac perpendenda essent, non satis integer ad eam rem annus esset. Quapropter rejicientes auditores, quod ad singula ista attinet, ad ea, quæ viri plurimi doctrina atque ingenio præstantes de conciliandis inter se Evangelistarum dictis copiosè ac subtiliter scripserunt, satis habebimus in præsentia responsione quadam generali, quæ, iudicio meo, cuilibet non moroso homini satis facere debet, objectionem istam diluere, præsertim cum illa suppeditata nobis fuerit ab

antiquo Ecclesiastico scriptore eoque sanè quàm ingenioso atque erudito, nempe à Iohanne, qui dictus est Chrysostomus. Is enim in proœmio suo in Matt. i Evangelium hac de re ex professo agit, & breviter ostendit, nullam esse causam, cur ob istas (si modò sic appellari debent) repugnantias, scriptis Evangelistarum fides adhiberi non debeat.

Iam quæ Chrysostomus, prædicto loco in hanc sententiam, disputat, si rectè memini breviter hæc sunt. Primum, quòd ea, in quibus narrandis aliis ab alio Evangelista discrepat, non sunt ejus momenti, ut quicquam in re ipsa immutent, remanente semper inter ipsos summa concordia in iis narrandis, quæ aliquid momenti in ipsa Christiana religione habent. Deinde, quòd hæc ipsa diversitas in nullius momenti rebus, quæ in Evangelistarum narrationibus apparet, aut potius maxima ex parte apparere videtur, non minimum habet ponderis ad ostendendum, Evangelistas istos nullo modo ex composito inter se ea scripsisse quæ scripserunt, sed prout rerum veritas ferebat. Nam certè, si non veritate ipsa impulsus, ab eaque docti historiam istam scribere aggressi essent, sed eam sibi ipsis finxissent, atque, ut nihilominus vera esse crederetur, inter se convenissent quomodo ea scribi ab ipsis deberet, nunquam tales, etiamsi non magnæ diversitates, in illis legerentur. Non distinximus autem quod ad Evangelistarum scripta attinet, inter meram historiam & doctrinam, quia ipsa doctrina quæ in eorum narrationibus continetur, ad ipsam historiam pertinet, neque enim ipsi quicquam reverè docent.

docent, quod ad ipsa Christiana religionis dogmata spectet, sed tantum quae ab ipso Christo huc pertinentia dicta sunt nobis exponunt, & praeterea fortasse aliquid a Iohanne Baptista dictum. Dixi autem Fortasse, quia vix in iis, quae a Iohanne Baptista dicta fuisse ipsi narrant, quicquam est, quod verè ac propriè ad Christianam religionem eiusq; dogmata pertinet; Et si quicquam est, tamen id ipsum a Christo dictum fuisse ipsimet narrant. Quod attinet ad Acta Apostolorum, & ad meram historiam quae in ipsis continetur, si rectè quis animadvertat, nullam apertam repugnantiam in tota illa narratione deprehendes; tamen si una est quae ejusmodi videri possit, de qua nobis aliquid hoc loco dicendum videtur, ne illa fortassis apud quenquam tanti sit, ut illi persuadeat, non esse temerè historiae istius universae fidem adhibenda. Ea verò est, quòd nono cap. illius sui operis narrat Lucas, cum Saulus (qui postea dictus est Paulus) Damascum proficisceretur, ut eos quos Iesus Nazareni vomen profitentes invenisset, captos Hierosolymam abduceret, cumq; in ipsa media via Iesus Nazareus illi apparuisset, ad eumq; dixisset: Saule, Saule quid me persequeris, ipsius Sauli comites, vocem quidem audivisse, neminem autem vidisse. At vero cap. 22. ejusdem Historiae, cum Paulus ipse hanc eandem rem populo narraret, inducitur affirmans suos comites lucem quidem, id est lumen illud eximium, quod in ea apparitione extitit, vidisse, vocem autem ejus qui ad ipsum Paulum loquebatur non audivisse. Audivisse vocem & non audivisse, manifestissimè repugnant.

gnant, quare necessarium videtur, ut in altero ex istis duobus locis veritas desideretur. Duobus autem modis a viris doctis solet hic nodus solvi, (quanquam non defuerint qui omnino voluerint posteriorem locum depravatam esse, sed nos ista audere non debemus) veniamus igitur ad illos duos modos. Vnus est, quod quando in priore loco non exprimitur cuius illa vox fuerit, quæ dicitur fuisse audita à Pauli comitibus, non intelligatur hanc fuisse vocem illius, qui cum Paulo loqueretur, quam auditam ab illis fuisse in posteriore loco disertè negatur; sed fuisse Pauli vocem. Quæ interpretatio si alioqui merito recipi posset, sine dubio nodum ipsum egregiè solveret. Verum tamen vix videtur ea recipienda esse, sat si quidem apparet, cum Lucas in priore loco dicit, neminem fuisse visum ab illis qui cum Paulo erant, sed tantum auditam vocem, necesse esse, nisi vim quodammodo verbis istis facere velimus, ut vox illius intelligatur qui negatur fuisse visus. Quapropter, etiamsi hic prior modus hanc difficultatem tollendi magnos auctores habeat, non immerito quidam alii doctissimi viri, eo improbato, hunc alium excogitarunt, ut scilicet in priore verbum audiendi vocem significet ipsius soni vocis auditionem, sine articulata ipsorum verborum exauditione: in altero vero loco significet articulatam ipsam verborum ipsorum exauditionem; ita ut res ita se habeat, quod illi Pauli comites audiverint quidem vocis Iesu Nazareni sonum, sed ipsa tamen verba non exaudiverint. Ad confirmandum verò, rationem hanc ista duo loca conciliandi, alia lo-

sa af-

ea afferuntur, ex quibus melius intelligi possit verbum Audiendi, modò hac modò illa significatione usurpari. Locus unde intelligi potest, Audire idem significare quod sonum ipsum tantum verborum percipere, eumq; etiam ita confusum, ut ne verba quidem ea fuisse, quæ audita sunt, ipsis audientibus constet, habetur cap: 12. Evang: Iohannis, ubi dicitur, vocem è cælo venisse eiusmodi: Et glorificavi, & rursum glorificabo: cum Christus Patrem rogasset ut glorificaret nomen suum. subjungitur enim ibi ad verbum: Turba igitur quæ stabat & audiverat, dicebat tonitru extitisse. Vides hic prius dictum fuisse quòd vox extiterit, & quenam ea vox fuerit, & postea additum esse statim, turbam audivisse, quòd aliter intelligi nequit, nisi quòd audiverit vocem illam, & tamen tantum abest ut vocem intellexerit, ut ne verba quidem in ea voce comprehensa fuisse perceperit, quomodo enim alioqui tonitru factum esse dixisset? Sic igitur non iniuria intelligere possumus, cum scriptum est Pauli comites vocem audivisse, etiamsi omnino de voce ipsius Iesu Nazareni intelligendum sit, eos non quidem verba ipsa percepisse, sed tantum verborum sonum audivisse. Loci porro ex quibus constat audiendi vocem cum ad verba refertur ipsam explicatam verborum intelligentiam significare, ita ut audire idem prorsus significet quòd intelligere, non pauci ut arbitror sunt. Nostres tantum, qui ab aliis etiam afferuntur, in medium proferemus. Primus sit id quòd legitur Gen: 42. capite, ubi Iosephi fratres, cum per interpretem cum

ipso

ipso Iosepho loquuti fuissent, & propterea persuasum
 essent illum Hebraicam linguam non intelligere, in
 ipsius presentia loquebantur inter se de suo ipsorum
 facinore, quando ipsum Iosephum vendiderunt, seq̄
 ipsos accusabant, ubi subjungitur, quod illi nescie-
 bant Iosephum audire. Vbi necesse est, verbum audi-
 endi intelligendi significationem habere. Alter lo-
 cus est, ubi legitur, semel 4. Reg: cap: 18. & ite-
 rum Esa: cap: 36. ubi cum Rabsaces, Assyriae regio
 dux loqueretur Hebraicè cum Ezechia Regis homi-
 nibus, qui in mœnibus urbis stabant, rogatus est a qui-
 busdam præcipuis Ezechia Regis famulis ut Syriacè
 loqui vellet, ne populus qui aderat intelligeret; nos
 enim, inquit, audimus. Vbi apertissimè constat,
 verbum audiendi idem significare, quod intellige-
 re. voluerunt enim dicere, se callere linguam Syria-
cam, quam populus ignoraret. Tertius locus est cap: 5.
 Jerem: ubi Deus minatur populo, se effecturum ut in
 potestatem genis perveniat cuius linguam non sit
 auditorus, id est, sine dubio, intellecturus. Quo-
 circa nihil mirum videri debet, si in posteriore loco
 Actorum Apostolicorum verba illa: Non audi-
 verunt vocem eius qui Paulo loquebatur, ita ac-
 cipienda sunt, ut intelligatur eos verba ipsa non
 percepisse: præsertim cum hic nulla possit esse dubi-
 tatio, quin significatio ista verbi audiendi, a lingua
 Hebraica proficiscens, ibi locum habere queat; cum
 sint Pauli verba, qui ad populum Hebraicè loqueba-
 tur, ut diserte scriptum est in fine capituli antecede-
 ntis.

Absoluta breviter, quemadmodum institutum nostrum requirit, tractatione de repugnantis historie Actorum Apostolicorum, & ostenso in eo libro eas non dari, agendum esset de repugnantis doctrine, verum quia in libro isto, non secus, atque adeo magis quam in Evangelii, quicquid est doctrina, id pertinet ferè totum ad historiam; vix enim quicquam Lucas ex sua ipsius persona in eo libro scribit quod ad doctrinam pertineat, sed ea que huc pertinent ex aliorum persona narrat, propterea non est quod de doctrine repugnantis, separatim a repugnantis historie quicquam dicamus.

Sequitur ut videamus de repugnantis, sive historie sive doctrine, que esse possunt in tertia parte, quam fecimus, scriptorum Novi Testamenti, hoc est, in epistolis Apostolorum. Repugnantie quidem, quod attinet ad historiam, vix esse possunt, cum scripta ista non sint historica, sed, ut sic dicam, doctrinalia. Est tamen in Pauli epistolis historie nonnihil, ubi nondum animadverti posse meritò suspicionem esse alicujus repugnantie. Quod ad doctrinam attinet, sive in epistolis Pauli, sive in aliis aliorum Apostolorum, non video quomodo qui meritò suspicari possit, repugnantias aliquas in illis inveniri: sive qui singulorum auctorum epistolas separatim ab aliis aliorum inter se conferat: sive cujuscunque epistolam, seu epistolas aliquas, & que in eis continentur cum alterius cujusvis Epistolis, cumque in que in illis scripta sunt, conferre velit. Nam quòd quidam putant, si ea conferantur, que Paulus de justificatione nostra,

quod

quod
Præci
que e
inven
riam
ex fia
boni
ex o
Paul
fertu
ligat
lam
am. f
ligit
colloc
rum
quan
nom
divin
quan
quan
nostr
quan
new
tem.
stes.
solu
sum
quid
in ch

quod attinet ad fidem & opera nostra, in epistolis, præcipuè ad Romanos & ad Galatas, scripsit, cum eo, quæ eadem de re scribit Iacobus cap: 2. epistole suæ, inveniri inter utriusq; dicta manifestam repugnantiam; quippe quod Paulus dicat, non ex operibus sed ex fide nos justificari: Iacobus verò contra asserat, hominem justificari non ex fide tantum, sed etiam ex operibus; non est hac in re intellectum, quid Paulus, quid item Iacobus, vel fidei vel operum, præsertim verò operum nomine intelligat. Quod si intelligatur, statim apparet inter utriusque dicta nullam repugnantiam esse; immo summam concordiam. fidei siquidem nomine ex qua justificemur, intelligit Paulus fiduciam ejusmodi in Deo per Christum collocatam, ex qua necessario obedientia præceptorum Christi nascatur; quæ etiam obedientia sit tamquam forma & substantia istius fidei. Operum verò nomine intelligit Paulus, perfectam conservationem divinæ legis & omnium divinorum præceptorum, quam negat esse rationem nos ullo modo justificandi, quandoquidem neque hanc rationem justificationis nostræ Deus per Christum nobis proposuit, neq; quicumquam est qui ratione ista justus pronunciariqueat; nempe quod nemo, propter carni nostræ imbecillitatem, perfectissimam istam obedientiam reipsâ præstet. At vero Iacobus fidei nomine, ex qua sola, seu solum hominem justificari negat, intelligit assensum illum qui præbetur prædicationi divinæ, non quidem perfectum & absolutum, sed quodammodo inchoatum atque imperfectum; qui bonis operibus,

id est, obedientiā preceptorum Dei caret; ostendens interim nihilominus ex altera parte se non dissidere à Paulo, in hac ipsa fidei voce ejusq; significatione, si ea alio modo accipiatur, dum ait, fidem sine operibus mortuam esse. Hinc enim apparet quadam significatione, quæ scilicet illa est quam Paulus sequitur, apud ipsum Iacobum, fidem complecti opera, id est, Christi preceptorum obedientiam. Nam si sine operibus fides mortua est, jam sine operibus non est fides, nisi, quod ad presentem significationem attinet, plane equivocè, non secus atque hominis cadaver dicitur homo, quamvis reverà non sit. Iam quod attinet ad vocem operum, apparet manifestè, Iacobum voce ista non intelligere, perfectissimam obedientiam divine legis, sed tantùm obedientiam illam, quam a nobis necessariò, si justī coram ipso esse velimus, idq; ex ipsius gratia, omnino tamen requirit. Qua de re, non est hic latiùs disputandi locus; fiet hoc post modum, Deo dante, loco suo. Interim hæc pauca dixisse sit satis, ut appareat quòd immeritò Lutherus, & alii quidam eum secuti, alioqui eruditissimi viri, erraverint, dum epistolam istam, quæ etiam alias ob causas paulo suspectior est, omnino rejecerunt; ob id, scilicet, quòd ex parte ejus doctrina pugnaret cum doctrina Pauli epistolarum, de quarum auctoritate nemo, qui Christum ex corde fuerit professus, unquam dubitavit.

Restat quarta pars, quam fecimus, scriptorum N. Testamenti, id est, Apocalypsis: qui liber quamvū videatur quedam alia continere, quæ illum falsitatis

suspe-

suspe
ve do
audi
tione
quod
vi Te
tame
rantu
nus, v
ipsis
quod
seri d
isti fi
doctr
sed a
eo li
tanta
ra vi
ejusd
nulla
verfo
Novi
libro
camu
min
pro c
ram
nam
idq; n

suspectum reddant, tamen quod ad repugnantiam si-
 ve doctrinae siue historiae quae in illo continetur, nihil
 auidi vel legi haecenus quod sit dignum examina-
 tione. Considerandum verò est, quòd cum videremur
 quodammodo satis habere, si nullum ex scriptis No-
 vi Testamenti secum ipsum dissidere ostenderemus,
 tamen quia revera omnia ista scripta simul conside-
 rantur in hac disputatione nostra, tanquam liber u-
 nus, voluimus, ut hic fieri potuit, docere in universis
 ipsis scriptis inter se collatis non esse dissidium ullum,
 quod alicujus momenti, ad id quod querimus, cen-
 seri debeat, & vim ullam habeat persuadendi, libro
 isti fidem non esse adhibendam. Quod sanè, quod ad
 doctrinam attinet, non modò constanter affirmamus,
 sed addimus, nullam, ne minimam quidem, in toto
 eo libro doctrinae repugnantiam inveniri: immo
 tantam esse hac in re concordiam, ut res omnino mi-
 ra videri debeat, cum vix fiat, quin in unius &
 ejusdem auctoris scriptis, ubi de doctrina agatur,
 nulla inveniatur repugnantia, non modò in tot di-
 versorum auctorum scriptis, quot sunt ii qui libro
 Novi Testamenti continentur.

Superest, quod attinet ad primam causam, cur
 libro alicui fides adhiberi non debeat, ut aliquid di-
 camus de iis, quae in scriptis Novi Testamenti falsa o-
 mnino per se ipsa videri possint. Iam verò, cum hic
 pro concessio ponamus religionem Christianam ve-
 ram esse, necesse est, si quis velit aliquid ad doctri-
 nam pertinens in scriptis istis ostendere esse falsum,
 idq; non ex repugnantia ulla quae in iisdem scriptis

inveniat, de quo jam satis dictum est, necesse est, inquam, ut vel ratione, vel aliis divinis testimoniis id probet. Ratione vix ullo modo fieri id potest, cum Christiana religio non humana rationi ullo pacto immitatur, sed tota ex voluntate Dei pendeat, & ex ipsius patefactione. Quod verò attinet ad divina alia testimonia, quae scilicet vera sint, & cum ipsa Christiana religione consentiant, alia nulla videntur afferri posse, quàm ea quae libris veteris Testamenti continentur: ita ut ex iis, quae in istis libris ad doctrinam pertinentia tradita sunt, intelligere, aut merito suspicari qui possit, quaedam, quae in scriptis Novi Testamenti docentur, esse falsa. Verùm quomodo id fieri poterit, nisi sciamus, quatenus ista, quae docentur in Testamento veteri, fuerint sub Novo, & sic in Christiana religione conservata ac retenta, & quomodo ea quae ibi sunt dicta, accipi & explicari debeant in ipsa Christianae religionis patefactione? Haec verò sciendi atque investigandi nulla ratio sese offert, quae planè incerta non sit, praeter ipsa Novi Testamenti scripta, ex quo apparet circuitum hic inutilem fieri, & frustra omnino hac in parte laborari.

Ad confirmandum verò, quòd nihil evidenter falsum in libris Testamenti Novi inveniat, quòd scilicet ejusmodi esse per se ipsum appareat, aut certè non momenti alicujus, plurimum haec ratio valere videtur, quòd alioqui non fuissent inventi tot homines eruditione atque ingenio praestantes, adde in religione aliqua à Christo aliena educati, qui libris istis plenissimam fidem adhibuissent; ut certè adhi-

buerant, quemadmodum historie & ipsorummet scripta, quæ aliqua ex parte etiamnum extant, abunde testantur.

Considerandum verò est, hanc evidentem falsitatem, quam in libris istis inveniri pernegamus, duplicem esse, aut scilicet ad doctrinam pertinentem aut ad historiam.

Quod ad doctrinam attinet, etiamsi satis ea esse videantur, quæ breviter hæctenus attigimus, tamen quia posset quis ad doctrinam referre, si quid ex veteris Testamenti libris in Novo Testamento citetur, & ad aliquid confirmandum afferatur, quemadmodum sane id fieri sæpe contingit, propterea antequam aliquid de iis, quæ propriè ad historiam pertinent, explicemus, conandum nobis est ut a scriptis istis calumniam quandam depellamus, quam Iudæi homines, vel Iudaico spiritu præditi, excogitarunt, ut illis omnem auctoritatem detrahant. Illud est quod ajunt, multa testimonia ex veteri Testamento in Novo ad aliquid confirmandum afferri, quæ nihil ad propositum faciant, quippe de quibus constat quòd longè alio diverso sensu fuerint ibi scripta, unde citantur. Ad quam sanè calumniam penitus diluendam, necesse quodammodo videretur, singula testimonia de quibus isti ita asserere non verentur, ut diximus, examinare, unà cum locis ipsis, ubi illa afferuntur. Sed quia hoc nimis longum esset, propterea satis arbitramur futurum, si per capita quedam ad objectionem hanc respondeamus, & quid de testimoniis istis planè sentiendum sit, aperiamus.

Duo igitur scienda sunt: Vnum est, quòd non omnia testimonia, quæ ex Vetere Testamento citantur in scriptis Testamenti Novi, quamvis aliter prima fronte videri possit, in eum finem afferuntur, ut probetur id ipsum esse veram quod affirmatur, & præsertim id fuisse certò prædictum, sed sæpius citantur loca ad ostendendam rerum similitudinem, & ita accommodantur ad propositum illius scriptoris, & quodammodo conferuntur cum eo quod ille affirmat; id quod exemplū aliquot prolatis ostendere poterimus. Sed prius dicendum est, quid sit illud Alterum, quod diximus sciendum in hac disputatione esse. Id autem est, quòd multa ex istis citatis testimoniis non unicum sensum habent. nam sæpe Spiritus sanctus una prædictione aut affirmatione, plura complecti voluit; idq; ut semper mos præcipuè vaticinationum fuit, ad rem ipsam prædictam occultandam, saltem aliqua ex parte, donec ipsa res existeret, ex cuius eventu clarè intelligeretur id prædictū fuisse, quod evenit, nec sine Dei providētia ac decreto evenisse. Id quod verum esse, necesse est ut omnes fateantur, qui concedunt Iesu Nazareni religionem veram esse; quemadmodum hoc in loco à nobis pro concessio sumitur; & consequenter ac necessariò fatentur atque agnoscunt, ipsum Iesum esse illum Messiam seu Regem populi Dei, ab ipso Deo in scriptis Veteris Testamenti promissum, quemadmodum ipsi Iudei, talem regem promissum fuisse fatentur. Nisi enim multa, quæ de rege isto ibi prædicuntur, figuratè dicta esse intelligantur, & sic aliud significare, quàm ipsa verba sonant, ac præterea in aliis quibus-

dam priore quodam sensu fuisse antea impleta, nullo pacto defendi poterit, ipsum Iesum Nazarenum esse revera Messiam istum.

Sed jam ad priorem rem, quam diximus hic sciendum esse, revertamur, & exempla ejus quod diximus, afferamus, ubi antequam ea a nobis proferantur, animadvertendum est, ex ipso citandi modo satis posse intelligi differentiam, de qua ante diximus. Cum enim Novi Testamenti scriptores non accommodationis tantum cujusdam gratiâ & similitudinis, aut etiam generalis alicujus confirmationis, loca citant, sed ut planè ostendant id, quod ipsi narrant aut affirmant, fuisse omnino prædictum, & quia prædictum fuerat, necesse fuisse ut existeret; tunc autem extitisse, cum illud evenit quod ab ipsis narratur, aut affirmatur; eos verba ejusmodi adhibere solere, unde hæc ipsorum mens apertè constet; ut exempli causa, ut adimpleretur quod dictum est, vel aliquid simile. Cum verò accommodationis tantum gratiâ ea citant, verbis solere uti que aliter intelligere nos non cogunt.

Exemplum sit primum apud Paulum in Epistola ad Romanos capite 9. ubi citat locum illum Esaiæ 1. cap: Nisi Dominus Zebaoth reliquisset nobis semen &c. Neque enim ait Apostolus, dictum istud Prophete tunc impletum fuisse, cum Iudei majore ex parte rejecti fuerunt, & quidam pauci tantum reservati, qua de re ibi agebatur: sed tantum ait, quemadmodum ante dixit Esaias, quandoquidem verbum $\pi\sigma\omicron\sigma\iota\sigma\eta\kappa\epsilon\upsilon$ quo ibi utitur Apostolus,

nihil cogit ita accipere, ut vaticinationem significet. Est enim verbum istud quod idem sonat, atque praedixit, tam in Graeco quam in Latino ambiguum, ut scilicet & Prophetiam, id est vaticinationem significare possit, & tantum ante, ut sic dixerim, dictionem. quemadmodum in eo afferendo illud interpretati sumus. Itaque si qui adversus Paulum argumentaretur, volens ostendere, istud jam fuisse multo antea impleverum seu factum, & hinc concluderet ab Apostolo non recte fuisse locum istum allatum, is nihil ageret; cum Paulus simpliciter ostendere voluerit, non debere quenuquam mirari, si exigua portio populi Iudaici servata Christi tempore fuisset, cum simile quiddam etiam antea evenisset. suntque in eo ipso loco ab Apostolo alia etiam quaedam testimonia, in hunc ipsum finem tantummodo allata, non autem quia voluerit docere id ipsum nominatim & singulariter quod ipse affirmabat, jam fuisse praedictum.

Alterum exemplum esto id, quod non scriptor ipse sed Christus ait, cap: Matth: 15. cum illud quod Esaias cap: 29. scriptum reliquit; Populus hic labiis me honorat, cor autem eorum longe est a me, ait pertinere ad illum ipsum populum, qui tunc eo hic vivente praesens erat. Quamquam enim utatur Christus verbo Prophetavit, inquit, Bene propheta vit de vobis Esaias, tamen prophetandi verbum isto in loco non est accipiendum, ac si dixisset vaticinatus est, sed, in sua prophetia scripsit. Apparet enim manifeste id, quod tunc Esaias de populo Iudaico scripsit, a Christo relatam, eo ipso

ipso tempore verum extitisse, nec vaticinationem esse, sed exprobrationem populo a Deo factam rei presentis: ita ut sensus verborum Christi sit, id, quod ita indefinitè de populo Iudaico ab Esaia Dei nomine prolatum fuerat, rectè omninò fuisse prolatum; quippe quod ita indefinitè sumtum, verum esse deprehenderetur. Nam & Paulus ad Titum scribens 2. cap: ait, quendam prophetam, id est Epimenidem, rectè dixisse de suis Cretensibus, Cres semper mendax, mala bestia, venter iners est. Vocat illum Prophetam non quia futurum quicquam prædixerit, sed quia verum de gente illa affirmavit, & propterea etiam verbum Prophetavit, quo Christus utitur, rectissimè ita accipi potest, ac si simpliciter dixisset, affirmavit atque asseruit.

Tertium exemplum sit locus ille 2. Cor: 6. ubi Paulus citat locum Esaia 49, Tempore accepto exaudivi te, & in die salutis auxiliatus sum tibi. ut ostendat, debere Corinthios animadvertene in vanum gratiam Dei acceperint. sequitur enim apud ipsum Paulum: Ecce nunc tempus acceptum, ecce nunc dies salutis. Quare videtur Paulus locum istum Esaia citare, quasi ibi hac de re ad Corinthios pertinente, & de qua ipse eos monebat, ageretur, cum tamen certum sit, longè alia de re eo in loco agi, quippe, cum verba Prophetæ Dei nomine dicta, ad Messiam, si sensum propheticum attingere velimus, omninò referantur. Itaque non ad rem attulisset locum istum Paulus, nisi ita accipi deberet citatio ipsius, ut intelligere tantummodo de-

beamus, cum velle, id quod ibi alia dere, & ad aliud propositum dictum est, accommodari posse ad rem de qua ipse agebat, concludi scilicet posse ex loco Esaie, esse tempus quoddam acceptum, & quod salutis tempus appellari potest, in quo Deus nos exaudiat nobisq; opituletur, quod propterea elabi sinere non debemus.

Multa alia sunt exempla talium accommodatiōnum, ita ut etiam eas fieri contingat sine praevis verbis, quae significant citari locum illum, qui ex veteri Testamento ad praesens institutum in Novo Testamento accommodatur. Quemadmodum cum Paulus Rom. 10. profert verba illa: Quinimmo in omnem terram exiit sonus eorum, & ad fines orbis terrarum verba eorum, quae verba leguntur Psal: 19. & de caelis eo in loco sunt dicta, & interim ab Apostolo ad eos accommodata, qui Evangelium annuntiabant, quippe propter hanc similitudinem, quae est inter caelos & eiusmodi homines, qui Evangelium annuntiant. quod quemadmodum caeli omnibus, qui intelligant mundum à Deo creatum fuisse, ipsius Dei gloriam atque potentiam manifestam faciunt, sic Evangelii praecōnes, iis, qui de Deo sint persuasi, quod sit, & quod humani generis curam habeat, aperte & conspicua quadam ratione, ipsius Dei gloriam ac potentiam patefaciunt.

Iam explicato primo membro, quod fecimus rationis respondendi iis, qui allegationes veteris Testamenti, à Novi Testamenti scriptoribus factas calumniantur, quasi minime ad propositum pertineant, ad al-

ad alterum membrum transeamus, quod est, afferri quidem testimonia quaedam Veteris Testamenti in Testamento Novo, ad confirmandum id, quod dicitur tamquam ibi prædictum & vaticinatione comprehensum, quod videatur tamen ad propositum non facere, cum interim faciat, ob eam causam, quod duplici sensu prædictiones istæ sepe sunt proditæ. Exemplum huiusce rei insigne esse videtur id, quod legitur Matthæi cap: 2., ubi Evangelista ait, cum Christus a Iosepho unâ cum matre ipsius in Ægyptum adhuc infans abductus esset, idq; ex divini Angeli monitione, id factum fuisse, ut impleretur quod dictum fuerat a Domino per Prophetam, Ex Ægypto vocavi filium meum &c. Videtur enim omnino hic locus, qui est apud Oseam initio capituli II., intelligendus esse de Israelis populo, qui ex Ægypto à Deo evocatus, id est liberatus fuerat. Quod etiamsi verissimum esse concedatur, non tamen hinc sequitur, quin ibidem interim prædictum fuerit, id, quod de verò Dei filio aliquando futurum erat. Nam certè ex altera parte mirum videtur, quòd Israel ibi quasi derepente, idq; absolute, Dei filius nominetur. adeò, ut fortasse non sine causa quidam velint ita de Christo accipiendum esse locum istum, ut de Israele non accipiat. cuiusmodi interpretes sunt Tremellius & Junius in translatione & annotationibus suis in locum istum, mirabiliter alioqui, ut verum fatear, verba ipsa Hebraica in latinum convertentes, ut inde is sensus tantum elici possit, qui ad Christum pertineat.

Alterum exemplum praebeat nobis idem caput 2. Matth: ubi citatur locus Ierem: 31. de voce & clamore audito in Rhama cum fletu & ploratu multo, Rachelis scilicet plorantis filios suos, nec volentis consolationem accipere, quoniam iam ipsi filii non sint. Videtur enim locus iste pertinere ad tempora captivitatis Babylonicæ, & illius excidii atque internecionis multorum qui Hierosolymis habitabant, quæ urbs erat in sorte quæ Benjamin tribui obtigit, qui Benjamin filius Rachelis fuerat. Sed nihil tamen vetat quin idem iste locus accommodari possit ad ea, quæ exenerunt in agro Bethlehemitico Herodis magni tempore, in occisione illa, ipsius jussu facta, omnium infantium a biennio & infra, quam verbis suis docet Apostolus, in isto Ieremie loco fuisse prædictam. propterea enim ad Rachelem, ut ad matrem, pertinere dicuntur infantes illi, quia, per figuram synecdochen, cum Iudaicus ille populus, ex descendentibus à Benjamin ex parte, ex parte verò licet multo maiore ex descendentibus à Iuda constaret, potuerunt infantes isti filii Racheli appellari, ex qua, ut diximus, Benjamin natus est, atque eò aptius potuit alteri figuræ prosopopœiæ, per quam Rachel istos suos filios plorare inducitur, locus esse, quod ipsa Rachel fuit in agro isto Bethlehemitico sepulta, quemadmodum habetur Gen: 35. Quanquam & istum etiam locum, nisi memoria me fallit, iidem Tremellius & Junius ita accipiunt, ut ad id tantum pertineat, ad quod confirmandum ab Evangelista citatur. Verùm, ut iam diximus, nulla hic est absurditas, si duplici sensu

sensu
esse p
taneu

E

admo

ra Ch

in No

sensu

ceusq

ratur

pora

moni

pora

sensu

dum

ut ip

quod

locu

liger

ise. l

de, c

ni, &

que

prie

ne h

ille g

gene

post

26. a

dem

Sensu intelligantur prædictiones Veteris Testamenti esse prolata; immo hoc videtur proprium & consentaneum prædictionibus esse.

Est autem hic animadvertendum, quòd quemadmodum aliquando contingit, ut id, quod ad tempora Christi pertinet, in veteri Testamento dictum, & in Novo allatum, habeat priorem quendam suum sensum secundum ipsam literam, qui ad Christum, eiusq; tempora non pertinet, posteriorem verò figuratum & allegoricum, qui ad Christum eiusq; tempora pertineat: sic contra fit, ut non pauca sint testimonia Testamenti Veteris, ad Christum eiusq; tempora pertinentia, quæ secundum quendam priorem sensum aliquo modo figuratè accipi debeant, secundum verò posteriorem maximè propriè, atq; omnino ut ipsa verba sonant, adeò, ut tunc nihil sit prorsus, quod isti ad calumniam rapere possint, quasi ad rem loca ista allata non fuerint; nisi quòd oporteat intelligere, eum, de quo prius dicuntur, Christi typum fuisse. Exemplum sit id, quod habemus Psal: 2. de Davide, cui promissi fuerint à Deo possidendi terræ termini, & alia non pauca ibidem ei promissa leguntur, quæ omnino, quod ad ipsum Davidem attinet, propriè accipi nequeunt. Sunt enim ipsius respectu, planè hyperbolica, Christi vero respectu, cuius typum ille gerebat, planè vera sunt ac propriè dicta. Huius generis est illud, quod a Petro primùm cap. 2. Act. Apostolicorum, deinde a Paulo cap: 17. citatur ex Psal: 16. ad Christi resurrectionem confirmandam. siquidem in eo Psalmo, David videtur de se ipso dicere, quòd

quod non esset corpus ipsius visurum corruptionem, quam tamen vidit. Ex quo ambo isti Apostoli concludunt, verba illa Psalmi, ad alium quempiam referenda esse, in quo verè impleta fuerint, nempe ad eum, cuius typum David gerebat, nempe ad Mesiam seu Christum, quem aliis modis & rationibus in promptu probare habebant, debuisse corruptionem sui corporis non videre; id est, postquam occisus fuisset, ac mortuus, brevissimo post tempore, corpore suo adhuc integro, in vitam revocari. Vbi interim sciendum est, non esse Apostolorum istorum verba ita accipienda, ut Psalmi locus ad ipsam Davidem nullo modo pertineat; sed tantùm intelligendum est, non propriè, neque ut ipsa verba sonant, ad ipsum Davidem pertinere.

Potest autem exemplum, quod modò attulimus, esse pro tertio ejus generis, ubi videantur Novi Testamenti scriptores, vel ii, qui ab ipsis loqui inducuntur, ex veteri Testamento loca citare, que ad rem non faciant. Nam posset aliquis objicere & Petro & Paulo, quod David omnino de ipso, in Psalmo illo 16. loquutus fuerit, non autem de alio quopiam fuerit vaticinatus, sed interim figuratè, ut in omnibus sermonibus fieri contingit, loquutum esse, & dixisse, se non visurum corruptionem, non simpliciter & absolute, sed pro illo instanti tempore. Qui enim moritur, idem etiam postea corrumpitur, immo ipsa mors corruptio vocari potest. Quare, mortis loco, corruptionem substituere potuit, ac dicere, se non visurum corruptionem, pro eo, quod est, se non moriturum, id est, se

est,
tum
ba
acco
Apo
Opo
riqu
scrip
abun
tur,
qui p
eta e
tame
comp
cere
Hebr
dispu
prim
da ess
quico
ex V
ad D
affirm
lios q
per so
nova
sum
videa
veter

est, se ab inimicis suis minimè interfectum ac delatum iri. Verum tamen, ut jam dictum est, cum, si verba propriè accipiantur, ea non possint ad Davidem accommodari, hinc fit, ut merisò ad Christum, ab Apostolis istis, referendum esse, affirmatum fuerit. Oportet enim & illud animadvertere, quòd ex antiquis Rabbini, qui ante Christum existerunt, ex quibus scriptis, aut dictis illorum, quæ ad nos pervenerunt, abunde constat, etiam antequam Christus nasceretur, jam creditum ac receptum inter ipsos Iudeos, qui peritiores erant, fuisse, ut multa, quæ de aliis dicta esse in veteri Testamento videntur, ad Messiam tamen potissimum referri debeant, & ita in ipso complementum suum sint habitura. Habemus hujusce rei manifestum indicium in Auctore epistolæ ad Hebræos. Is enim cum ipsis Hebræis quodammodo disputans, apertè pro concesso sumit, quedam de aliis primo loco dicta, ad Messiam tamen postea applicanda esse. id quod præcipuè in primo capite facit, ubi quicquid serè ad Christi præstantiam ostendendam ex Veteri Testamento affert, vel ad Salomonem, vel ad Davidem pertinet, aded ut id, quod nos nunc affirmamus, Salomonem scilicet & Davidem, & alios quosdam Iesu Christi typos fuisse, sub quorum personis, multa de ipso Christo fuerint prædicta, non nova res est, sed jam diu in ipso Dei populo, ante ipsum Christum natum animadversa atque recepta.

Afferamus adhuc quartum exemplum, ubi videantur in scriptis Novi Testamenti loca afferi ex Veteri, quæ ad propositum non faciunt, & tamen

reverà faciant, immo magis ad id pertineant,
 ad quod confirmandum ibi adferuntur, quàm ad
 illud quod pro prima fronte videri possit. Exem-
 plum esto quartum istud, id quod legimus Actor:
 3. & 7. a Petro & a Stephano in medium alla-
 tum, ad probandum, Iesum Nazarenum audiri
 debere, illiq; obediendum esse. Est enim, quod adfe-
 runt, illud, quod scriptum legimus Deut: 18. ubi De-
 us Mosi dicit, populum rectè rogasse, ne ipse Deus
 cum illis loqueretur, sed ipse Moses Dei nomine, &
 statim subjungit: Se suscitaturum prophetam, post
 ipsum Mosen, ipsi Mosi similem, per quem loqueretur
 ad eos, quemq; nisi audierint, ipse in eos sit vindica-
 turus. Videntur enim verba ista, non quidem si ipsa
 verba, sed si locum ipsum inspiciamus, & cur ea di-
 cta a Deo fuerint consideremus, omnino id signifi-
 care, quod vulgò etiamnum Iudei asserunt, id est,
 Deum quidem, quando ita populus volebat, non per
 se ipsum, sed per Mosen alloquutum populum, dum
 ipse Moses viveret; post ipsum verò semper excitatu-
 rum aliquem prophetam, per quem id similiter fa-
 ceret, comminatione illa adjuncta, se vindicaturum
 in eos, qui ejusmodi prophetam non audierint, ipsiq;
 non auscultaverint; ne arbitraretur populus, quan-
 do jam non Deus ipse loquutus ad illos esset, posse se
 ea, quae ipsius nomine dicerentur, aliqua ratione
 spernere. Hic, inquam, videtur esse sensus verborum
 Dei in loco isto, si occasionem spectemus, cur illa di-
 xerit; Verùm si verba ipsa propriè, ut sonant, acciperet
 velimus, satis apparere videtur, Deum de insigni a-
 liquo

liquo propheta & singulari loqui, quem suscitaturus
 esset in populo post Mosen. Quæ verba, Post Mosen,
 commodissimè ita accipi possunt, ut non significant,
 post mortem Mosis, sed postquam ejus auctoritas de-
 siderit, & ita jam non sit a populo mordicus retinen-
 dum quicquid Moses dixerit, sed alia ratione De-
 voluntas intelligenda atq; interpretanda, quam sci-
 licet rationem ipse Deus eustraditurus & patefa-
 cturus esset. Iam insignis ejusmodi & singularis pro-
 pheta, qui post Mosen, id est, postquam Mosis auctori-
 tas desiderit, in populo extiterit, nullius legitur, vel e-
 tiam de quo id suspicari liceat, præter Iesum Naza-
 ranum. Mosis siquidem auctoritas, de qua loquimur,
 illibata peperpetuò mansit, usq; ad Iesum Nazarenum
 a Deo exhibitum; & apud ultimum, qui extitit in
 populo verus ac germanus Dei propheta, id est, apud
 Malachiam, in extremis ejus prophetiæ verbis, di-
 sertè populus monetur, ut velit Mosis, leguq; per ip-
 sum data meminisse, eamq; servare; nec post prophe-
 tiam istum quicquam divinitus vel dictum vel scri-
 ptum habemus, usque ad Iesu Nazareni tempora,
 quod monitioni isti adversetur. Adde, quòd alter ille
 sensus, qui magis ad rem, de qua ibi agebatur, per-
 tinere videtur, locum habere non posse ob id censen-
 dus est, quòd post Mosen non semper extitit aliquis
 propheta in populo, quem, ut Mosen, audire populus
 deberet; immò nullus, si propriè loqui velimus, ejus-
 modi propheta, ante Christi tempora extitit. cum,
 quicquid populo per alium quempiam à Deo signifi-
 cabatur, quòd pertineret ad rationem & modum ipsi

Deo obediendi, nihil esset aliud, quàm repetitio, aut declaratio eorum que jpm a Mose dicta fuerant. Certè Iosue ipse, qui statim Mosi successit, non egit cum populo monitorem voluntarij divina in obediendo ipsi Deo, sed munus ejus fuit, populum in promissam terram, quam jam aliqua ex parte, vivente adhuc Mose, possidere ceperant, eam inquam exiguam regionem, que cis Jordanem erat, inducendi, eamq; illis dividendi, & quedam statuendi, que simpliciter ad politiam ejus populi pertinerent. Post Iosuen verò, Iudicum tempore, quod satis longum fuit, vix ullus nominari potest, per quem Deus populum alloqueretur, presertim verò, qui propheta nomen mereatur, & de Dei voluntate populum monendi munus haberet. Atque hæc satis sunt, ne per reliquam tempus usq; ad Christi adventum discurremus, ut ostendatur sensum istum à Iudæis receptum, & quem non negamus, aliquo modo posse ad Dei, in eo loco, propositum accommodari, non esse verum ac germanum loci sensum, & propterea optimè ac rectissimè fuisse Dei verba illa ad singularem aliquem Prophetam accommodata, qui exiturus esset, postquam Mosi auctoritas defuisset, & consequenter ad Iesum Nazarenum. De quo, cum locum istum, isti discipuli ipsius Iesu interpretantur, non tam aliquid probare volunt, quàm simpliciter docere, ut satis ex ipsorum verbis constare videtur. Sed quia adhuc posset aliquis objicere, in eo propterea quodammodo à Petro & Stephano peccatum fuisse, quòd locum ipsum non ita attulerunt, ut apud ipsum Mosem legi-

tur, a-

tur, aliquid hac de re dicemus, cum alterum caput presentis disputationis aggrediemur, in quo agendum erit de iis, quæ ad historiam pertinent, in quibus videantur scripta Novi Testamenti errore non carere, immò aliquid manifestè falsum continere; quandoquidem hoc, quòd veteris Testamenti loca, in Novo, non ita citata fuerint, ut revera ibi habentur, ad historiam omninò pertinet, non autem ad doctrinam, de qua adhuc loquimur.

Exemplum unum adhuc adducemus, ubi videtur locum aliquem, in Novo Testamento, ex vetere fuisse citatum, qui ad rem non faciat, quippe quòd locus iste sit omnium celeberrimus, & in quo Iudei Judaizantesq; homines iactant, manifestè apparere quàm Novi Testamenti scripta a Dei Spiritu sine aliena. Is est locus Esa: 7. citatus a Mattheo cap: 1. his verbis: Totum autem hoc factum est, ut impleretur quòd dictum est a Domino, per prophetam dicentem: Ecce virgo concipiet & pariet filium, & vocabunt, seu vocabit nomen ejus Emmanuel, quòd est interpretatum, Nobiscum Deus. Porro illud totum, cuius hic meminit Evangelista, & cuius causâ locum istum citat, est, quòd Maria, cum Iosepho viro de Davidis domo desponsata esset, cum nondum convenissent, inventa est gravida ex spiritu sancto. Iam locus apud ipsum Esaiam ita habet: Cum regnare cepisset in Iuda Achaz, qui fuit pater Ezechie, Rezin Rex Syriæ, & Phaceas filius Romeliæ Rex Israelis, ascenderunt junctis copiis in Iudeam, Ierusalemq; obsederunt.

derunt, ut illam caperent, quod illi non successit, etiamsi alioqui maxima damna, praesertim Rex Israelis & ejus exercitus, toti illi religioni intulerint, ut ex 2. libro Paralip: aperte constat. Dum igitur adhuc cum exercitu uterque in Iudaea esset, immo in ipso initio, cum ad Hierusalem obsidendam accesserunt, & nunciatum esset hoc totum Regi, & domui ejus, valde timuerunt, & perterrefacti sunt. Tunc praecepit Deus Esaias propheta, ut ad ipsum regem, accepto secum filio suo accederet, qui filius eo nomine vocabatur, quod significabat, atq; indicabat, reliquias reversuras esse, id est, quamvis futurum esset, ut magna pars populi captiva duceretur, reverterentur tamen postea in patriam complures ex illis, quemadmodum factum est, & in praedicto libro Paralipomenon aperte legitur. Accedens igitur Esaias ad regem, dixit ei: Pete tibi signum à Domino, sive in caelo sursum, sive in terra deorsum, Dixerat enim Deus Esaias, ut Regi diceret, ne timeres sibi ab istis duobus titionibus fumigantibus. Tunc Rex dixit: Ego non tentabo Dominum, neque petam signum ullum. Esaias verò subjunxit, Ecce, non satis vobis est, ut negotium hominibus facessatis, etiam ipsum Deum fatigare vultis. Quod significat, postquam Deus illi benignè proposuerat, ut ipse sibi peteret signum, non debuisse illum tamen velle, ut ipse Deus ejusmodi signum daret, id quod Propheta appellat Dei fatigationem, hoc dicto, Ecce, inquit, Iehova dat tibi signum. Ecce juvencula illa concipiet, seu potius,

dius, concipiens, & pariet, seu, ut verbum ipsum
 sonat, pariens filium; & vocabis, subintellige, ô
 juvencula, (nam verbi vox in Hebræo fœminini ge-
 neris est) seu vocabit, sic enim similiter ex Hebræo
 legi potest, fœminino genere nihilominus retento,
 nomen ejus Emmanuel. Butyrum & mel co-
 medet, ad avertendum a se malum, & eli-
 gendum bonum. Nam priusquam hic puer
 noverit reprobare malum, & eligere bo-
 num, derelinquetur terra, quam tu detesta-
 ris, a facie duorum regum suorum, sic inquam,
 legitur in ipso Hebræo codice. Iam primum, ut nihil
 dicamus de voce juvencula, quæ apud Mattheum le-
 gitur virgo, (hoc enim pertinet non ad doctrinam,
 sed ad historiam, & de eo in proximè sequenti capi-
 te agendum nobis erit) hoc, inquam, in præsentia o-
 mnis, videtur locus iste omnino nihil ad rem facere,
 cum, quidquid ibi prædicitur, pertineat manifestè
 ad tempora illa ipsius Achazi Regis, non autem ulla
 ratione, ut videtur, ad Iesu Nazareni tempora. Præ-
 terea, quoniam esset iste puer, qui nasciturus esset ex
 juvencula ista, & quoniam esset ipsa juvencula, o-
 mnino videtur constare ex cap: seq: 8. apud eundem
 Esaiam. Ibi enim statim post Esaiæ verba ad Acha-
 zum facta Dei nomine, subiicitur, quod Deus ibi E-
 saiæ dixerit, ut sumeret sibi volumen grande, &
 scriberet in eo verba ista: Festina spoliū, acce-
 lera prædam; id quod ille fecit. Postea accessit ad
 prophetissam, sive, ut alii volunt, hoc iam dicitur,
 quasi factum antea, quæ conceperat, seu concepit.

& pepererat, seu peperit filium, dixitque Iehovah
 ad Esaiam; Voca nomen ejus, Festina spoliū,
 accelera prædam. Quia antequam sciat puer
 vocare: Pater mi, mater mea, tolletur, sive, ut
 ad verbum Hebraicè legitur, tollet Damascum,
 & spolia Samariæ, coram rege Assyriæ. Vide-
 tur autem planè constare, propter rerum summam
 similitudinem, immo propter easdem ipsas res, quòd
 puer iste, sit ille idem, de quo superiore capite dictum
 est. Nam quòd ibi dicitur, antequam noverit puer
 reprobare malum, & eligere bonum, hic dicitur,
 antequam sciat vocare, Pater mi, mater mea. Quòd
 verò ibi dicitur, derelictum iri terram, quam Rex
 Achaz abominabatur, à duobus sui regibus, hic di-
 citur, spolia Samariæ, & Damascum ablatum iri.
 quod, ut legitur lib: 2. Reg: cap: 15, & 16. significat,
 Regem Assyriæ debellaturum tam Damascum quàm
 Samariam, & interfecturum Rezim Syriæ regem,
 cuius provincie caput erat Damascus. Post quæ sta-
 tim etiam accidit, ut ipse Rex Samariæ occideretur
 ab Osea, qui in locum eius successit. Hæc autem facta
 sunt, secundo ad summum, aut tertio anno, postquam
 prædictio ista divina per Esaiam, & ipsi Esaiæ facta
 extiterat, ita ut verè impletum fuerit, ut antequam
 puer ille, ex prophetissa natus, nosset reprobare ma-
 lum, & eligere bonum, id quod intelligendum est,
 de quacumque mali reprobatione, & boni electione;
 alioqui si de exacta seu plena utrâque intelligen-
 dum esset, ad complures annos res differenda erat,
 & simul, ut puer nondum sciret expedire patrem
 suum,

suum, aut matrem appellare, praesertim, si, ut verba sonant, conceptio prophetissa non ante, sed post ipsam praedictionem fuerit. Iam illud: Butyrum & mel comedet, significat felicitatē, ac bonū rerum statum; & verba illa quae statim sequuntur, ad reprobandum malum & eligendum bonum, quamvis compluribus, iisdemq; diversissimis modis explicentur, ita iudicio meo accipienda sunt, ac si scriptum esset, simul atque noverit reprobare malum & eligere bonum. Nam praeterquam quod phrasim ipsa Hebraea id fert, illud etiam indicari videtur satis aperte ex eo, quod sequitur. Nam antea quam puer noverit &c. Hoc enim indicat, quod simul atque cepisset puer ille nosse reprobare malū, & eligere bonum, butyrum & mel comesturus esset, id est, quies & pax in terra Iudae esset futura. Quod sanē consequentum est ex eo, quod isto tempore, ut ibi discrete dicitur, terra, quae ita abominationi erat Achazo Regi, à suis regibus fuerat derelicta, id est, uterq; iam mortuus erat, & consequenter terra Iudae, quam ipsi affligebant, nullo alio iam infestante, pacem & quietem nacta fuerat. Nam quod Rex Assyriae, nempe Tiglatpeleser, quemadmodum etiam ipse Deus, in ista ipsa praedictione per Esaiam praeiunxerat, Iudam admodum afflixisset, id factum fuerat eodem tempore, quo & Damascus & Samaria, ab ipso eodem rege, direpta fuerat, qui exercitu suo ulterius etiam excurrerat, & Iudaeam ipsam terram vastauerat. Quod autem diximus de significatione locutionis illius comedendi butyri & mellis, non modò

verum esse constat, ex ipsa locutione, que metaphoricè, idque pereleganter, in eum accipi potest sensum, quem diximus; sed etiam ejus rei aperta vestigia apparent, in eadem ipsa predictione. Nam inferius leguntur verba ista: Butyrum & mel comedet, quicumque remanserit in medio terræ. Quod sine dubio significat, eos, qui tunc temporis, in terra Judea futuri essent, pace ac quiete fruituros.

Ex iis quæ diximus, satis constare arbitramur, illum eundem puerum, de quo sat cap: 7. Esa: agitur, eum esse, de quo agitur cap: 8. qui filius erat ipsius Esaie. Ex quo tanto magis apparere videtur, locum ac predictionem, quam Matth: cap: 1. citat, omnino ad tempora illa ipsius Propheta pertinere, ita ut prima fronte saltem non appareat, quomodo Evangelista hunc locum, ad sua tempora, & ad Christi personam, tamquam Christus ille puer esset, accommodare potuerit. Confirmatur autem, totam illam predictionem, reverâ ad tempora illa, quibus scripta fuit, spectare, ex eo, quod cap: 8. postquam predicta fuisset vastatio, quam Assyrie Rex terra Iuda factururus esset, subjungitur in hunc modum: Confringite, seu consociamini populi, & conterimini, & auribus percipite universi longinqui terræ, accingite vos & conterimini, accingite inquam vos & conterimini: Consultate consilium, & dissipabitur; loquimini verbum, & non stabit, quia nobiscum Deus. Est autem in Hebræo, pro Nobiscum Deus, Immanuel. Vnde manifestè apparet, quæ his dicuntur, spectare ad predictionem.

tionem capitū 7. ubi dictum est, puerum illum vocatum iri Immanuel. Atqui apertum simul est, verba, quae modo recitavimus, hunc sensum habere, quod etiam si Rex Assyria, & populus ille, conjunctis sibi aliis (nam cap: 7. fit etiam mentio in hoc proposito Aegyptiorum) terram Iuda planè perdere ac vastare decreturus esset, tamen Deum consilia istorum omnium dispersurum, & propterea puero illi nomen istud Immanuel imponi debuisse, ut significaretur, in tantis terrae Iuda periculis, Deum nihilominus, cum populo illo futurum.

Hæc sunt præcipua, quæ videantur obstare, quominus credatur Evangelistam locum ac prædictionem istam Esaiæ rectè in medium attulisse, ad confirmanda ea, quæ proximè de Christi ortu narraverat. Verumtamen, non est, quod ad hunc modum nos de Evangelista statuamus. Satis enim supra docuimus, nihil incommodi esse in eo, quod una & eadem prædictio apud Prophetas plures quàm unum sensum habeat, præsertim ubi ejus rei indicia satis aperta fuerint, quemadmodum tunc est, cum verba ista sunt concepta, ut omnino alium sensum præ se ferant ac porro contineant, præter illum, de quo tamen constat, in eum verba ipsa accipièda esse, ut quidem hoc in loco evenit. Nam etiam si verissimum sit, totam illam prædictionem, in eum sensum accipièdam esse, qui tēporibus ipsius prædictionis conveniat; tamè ex altera parte, in ipsa prædictione ea verba sunt, quæ non possint sensui isti planè consentanea esse, quæque indicent, alium quendam sensum, toti istæ prædi-

*predictioni subesse. Primum enim cum ibi scriptum sit. Ecce Deus dat vobis signum, Ecce juven-
 cula concipiens &c. satis constare videtur, si-
 gnum hoc à Deo datum, in eo præcipuè consistere,
 quòd juvencula illa conceptura & paritura esset: id
 quod nullo pacto ad sensum illis temporibus accom-
 modatam convenire potest, quamcunque tandem
 fuisse velimus juvenculam istam. Neesse est enim,
 quæcunque illa fuerit, nihil in ejus partu aut conce-
 ptu accidisse, quod mirabile aliquid contineat, &
 propterea tanquam signum a Deo dari potuerit, præ-
 fertim si, in sensu isto illis temporibus accomodato,
 velimus, ut sanè a nobis probatum esse videtur, ju-
 venculam istam non aliam esse posse, quàm prophe-
 tissam illam, de qua cap: 8. verba fiunt, quam omnes
 intelligunt, fuisse ipsius Esaiæ uxorem. Quod si ve-
 rum fuerit siue minus, quanquam id nos verum fuis-
 se credimus, satis est, ad omnem rem mirabilem, in
 conceptu & partu isto excludendam, id quod ibi di-
 fertè narratur, Prophetam videlicet ad illam acces-
 sisse, quæ verba sine ullo dubio, honestè significant, il-
 lum cum ea rem habuisse. Præterea, cum pax illa &
 quies, quæ fuit in terra Iuda, post vastationes illas
 Regum Syriæ & Israël, de quibus ibi nominatim
 agitur, nec non postea etiam Regis Assyriæ, fuerit
 admodum brevis ac dubia, vix videtur ullo modo,
 propter rem eiusmodi tantum, nisi aliud quidpiam
 subesset, puero illi indi debere nomen istud Imma-
 nuel, quod significat apertè ac simpliciter, presentem
 Dei favorem atque auxilium, nisi, inquam, sub no-
 mine*

mine pueri illius, prophetico more, alius quispiam intelligeretur, quo nato, & cujus tempore, verè ac proprie dici posset, Deum cum populo illo esse, & favorem ac benignitatem illi ostendere. Huc accedit, quod cap: 8. disertè dicatur, terram Iuda esse istius, cui nomen erat Immanuel; quandoquidem hæc verba ibidem leguntur: Ideo ecce Dominus ascendere facit super eos aquas fluminis fortes & multas, Regem Assur, & universam gloriam ejus, ascendetque super omnes rivus suos, & ibit supra omnes ripas suas, transibitque, per Iehuda, mundabit & transibit, usque ad collum pertinet, & erit extensio alarum ejus plenitudo latitudinis terræ tuæ Immanuel. Jam qua ratione dici poterit, nisi satù improprie, terram Iuda fuisse illius puelli, de prophetissa natis vel quid attinebat istam apostrophem facere ad eum, qui vocandus erat Immanuel, si ù puellus ille prophete filius futurus esset? Hæc autem non eò a nobis dicuntur, quòd negemus etiam verba & apostrophem istam ad puellum istum accommodari posse, sed tamen improprie, alioquin si nullo prorsus modo posset accommodari, tum nullo etiam modo eis esse posset ille Immanuel; quod tamen jam concessimus, affirmantes interim, alium tamen sensum toti isti prædictioni subesse. Nam quòd quidam, quemadmodum Iustinus in colloquio cum Triphone Iudeo, de ipsis Iudeis sui temporis affirmat, ajunt puerum illum, qui Immanuel vocari debebat, esse Ezechiam, Achazi, qui tunc regnabat, filium, unde consequeretur, me-

tur, meritò ac propriè terram Iuda illius esse, dictum fuisse, cum is eius terre rex fuerit, id nullo modo admitti potest. Quandoquidem, cum Ezechias regnare cepit, iam annorum 25. erat. Achaz vero, cuius tempore predictio ista facta est, regnum per se decem tantum annos tenuerit; aded ut etiamsi velimus in ipso regni Achazi initio, ut quidem verisimile est, ista predicta fuisse, necesse futurum sit ut Ezechias, qui statim rex post patris mortem extitit, tunc iam novem annos natus esset cum ipsa predictio est facta. quomodo igitur Ezechias is puer esse potuit, qui post predictionem istam est natus? Nam quod cap: 8. dicitur: Tolle Damascum &c. quod videtur omnino referendum esse aut ad puerum, de quo ibi agitur, unde concludi posse videatur, puerum istum fuisse regem aliquem, qui ea fecerit quae ibi subiiciuntur, hoc nihil planè est. Nam verbum, Tolle, Hebraica, eaque admodum frequenti phrasi, ita accipiendū est, ut non referatur ad aliquem ibi nominatim, sed supplendum sit, prout ipsi Iudaei supplere solent, eiusmodi phrasi, Is qui tollet, ac si scriptum disertè esset, Is tollet qui tollet, id est, aliquis tollet; quod nos alia ratione dicere possumus ita legendum esse, ac si pro Tolle, scriptum esset, Tolleatur. Ex quo satis constat, quòd sit deceptus Iustinus eo in loco, cuius antea meminimus. Ibi enim cum ista verba ista interpretaretur, ut verbum Tolle, ad puerum illum referendum esset, disputans adversus Iudeos, ostendit hinc apparere, puerum illum non esse Ezechiam, quippe de quo non legatur, quòd ea fecerit.

rit, que ibi subiciuntur, sed necesse esse, ut alius
 quipiam iste puer sit, quem ait esse Iesum Nazara-
 num, accommodans interim ista, que factururus puer
 iste, secundum prædictum sensum verbi Toller, ibi
 prædicitur, aliqua ratione & per figuras quasdam
 ad ipsum Iesum, ut inde concludat, omnino, que de
 conceptu & partu illius, quam ipse virginem omni-
 no nominari vult, in loco isto Esaiæ dicuntur, perti-
 nere ad Mariam matrem Iesu, que virgo adhuc, id
 est, sine ullo viri congressu, ipsum Iesum conceperit
 ac pepererit. Non debuit igitur Iustinus, ad proban-
 dum quod is puer Ezechias non esset, ista sua ratio-
 ne uti, sed illa quam nos attulimus, que demonstra-
 tiva planè est. Ad probandum verò, quod is puer Iesus
 Nazarenus esset, similiter non ratione ista, sed illa,
 quam iam nos exposuimus, utendum illi erat, que sa-
 nè efficax admodum est, si proprietates verborum præ-
 dictionis spectanda sit. Nam valde propriè dicitur,
 terra Iuda esse Iesu Nazareni, cum reverà ipse eius
 sit dominus, adeò ut de nemine alio tam propriè id
 dici possit, ne de rege quidem ullo, qui in ea regna-
 verit. Neque enim perinde Rex aliquis dominus est
 eius regionis, cui imperat, ut Iesus est & terra Iuda,
 & totius orbis, que tamen terra Iuda singulariter i-
 sto in loco ipsius Iesu terra vocatur, ob eam causam,
 quod in ea natus esset, & illam patriam suam agno-
 sceret.

Concludimus igitur, totam prædictionem istam,
 etiamsi aliquomodo accommodari possit, & porro
 accommodanda sit ad alium quempiam præter Ie-
 sam

sum Nazarenum, id est, ut nos quidem credimus, ad puerum illum ex prophetissa & Esaia natum; tamen si proprietatis verborum spectetur, & totius loci atque sententiae, ad ipsum Iesum praecipue ac potissimum referendam esse; praesertim verò ob id, quòd satis aperte constat, Deum dedisse conceptum & partum illius puellae, pro signo mirifico; id enim docent manifestè ipsius Dei verba, cum ait Achazo: Pete tibi signum sive inferius in terra, sive superius in caelo. Haec enim verba omnino indicant, nomine signi, intelligi debere rem aliquam mirificam, non autem indicium quando id futurum esset, quod Achaz cupiebat, ut scilicet ab eo, quod timebat, & ipse, & universus eius populus liberaretur. In hanc siquidem sententiam necessariò accipienda est vox signi, si ad istum alium, praeter Iesum Nazarenum accommodandus sit locus ipse. Verùm posset quis adhuc obijcere, quomodo fieri potest, ut praedictio ista praecipue ad Iesum Nazarenum referenda sit, cum Iesus Nazarenus, eiusque conceptio & ortus nihil pertineat ad id quod Achazus petebat, vel certè desiderabat? Respondemus, quemadmodum & alibi, sic etiam hoc loco, id quod historia ipsa continet, per figuram, ad aliud quidpiam accommodandum esse, ita ut liberatio ista, quam Achazus unà cum suis omnibus expetebat, adumbraret liberationem illà magnā, quam ab omnibus veris inimicis suis populus Israeliticus, quatenus attinet ad Dei decretum atque consilium, per Iesu Nazareni conceptionem atque ortum consecutus est. Quòd si rursus aliquis obiiciat, quaedam in ista

prædi-

predictione dicta, ad ipsum Iesum Nazarenum, e-
 iusq; tempora, minimè accommodari posse, etiamsi
 figurata aliqua ratione omnia interpretemur; Re-
 spondendum est, in predictionibus de Messia, non es-
 se id querendum, ut omnia ipsius predictionis verba,
 ad ipsum Iesum accommodari queant; præsertim ve-
 rò hoc in loco, ubi Evangelista noster, ex ista ipsa
 predictione, de qua agimus, aliud nihil ad Iesum
 Nazarenum accommodat, nisi que in initio ipsius
 predictionis dicuntur, & ad conceptum ortumq; ipsi-
 us Iesu, atque nomen, quo merito vocari potuit ac
 debuit, spectare constat. Nam inter cetera exem-
 pla ac testimonia eius, quod diximus, non esse, in-
 quam, predictiones de Messia eiusmodi, ut earum
 verba omnia, ad Iesum Nazarenum Dei filium ac-
 commodari possint, illud est insigne, quod habetur 2.
 Sam: 7. ubi omnibus, ipsisq; ad eò Iudæis, si non huius
 temporis, certè antiquioris ætatis approbantibus, est
 omnino de Messia predictio in verbis illis: Ego ero
 illi pater, & ipse erit mihi filius. & c: ubi tamen
 ait Deus, se istum ubi deliquerit, non rigidè, sed pæ-
 terna ratione castigaturum. id quod nullo modo ad
 ipsam Dei filium, qui nunquam quidquam deliquit,
 accommodari potest. Sed necesse est, ut tota ista pars,
 ad Salomonem tantùm accommodetur, qui typus i-
 psius Dei filii Iesu Christi fuit, & de quo primo illo
 sensu, quem diximus plerumque subesse in vaticina-
 tionibus veteris Testamenti, omnino tota illa predi-
 ctio accipienda est. Diximus autem suprâ, hoc pro-
 prium esse divinarum, ut obscura sint, nec perfectè in-
 telligi

telligi queant, nisi postquam eventus earum extite-
 rit. Ad cuius rei confirmationem aliquid pertinere
 videtur, id quod scriptum est, Prov: 25. in ipso initio,
 ubi habetur ad verbum: Gloriam seu honorem
 Dei esse, celare verbum, quod, sine dubio, ad hanc
 rem aptissime accommodari potest, ad vaticinationes
 inquam ipsius Dei. Nam alioqui, ubi alterius ge-
 neris Dei verbum habetur, ut cum aliquid iubet at-
 que imperat, cum docet, cum monet, cum arguit &
 castigat, cum breviter vult, de ipsa sua erga nos vo-
 luntate in actionibus nostris nos certos facere, tunc
 aperte loqui solitus est Deus, ita ut quicumque animo
 pio sit præditus, facillimè ea, quæ ab ipso dicuntur, in-
 telligere possit. Scio equidem, nomen verbi, quod ha-
 betur in loco isto Prover. posse ita accipi, (ut quidem a
 plerisque accipitur, neque id etiam a me fieri debere
 negatur.) ut nō ipsa Dei verba, sed rem significet; ut
 sensus sit, honorem Dei esse, celare decreta ac consi-
 lia sua: verum hinc nullo pacto sequitur, quin optimè
 sententia ista ad ipsas vaticinationes accommodari
 possit. Nam si usquam alibi, certè in ipsis vaticinatio-
 nibus agitur de Dei consilio atque decreto. Illud
 certum esse videtur, adeo id verum esse, ut Deus in
prædictionibus suis consueverit obscure loqui, ut Dia-
abolus in responsis, quæ apud Ethnicos dare consue-
verat, obscuritate, quâ in ipsis utebatur, hominibus
non imperitū, neq̄ rerum divinarum penit̄ ignarū
facile persuaserit, responsa illa divina esse. In quo ta-
men Diabolus eos egregiè fallebat; non quidem sem-
per, (nam sæpe Deus permittebat, ut verissima Dia-
 bolus

solus predicaret, non quidem ex sua ipsius scientia, siquidem non est Diaboli futura predicere, sed Dei tantum, ut colligitur aperte ex cap: 41. Esaiæ propheta) sed tantum aliquoties, aut etiam sæpius, non quidem ob eam causam, quòd ille hac ratione vellet suis predictionibus autoritatem conciliare, & interim alioquin sciret cerò quid futurum esset; sed quia ipsemet nesciebat, & propterea verba sua ita concipiebat, ut ad omnem eventum accommodari possent, quod idem observavit Cicero factum esse in carminibus Sibyllinis, quæ propterea ipse nihili facere videtur. Habemus autem duo insignia exempla, talium Diaboli responsorum; unum est, cum Pyrrho Epirotarum Regi respondit; Aio te Æacida Romanos vincere posse; ubi sive Pyrrhus Romanos vinceret, sive Romani Pyrrhum, verum nihilominus prædixisse Diabolus videri poterat. Quamquam præterea, cum in responso isto nõ dicatur quicquam de certa victoria futura, sed tantum (ut sic loquar) de possibilitate victoriae, etiamsi præterea quis dicat, potuisse accidere, ut nec Pyrrhus Romanos, nec Romani Pyrrhum re ipsa vincerent, nihil tamen falsi propterea in responso isto contineri dicimusquam potuisset. Alterum exemplum est, in responso Cræso Lydorum Regi dato, cum adversus Cyrum primum Persarum regem exercitum duceret: Cræsus Halim penetrans, magnam pervertet opum vim: quod responsum, sive Cræsus victus, sive victor futurus esset, non poterat mendacii coargui. Tam enim pervertit Cræsus magnam opum vim, cum

victus a Cyro fuit, quàm si ipse vicisset. Suas enim o-
pes, suamq; potentiam, clade illa sua pervertit, atque
perdidit. Quod autem prædictiones istæ demonum
solerent esse obscuræ, & ad plures sensus accomoda-
ri possent, quemadmodum & ipsæ divine prædictio-
nes, id apertè docet, quòd Apollo ipsarum ferè au-
ctor Loxias propterea est appellatus; quod verbum a-
pud Græcos ab eo derivatur, quod obliquum signifi-
cat. Indicatam est enim nomine isto, Apollinis re-
sponsa consuevisse non recta esse ac simplicia, sed o-
bliqua atque versuta, & sic obscuritate ista involuta,
de qua loquimur.

Addimus autem ad ea quæ diximus, ut osten-
deremus in vaticinationibus veteris Testamenti in-
terpretandis, nemini mirum videri debere, si sæpius
non unus tantum, sed duo vel plures sensus sint se-
quendi, hoc videlicet, quòd apud ipsos Iudeos, qui
maximè aliquando nostris Apostolis & Evangelistis
obloquuntur, ob hanc ipsam rem, quòd aliter accipi-
ant testimonia veteris Testamenti atque ipsa verba
sonant, vel potius aliter, atque tunc, cum prolata
fuerunt, intelligenda fuisse apparet, apud istos, in-
quam, & antiquit°, & nunc maximè receptum fuis-
se, ut in scripturis sanctis interpretandis, sensus qui-
dam subsit, qui non omnino ille sit, quem ipsa verba
ferunt, & hanc rationem interpretandi sacras lite-
ras, quæ apud nos nostrosq; Theologos, in plura capi-
ta dividitur, & unico tamen vocabulo, mystica ra-
tio, & secundum mysticum sensum appellari potest,
ipsi Midras vocant, quod verbum a quærendo ductum
est,

est, contentes, licere præter literalem sensum alium etiam querere, adeoq; affirmare, istum alterum sensum sacris testimoniis subesse. Id tamen verum est, quod nolunt ex isto sensu non literali quidquam omnino ac firmissimè cōcludi atque asseverari posse. Sed neque aliter sanè accipienda sunt verba Apostolorum & Evangelistarum nostrorum, cum ejusmodi sensum commemorant, id est, haud intelligere debemus, illos velle hac ratione firmiter cōprobare ac demonstrare rem ita se habere, ut ipsi dicunt, sed tantummodo est intelligendum, illos ea in parte docere nos velle, atque indicare alterum istum sensum, sacris testimoniis, quæ afferunt, planè subesse.

Antequam verò ad alteram partem, quæ ad historiam pertinet, testimoniorū veteris Testamenti in Novo citatorum accedamus, unum adhuc superest dicendum, quod ad doctrinam spectat circa locum istum, in quo tamdiu jam versamur, Esaie 7. citatum a Matth: Evangelista, cap: 1. Illud est, quod in ipso textu Hebraico, & porrò in Græco, quemadmodum & ipse Mattheus locum citat, est ante vocem illam, quæ $\omega\alpha\pi\theta\epsilon\upsilon$ & id est virgo in Græca translatione legitur, littera, quæ articuli vim habet, sive ipse articulus; unde concludi potest, designari ibi apud prophetam certam aliquam & notam juvenulam. hæc enim est illius literæ apud Hebræos, & apud Græcos articuli vis. Quod si ita est, quomodo, dicit aliquis, potest locus iste accommodari ad Mariam matrem Iesu, quæ non modò tunc ignota erat, sed nondum extiterat? Respondendum est, literam il-

lam Hebraicam, & porrò Græcum articulum, quo illa est reddita, non semper vim istam habere, sed sæpe significare aliquid singulare atque insigne, etiã si non notum antea; & hinc fit, ut apud Hebræos per sepe, cum aliquid commemoratur, quod magnum ibidem vocetur, additur littera illa rei isti, quamvis antea minimè nota. Ex quo consequitur, nihil absurdum esse, si hoc in loco littera illa, non certam aliquam puellam significet, sed singularem quandam, ut certè singularis fuit Maria, mater Iesu. Immo videtur dicendum, significationem illam istius litteræ, ut scilicet rem aliquam notam ac certam indicet, vix habere locum in vaticinatione ista, & in verbo illo Alma, cui preposita est. Nam neque ulli^o iuencula antea mentio ulla facta erat, nec, ad quamcunque tandem nomen illud referatur, pro tempore illo, quo prophetia ista edita est, sive illa sit ea, cum qua congressus est propheta, ut quidem nos statuendum esse demonstravimus, sive quæcunque alia, non apparet ulla ratione, quomodo illa ita nota & certa fuerit, ut ad eam sensus iste, ut ita dicam, relativus atq; indicativus ejus litteræ, accomodari possit.

Sed jam tempus est, ut ad alteram partem, quæ ad historiam sacrorum testimoniorum, in Novo Testamento citatorum, pertinet, accedamus, atque illorum calumniis obviam eamus, qui ajunt per sepe in ipso Vetere Testamento aliter legi testimonia sacra, atque in Novo citantur. Vnde apparere dicunt, falsi aliquid in Novi Testamenti scriptis contineri, ex quo concludi possit, scriptum istum non temere adhibendam

esse fidem. Ut igitur plenè ad calūniam hanc re-
 spondeamus, quæ etiam illud continet, quòd quedam
 citentur in Testamento Novo, quæ non quidem ali-
 ter, sed nullo modo in vetere leguntur, dicimus ad-
 vria animadvertendum esse. Vnum est, quòd Novi
 Testamenti scriptores plerumque sequuntur editio-
 nem Græcam veteris Testamenti 70. interpretum,
 non modò quia ipsi Græcè scribebant, sed etiam, idq̃
 potissimum, quia editio illa tunc temporis, apud ipsos
 etiam Hebræos, in magna existimatione erat, ob id
 videlicet, quòd interpretes isti omnes fuerant natio-
 ne Hebræi. Quare etiam si Apostoli & Evangelistæ
 nostri animadvertebant, aliquam nihilominus esse
 differentiam inter id, quòd Hebræicè legebatur, &
 id quòd Græcè, & certum esset, Hebræicam editio-
 nem esse, ut sic dixerim, primævam, & ex qua
 Græca fluxisset: tamen, ubi differentia ista sensum
 nullum falsum inducebat, nec talis erat quæ pu-
 gnantes inter se istas editiones duas ostenderet, nihil
 sunt veriti, se se interim ad captum & usum sui se-
 culi accommodantes, locum citare, non ut aminino in
 Hebræica, sed ut in Græca editione legebatur. Ex
 quo id saltem necessariò consequitur, illos nulla ra-
 tione falsitatis redargui posse. Adde quòd non desunt,
 qui velint septuaginta interpretum editionem Græ-
 cam, anteponi ipsi Hebræicæ, quippe qui doceant, o-
 mni tempore, aliquid corruptionis à Iudæis malè fe-
 riatis, in suam ipsorum editionem inductum fuisse:
 præsertim post Christi tempora. Vnde rectè conclu-
 ditur, si hodie aliquid inveniatur in Hebræico textu

veteris Testamenti diversum ab eo, quod citatur in Testamento Novo, ubi, ut dictum fuit, habita est eorum ratio editionis septuaginta interpretum, statuendum esse, veram lectionem potius esse eam, quae apud scriptores Novi Testamenti legitur, quam eam, quae hodie in Hebraicis codicibus extat. Alterum, ad quod animadvertendum est, omnino esse debet, quod Novi Testamenti scriptores, non semper id sibi proponant, in veteris Testamenti locis citandis, ut verba ipsa recitent; sed satis habent, si sensum fideliter exprimant, id quod semper & ubique, & licuit, & in perpetuo usu fuit in omnibus scripturionibus, ubi testimonia aliqua aliarum scripturionum referantur, ut videre est apud omnes probatos auctores, & nominatim apud nostros Theologos, qui saepe numero non ipsa verba omnino citant, sed sensum in Testimoniis sacris citandis; licet tamen interim ipsa verba recitare velle videantur. Exemplum, quod ad rem nostram attinet, esto id, quod antea indicavimus, in testimonio illo Deut: 18, citato tum in tertio, tum in septimo capite Actorum Apostolicorum. Nam praeter alia quaedam, quae non omnino & ad unguem ita leguntur in loco ipso, prout a Petro & Stephano recitantur, illud nominatim est, quod ajunt, quasi ibi scriptum esset: Is verò qui non auscultaverit verbis prophetæ illius, exterminabitur. Neque enim ita legitur, neq; in Hebraico, neq; in Graeco codice. Sed tantum dicit ibi Deus; Ego ab isto requiram, seu, in istum vindicabo. Quod tamen si verbi non idem sit cum illo, quod in Novo Testamen-

stamento citatur, intelligendum est tamen, sensu i-
 dem esse. Nam vindicta illa & requisitio, quam De-
 us se facturum minatur, aliud nihil erat, quam i-
 stum, qui propheta illi non auscultasset, perdere. Id
 quod effectus etiam ipse comprobavit, praesertim si
 ad Christum divina illa predictio accommodanda
 sit, ut quidem a Petro & Stephano accommodatur.
 Nam certum est eos, qui Christo non paruerint, ex-
 terminatum iri, Hierosolymitanumq; excidium hu-
 jus rei nobis indicium ac specimen certum prebet.
 Tertium, quod omnino animadvertendum existima-
 mus, est, quod non omnes sacri libri hodie extant,
ex quibus non extantibus, omnino credendum est,
ciata fuisse in Novo Testamento testimonia illa, quae
hodie in libris veteris Testamenti non leguntur; quae
tamen pauca admodum sunt. Quod autem perierint
 multi sacri libri, apparet manifestè ex eo, quod ver-
 borum Nathanis Prophetae, & Gadis videntis sit
 mentio 1. Paral: 29. & 2. ejusdem libri, cap: 9, nec
 non verborum Ibeddonis videntis eodem cap: 9. libri
 2. Paralipomenon. immo non verborum, sed visio-
 nis. Eodem porro capite mentio fit Achiae Silonita.
 Praeterea cap: 12. ejusdem secundi libri Paralip: fit
 mentio verborum Iddonis videntis in Genealogiis,
 & cap: 13. ejusdem prophetae commemoratur Mi-
 drasch. Cap: porro eodem 12 habetur mentio verbo-
 rum Semaiae Prophetae. Insuper cap: 10. libri Iosue,
 itemq; cap: 10. 2. Samuelis fit mentio libri Recti,
 Cap: verò 21 Numerorum, commemoratur liber
 Bellorum Iehova. Quamquam non omnino certum
 est,

est, isto in loco certum aliquem librum significari. Sed præterea apud Esaiam 34. nominatur liber Iehove seu Domini. Postremò omnes sciunt, identidem in lib: 2. Regum fieri mentionem Chronicorum Regum Iude, & Regum Israelis, ad quæ scriptor istius libri sapissimè se refert, & ad ea lectorem rejicit.

His tribus rebus, quas animadvertendas esse diximus, circa id, quod pertinet ad historiam testimoniorum Veteris Testamenti in Novo citatorum, & sic, ut clariùs loquamur, ad fidelitatem pertinet, quâ usi sint scriptores Novi Testamenti in citandis veteris Testamenti testimoniis, bene consideratis & ante oculos perpetuò sibi propositis, facile unicuique erit ad omnes objectiones respondere, quæ fieri scriptoribus istis hac in parte possint. Ex quo fiet, ut quemadmodum in iis quæ pertinent ad doctrinam, expositis quibusdam quæ vice generalis alicuius responsionis esse possint, si quis obiiciat, ea in parte aliquid falsi in scriptis Novi Testamenti reperiri, non omnia & singula testimonia ab illis citata, in quibus locum habeat eiusmodi aliqua obiectio, attulimus atq; expendimus, sed tantummodo pauca quedam, quæ præcipua videntur: sic in hac quoque parte, quæ ad historiam pertinet, faciendum nobis esse duximus.

Et quia postremò de illo testimonio egim^{us}, quod habetur cap: 7. Esaiæ, & citatur a Mathæo cap: 1., ab hoc initium exemplorum huc pertinentium faciemus. Quamvis enim satis multa a nobis disputata sint, quod

quod attinet ad ipsam doctrinam, ut ostenderemus locum istum merito fuisse ab Evangelista ad id comprobandum, de quo ibi agebatur, allatum. Superest tamen adhuc difficultas non exigua, quae ad historiam & veritatem citationis attinet. quandoquidem vox quae virgo legitur apud Matth.: in Hebraeo apud Esaiam vox est quae videtur non propriè virginem significare; ea est, ut dixim^o Alma, videtur enim vox ista juvenulam, sive adolescentulam, seu maxime puellam omnino declarare, non autem propriè virginem. Nomen enim Hebraicum quod propriè virginem significare videtur est bethula seu ut alii pronunciant Befula, ex isto enim nomine deducitur aliud, quod manifesta signa virginitatis declarat. Id autem est Bethulim seu Befulim plurali numero. Vnde videri potest minùs fideliter ab Evāgelista nostro fuisse citatum locum istum, cum ibi istius vocis Alma loco legatur Gracè $\alpha\gamma\delta\epsilon\upsilon$, quae vox virgo latine redditur; sunt quæ hac in re Iudaei Iudaici quæ homines admodum nobis molesti, deridentes & simul calumniantes scriptorem nostrum, qui, ut persuaderet jam prædictum fuisse, quod virgo aliqua sine virili congressu conceptura ac paritura esset, non sit veritus locum istum falsò, ac prorsus infideliter, citare. Atque eò magis quodd, ut quidam asserunt, quamvis aliqui videatur nomen Alma id significare quod diximus, id est puellam, tamen ajunt inveniri locum, ex quo constet istam vocem potiùs significare eam puellam quae deflorata jam fuerit, quam virginem. Locus est Sap: 30. Proverbiorum, ubi dicitur: Tres esse res diffi-

ciles

ciles ad percipiendum, & quartam quæ nullo modo intelligi possit, Tres illæ res sunt, aquilæ volatus per aërem, serpentis gressus super lapidem, & navis transitus per mare. In quibus omnibus videtur constare sensum scriptoris esse, quod in his tribus nullum vestigium prorsus remaneat ipsius rei. Iam quartam rem esse dicit viam viri in alma, quod similiter videtur debere significare, quod ejus rei nullum vestigium remaneat. Quod tamen falsum esse constat, si vocem alma virginem interpretemur, & non omnino eam puellam significare dicamus, quæ jam non sit virgo.

Ad hoc respondendum est ad hunc modum. Si ratio ista vera esset, debere hinc consequi, ut nunquam vox alma eam puellam significare posset, quæ adhuc sit virgo. Nam alioquin non esset simpliciter verum, viam viri in Alma non agnosci, neque eius rei, ullum vestigium remanere. Unde concludendum est, locum istum non esse ita accipiendum ut ratiocinatio ista fert, si probatum fuerit vocem Alma eam puellam significare posse, quæ adhuc sic virgo. Id autem duplici ratione probari potest. & ex ipsius nominis etymo, & ex testimonio Sacrarum litterarum.

Quod ad Etymon sive Etymologiam attinet, vox Alma ab Hebræo verbo deducta est, quod abscondere ac celare significat, unde etiam est factum, ut omnino, quicquid alii dicant, vox ista eam puellam significet, quæ nondum nupsit, ob id, quod innupta puella abscondita, & celata quodammodo est a viris.

Verùm

Verum hæc eadem ratio suadet, ut propria sua signi-
 ficatione declaret puellam illam, quæ nulli viro ad-
 huc sit cognita, de hac enim revera ac propriè dici
 potest, quòd sit ab omni viro abscondita eiq; calata.
 Nam alioqui si de alio genere absconsonis (ut sic di-
 cam) loqui velimus, id non verum esse invenietur
 in e a puella quæ tantummodo innupta fuerit. pro-
 pter hoc ipsum scilicet quòd nondum nupserit. Quan-
 doquidem certum est, apud ipsos Hæbreos, quorum
 est vox de qua disputamus, non fuisse in usu ut ipse
 puella innupta a viris absconderentur. id est, ita con-
 cluse tenerentur, ut a viris conspici nequirent. Certum
 enim est ex plurimis Sacrae Veteris Testamèti Histo-
 ria locis, innuptas puellas nulli, quòd attinet ad con-
 spectum, fuisse absconditas. Id quòd ex eo loco con-
 stat quem adducturi sumus, ut altera ratione, id est
 ea testimonio aliquo sacro, id quòd intendimus, pro-
 bebimus, nempe vocem alma eam puellam significare
 posse, quæ virgo sit revera. Is locus est Genes: 24. ubi
 servus Abrahami, qui missus fuerat ut uxorem Isaa-
 co ejus filio quæreret, Labani, qui ad eum foras exie-
 rat narrans, cur & in quem finem illuc venisset, ait
 se expectasse an fortasse alma aliqua exiret, quam
 uxorem conciliaret filio domini sui. Certum enim
 est servum istum voluisse, ut puella, quæ uxor Isaaci
 futura esset, minimè corrupta ac polluta esset, sed
 integra ac verè virgo. Itaque ex loco isto duo appa-
 rent; unum est quòd vox Alma verè virginem signi-
 ficare potest, de eaq; dici. Alterum est, quòd innupta
 puella sese viris conspiciendas dabans, quòd & tunc
 reipsa

re ipsa factum esse, & non tantum id fuisse quod servus Abraami speraret, id futurum ex eo apertissime probatur quod in illa historia antecedit, nempe, quod Rebecca jam foras exierat, & cum servo isto Abraami jam locuta fuerat. Nam quod aliqui ex eo concludere volunt vocem Alma omnino virginem significare, aut significare posse, quod Rebecca que in ista historia alma appellata fuerit, eadem ibidem dicitur dicatur fuisse Besula, id est virgo, que nulli viro adhuc cognita fuisset, hoc nunquam, a praestantissimis licet viris in medium allatum, non videtur esse recipiendum. Quandoquidem minus verum est Rebeccam in historia illa Almam fuisse appellatam. fuit enim tantummodo in narratione appellata illa Naar, que vox puellam simpliciter significat; Vox enim Alma que semel ibi legitur, non ad Rebeccam appellandam prolata fuit, sed tantummodo a Servo illo Abraami dicta, cum exponeret se expectasse ut puella aliqua exiret.

Cum igitur ex his que diximus satis constet, nomen Alma eam significare posse, que verè virgo, fit, sequitur, ut ante diximus, Prorsus locum non esse via accipiendum, ut nostri Evangelistae calumniosiores volunt. Falsum enim dixisset auctor ille inquitens, ut isti placet, viam viri in Alma cognosci non posse, si Alma eam etiam significare posset, que nondum corrupta fuerit. Iam quod non possit sensus istius loci prorsus is esse quem Iudaici isti homines dicunt, apparet ex eo, quod ibidem statim sequitur: Sic etiam, inquit auctor ille, in muliere adultera evenit, qua

qua comedis, & absterfo ore dicit; Non sum operata iniquitatem. Vbi honestis verbis scriptor ille significat, non posse mulierem adulteram sui adulterii semper convinci. Itaque apparet superius non fuisse mentionem puellæ alicujus jam defloratæ, id est, quæ omnino ponatur esse talis. Nam alioqui exemplum quod subjicit mulieris adulteræ, nihil differret, ab exemplo isto superiore. Hinc contrarium sequi necesse esse, (ommissis aliis diversis interpretationibus, quæ a variis ad hunc locum explicandum afferuntur) ut sensus loci sit, cum aliqua innupta puella apud suos adhuc existit, de qua queratur, ut matrimonio collocetur, & quidem ut virgo marito tradatur, vel virgo esse ab omnibus existimetur, an virgo revera necne sit cognosci non posse, non quidem omnino, sed scilicet quatenus ex aspectu exteriori, cum illa sese visendam hominibus præbet, deprehendi potest, quod & verissimum esse, nimis multa exempla sapius ostenderunt; cum sapius evenit, ut ea quæ virgo esse credebatur, talis esse haud inventa fuerit.

Satis probatum a nobis esse videtur vocem Hebraicam Alma virginem etiam significare posse: quippe quod proprie innuptam puellam significet. Sed dicit aliquis: Quid tum postea? Consequitur quidem ex hoc non posse Evangelistam omnino falsitatis accusari, quod pro voce ista Græcam substituerit, quæ virginem proprie declarat; sed in eo nihilominus videtur reprehendendus, quod vocem æquali significationis non substituerit. Ad hoc respondendum est

Evangelistam locum citasse ut in editione 70 interpretum legebatur. Nam 70 illos interpretes vocem $\pi\alpha\rho\theta\acute{\epsilon}\nu$ & isto in loco posuisse apparet, non dicam ex ipsa Græca editione, quam hodie habemus, nam multi sunt qui dubitant, ejusque rei causas multas habent, an editio Græca, quâ hodie vulgo utimur, sit illa 70 interpretum, præsertim exceptis libris quinque Moysi: sed apparet idem aliunde, nempe ex sacris Scriptoribus antiquis, qui testantur 70 interpretes vocem istam eo in loco habuisse. Inter quos antiquissimus ferè omnium, quorum ad nos scripta devenerunt, est Iustinus, qui in colloquio cum Triphone Iudæo id disertè testatur, addens, quod non levis rationis loco esse potest, ad probandam vocem Alma virginem significare: addens inquam, ex ista 70 illorum interpretum editione, satis constare posse, propriam significationem vocis illius esse, ut virginem declaret. Cur enim, inquit, interpretes, qui Hebræi natione erant, & aliquot seculis ante Christum exhibitum extiterunt, ausi fuissent, in loco isto pro voce Alma, virginem reponere.

Est autem præterea animadvertendum propterea nullo modo posse Evangelistam nostrum falsitatis condemnari, quia ipsa Græca vox $\pi\alpha\rho\theta\acute{\epsilon}\nu$ &, que propriè eam significat, que nullidum viro cognita fuerit, quemadmodum & vox ipsa virgo: sæpius tamen apud bonos auctores, idem valet quod innupta puella, sine ulla consideratione ejus an fuerit nec ne viro cognita. Cujusce rei in ipso Novo Testamento testimonia habere videmur, ut apud Paulum Apostolum

Stolum Epist. 1. Cor: 7. ubi aliquoties $\pi\alpha\rho\delta\epsilon\upsilon\sigma$ seu virginis sit mentio, cum expressa significatione innuptæ puellæ, & que nec vidua nec maritata sit, nullo habito respectu an corrupta an integra sit, idem nihil ad Pauli propositum faciebat, & apud Latinos probatissimos scriptores valde frequenter nomen virgo aliud nihil quàm innuptam puellam declarat, mulierique opponitur; quod nomen aut viduam aut maritatum significare solet. Itaq; etiamsi Evangelista noster, non habuisset sibi præeuntes 70. illos interpretes, tamen non immeritò, pro voce Alma Hebraica, vocem Græcam $\pi\alpha\rho\delta\epsilon\upsilon\sigma$ substituisset; præsertim cum, ut antea ex vocis istius Hebraicæ etymologia potissimùm ostendimus, verisimile sit vocem istam, propriè ab initio significasse puellam nulli dum viro cognitum, sed postea, ut diximus apud Græcos & Latinos factum esse, pro innupta puella usurpatam fuisse: nempe quia tales puellæ integre atque incorruptæ esse censentur. Atq; hæc ipsa mutatio quodammodo significationis in voce planè idem polente animadverti potest, in multis aliis linguis, quæ hodie vernaculæ sunt.

Sed adhuc difficultas quedam restat, ad quam nullo modo connivere debemus. Dicit enim meritò quispiam, quomodo, si vox ista propriè, ut conijcere possumus, virginem significat, & pro innupta puella passim usurpatur, poterit constare id quod supra a nobis dictum est, cum fassus sumus prophetiam istam Esaiæ, primo quodam sensu ad alium puerum, atq; ad aliam puellam pertinere, præter Iesum Nazare-

num & ejus matrem Mariam, nempe aliam istam puellam esse Prophetissam illam, de qua in sequente cap: dicitur, quod Esaias ad illam accesserit, unde factum sit, ut ea conceperit ac pepererit filium. Nullo enim pacto dicendum est, prophetissam istam aliam fuisse quàm uxorem ipsius Esaiæ, quemadmodum omnes uno ore testantur. Quod si Esaiæ uxor erat, certè innupta puella non fuit.

Ad hoc respondeo Nō valere consecutionem istam. Nam optime fieri potest, ut, cum prophetia ipsa extiterit, prophetissa ista tantum desponsata Esaiæ esset. puella verò antequam nuptiæ fiant, etiam si jam desponsata fuerit, tum non modo innupta adhuc est, sed etiam virgo appellatur, quemadmodum ipsa Iesu mater, quamvis jam desponsata Iosepho fuisset, virgo tamen appellatur. Notandumq; est, quod non sine magno mysterio necesse est vaticinationem istam talibus verbis fuisse conceptam, neque dictum fuisse aliquid, quod manifestè Esaiæ desponsatam puellam significaret, sed & simpliciter puella nomen ibi fuisse expressum, & ea voce que virginem etiam significare possit, nempe ut ad Mariam Iesu matrem, que verè virgo existens, neque ob id esse desiens, Iesum ipsum concepit ac peperit. Postremò animadvertendum est, nulla prorsus ratione posse Evangelistam nostrum, damnari tanquam eum qui aliter locum citaverit, atq; in ipso fonte habeatur, præsertim propter vocem istā, que apud ipsum $\pi\alpha\rho\delta\epsilon\upsilon$ & legitur. Neque enim ille disertè ait se propter istam vocem locum attulisse, & ex ea voce constare jam prædictum fuisse,

fuisse, quod virgo, virginitate non pereunte, conce-
 ptura ac paritura esset, sed tantum ait, tunc imple-
 tam fuisse prophetiam istam, Quamvis enim dicat:
 Totum autem hoc factum est &c. nihil cogit,
 cum ipse id non expresserit, omnino statuere, quod il-
 le istius rei predictionem in ipsa vaticinatione exti-
 tisse affirmet. Satis est enim, si, quemadmodum in va-
 tinatione ista predictum fuerat, quod ea puella
 que innupta erat, postea conceperit ac pepererit, &
 quidem talem filium qui Emmanuel merito uoca-
 ri possit, Quemadmodum sine dubio de Iesu Nazare-
 no constanter potest affirmari. & sine ulla compara-
 tione, magis quam de alio ullo, qui vel jam extitisset,
 vel extiturus esset. Est autem animadvertendum pro-
 pter id quod diximus de innupta puella, quod videat-
 ur satis esse ad confirmandum id, propter quod locus
 iste a Matth: allatus fuit, quod ipse Evangelista di-
 sertè subiecit, Mariam, cum Iesum peperit, peperisse
 filium suum primogenitum. Nam certè, si innupta
 usque ad id tempus fuerat, cum ab Angelo illi nun-
 ciatum est de conceptu & partu isto, sequitur fili-
 um istum fuisse illius primogenitum, vel potius
 non potuisse ejus primogenitum tam constanter ac
 certè appellari, quemadmodum fit, cum certum est,
 antea illam nulli alii nupsisse. Concludimus igitur
 cum apud 70. interpretes, quorum editio veneranda
 quodammodo tunc temporis erat, ita legeretur, què-
 admodum ab ipso citatus est locus, nullo pacto posse
 Evangelistam falsitatis accusari, etiamsi non essent
 alia causa ulla, cur vox ista Hebraea ita accipi debe-

ret ut in ista editione accipitur. Quæ tamen aliquot a nobis sunt allata, quibus quilibet non contentiosus contentus esse debet.

Nunc igitur ad alia essentialia transeundum est, ubi videantur Novi Testamenti scriptores peccasse, quatenus ad historiã attinet, in citandis dictis ac testimoniis veteris Testamenti. Secundum igitur exemplum faciemus, id quod 2. cap: ejusdem Matth: ad finem legitur, nempe Iesum Mariæ filium, in oppido Nazareth educatum fuisse, ut impleretur id quod a prophetis dictum erat, Quod Nazareus appellari deberet. Quandoquidem nullo modo apparere videtur, quomodo istud a prophetis prædictum fuerit, neq; enim id usquam legitur. Respondendum est. Primum, ut jam dictum fuit, non pauca prophetarum scripta, quæ probata erant, & citantur in ipsis libris veteris Testamenti, perisse. In quibus facile fieri potest, ut testimonium istud disertè extaret. Præterea non desunt aliæ responsiones, ex quibus intelligi possit, cur, etiamsi testimonium istud apud Prophetas disertè non legatur, tamen & verè & rectè Evangelistam nostrum locutum fuisse constet, est quæ libellus editus a Ministro quodam, ut vocant Evangelico, cujus nunc omnino nominis non recordor, in quo plenissimè de ista una re disputatur, & ostenditur, quomodo meritò ejusmodi testimonium ex prophetis ab Evangelista nostro citari potuerit. Quem libellum si haberemus, non dubito quin inde plus satis intellecturi essemus rem ita se habere; sed quando illo destituimur, oportet nos ex aliis & alia ratione quæ-
rere,

rere, quomodo id verum sit, quod in libello isto tam aperte probatur.

Sunt autem tres circa hanc rem precipuae sententiae, quarum meminit Flaccius Illyricus in sua Clave scripturae, in voce Nazareus. Prima est, quod dicatur in prophetis praedictum, quod Nazareus Christus vocandus esset, propterea quia inter alios, qui typi ipsius Christi fuerunt, Samson sine dubio est qui Nazareus fuit, id est voto illo obstrictus, de quo satis abunde apud Mosen legitur. Secunda est, quod Nazareus propterea in prophetis dictus fuerit Christus, quia Nezer, nominatim ab Esaia cap: 11. appellatus, quae vox Hebraica surculum significat. Inquit enim Esaia cap: 11. in ipso initio, Et egredietur Nezer, id est surculus ex radice Iesse &c. quae vaticinatio sine ulla controversia ad Christum pertinet. Tertia est, quod propterea Nazareum vocatum iri Christum a prophetis praedictum fuerit, quia ab ipsis non uno in loco fuerit praedictum, quod Christus sanctus futurus esset. Nazarei autem, id est ii qui votum illud habebant, sancti Deo erant. De quibus singulis aliquid nobis dicendum est, & interim hac tota de re sententia nostra aperienda.

Quod attinet ad primam sententiam, circa interpretationem huius loci, ad ostendendum quod merito, etiamsi id scriptum nunquam fuisset, poterit Evangelista noster dicere, praedictum a Prophetis fuisse, quod Christus Nazareus vocandus esset, dicimus illam non paucas habere objectiones. Una est quod non habemus ullum apertum testimonium un-

de concludi possit Samsonem Christi typum fuisse. Sed ad hoc potest responderi, non esse necesse ut tale testimonium habeamus, sed satis censi debere, si, quemadmodum à multis præstantibus viris factum est, ostendatur meritò posse affirmari, Samsonem typum Christi fuisse. Altera obiectio est, quòd dicit Evangelista prædictum fuisse id per prophetas, cum tamen liber Iudicum in quo Samsonis historia habetur, sit liber historicus non autem Propheticus, Ad hanc obiectioem respondetur, libros Historicos Veteris testamenti aliquando Prophetarum nomine appellari, ob id nimirum quòd in ipsis multa nihilominus prophetica continentur, sive expresse per aliquem Dei spiritum prædicta, sive alia ratione ibi adumbrata, quod prophetie ac prædictionis genus censi debet. Ipse sanè Christus apud Lucam cap: 24. videtur totam Veteris Testamenti scripturam, in legem Moysi, Prophetas, & Psalmos divisisse, cum ait oportuisse impleri ea omnia, quæ in istis scriptis de eo scripta fuerant. Certum est, ut dixi, in ipsis libris Historicis multa prædicta fuisse. Adde & de ipso quoque Christo est huiusce rei testimoniù, valde insignis locus ille 2. Sam: 7. Ego ero ei in patrem & ille erit mihi in filium, quod disertè ab auctore Epistole ad Hebr: ad Christum accommodatur. Sed rursus ex hoc eodem quòd Evangelista dixit, dictum id fuisse per prophetas, tertia emergit obiectio: cum unus tantùm locus asseratur ad interpretationem istam stabiliendam. Quare videri potest debuisse Evangelistam dicere per Prophetam, non autem per

Prophetas. Ad hoc facillima est responsio, cum id sit tam tritū, quàm numeri pro numero usurpatio. Huc accedit quòd illa verba, per Prophetas, ita merito accipi possunt ac si dictum fuisset, in libris prophetarum; id autem semper verum esse censebitur, etiamsi in uno tantum loco apud prophetas scriptum inveniatur. Potest autem huic objectioni alio etiam modo responderi, si ad interpretationem istam primam addatur, quòd Samueletiam, qui multa habet, unde possit statui eum fuisse Christi typum, Nazareus fuit, ut colligitur ex cap: 1. secundi libri Samuelis.

Adhuc quarta obiectio est, quæ pluri sit quàm alie relique, id est, quòd nomen civitatis Nazareth: scribitur per litteram Zade apud Hebræos: nomen verò Nazareni per litteram Zain. Nam vel ex hoc solo videntur Tremellius & Iunius in annotationibus suis in locum istum conclusisse, non posse interpretationem, aut aliam quamlibet, quæ nomini Nazarei, quatenus hominem voto illo obstrictum significat, rationem habet, ullo modo sustineri. Ad objectionem hanc respondebimus, ubi agemus de tertia interpretatione quam attulimus.

Quod igitur attinet ad secundam interpretationem, ut scilicet Christus Nazareus vocatus fuerit ex predicatione ipsa prophetarum, quia videlicet Nezer in sacris literis appellatur, ut apud Esaiæ cap: 11. quæ interpretatio caret objectionem ista, quam proximè adversus primam interpretationem attulimus, quandoquidem vocabulum istud Nezer, non minus per Zade scribitur, quàm nomen oppidæ

Nazareth: ex quo etiam factum est, ut iidem Tremellius & Iunius statuerint, ad appellationem istam Nezer omnino Evangelistam nostrum respexisse. Quod attinet, inquam, ad secundam istam interpretationem, objici illi potest, quod non aliquoties, ut quidam, qui ea afferunt, affirmant, sed semel tantum in predicto Esaie loco appellatio ista habetur. Secundò potest objici, quod ista appellatio, cum sit planè Metaphorica; (Surculum enim, ut diximus, significat, & ibi appellatione ista Christus dicitur surculus, qui ex radicibus Iesse fructum daturus esset,) non videtur posse ad Christi appellationem, quatenus Nazareus vocatus est, ullo modo accommodari. Non conabor autem, ut ad has duas obiectiones quidquam respondeam, cum, ut verum dicam, ea interpretatio mihi probari non possit.

Restat igitur ut de tertia aliquid dicamus, quòd scilicet Evangelista non dubitarit dicere per prophetas dictum fuisse, Christum vocatum iri Nazareum, eò quòd ab ipsis predictum fuisset, Christum fore eiusmodi, ut verus Nazareus, id est sanctus Deusq; consecratus, meritò dici posset. in quo illud animadvertendum est, ut Beza quidem in hunc locum annotans animadvertit, quòd Evangeliste verba ita accipi possunt, quasi non ipsa Prophetarum verba, sed sententiam tantum referant. Est enim apud ipsum, ante verba illa Nazareus vocabitur, vocula Græca $\nu\alpha\zeta\alpha\tau\epsilon\iota$, quæ Latinè reddita est Quòd. Tametsi enim particula ista aliquoties abundare solet, tamen nihil cogit, ut dicamus, id in hoc loco evenire. Sed re-
spon-

spondendum est, postrema isti obiectioni, quam fecimus interpretationis primæ de littera Zain & Zade Primum igitur dicimus, non omnino constare nomen oppidi Nazareth, scriptum antiquitus ab Hebræis fuisse, non per litteram Zain, ut nomen Nazaræi scribitur, sed per litteram Zade. neque enim oppidi istius ulla fit mentio, in libris Veteris Testamenti, qui in Hebræo sunt canone, tantummodo ad id probandum assertur scriptura Syriaci textus in loco Novi testamenti. Deinde respondetur tantam esse cognationem istarum duarum litterarum apud Hebræos, ut nihil videatur esse absurdi, si Evangelista hujus minutissima rei rationem non habuerit. nihil enim certius est, quàm similes, & eiusdem serè potestatis apud Hebræos litteras, sapius invicem commutari; id omnino videtur interpretationi isti favore, ut scilicet Evangelista ad Nazaræi appellationem, quæ hominem Deo consecratum omnino significet, omnino respexerit. quòd in hoc ipso loco Græcè habemus, non Nazarenū, sed Nazaræum. ex oppido enim illo deducta appellatio, omnino videtur requirere, ut Nazarenum, non autem Nazaræum dicamus. unde etiam factum est ut in Latina vulgata editione, alibi fortasse semper, quamvis in Græco Nazaræus habeatur, Nazarenus tamen legatur; ut, quod loco omnium esse potest in ipso titulo Christi, cruci imposto exponendo, factum videmus. Illud certissimum, est cum id nomen Christo in Sacris litteris tributum, valde sæpe legatur, tamen ter tantam aut quater legi in Græco Nazarenum, & alibi per-

perpetuò Nazaræum. Quanquam ipsa Græca appellatione Nazaræum habet, sed hoc nullius planè est momenti, & omnino sum persuasus, quamvis ob librorum penuriam id nondum invenerim, nomen istud, quatenus hominem Deo consecratum significat, Nazaræum fuisse à Græcis scriptoribus prolatum. Ad confirmandam verò istam interpretationem, quæ ex voce & nomine isto sumpta est, id etiam pertinere videtur, quòd Nezer unde Nazaræi sunt dicti, invenitur significare coronam, aut tale aliquid quod in capite gestaretur. Unde videtur eleganter appellationem inde ductam Christo accommodari potuisse, cum is verè corona ornatus sit, & ea potestate præditus, quam gestamen istud capitis significare potest. ut inter alios omnes hanc potissimum ob causam excellat, atque excellens sit.

Quòd si quis tamen plurimùm hæreat in interpretatione ista, propter unius litterulæ diversitatem, videat, an fortassis quarta interpretatio addi possit, quam ego quidem apud neminem adhuc inveni. Ea est, quòd dicamus istam appellationem Christo fuisse tributam, & miro Dei consilio factum esse, ut is in oppido Nazareth educaretur, unde Nazaræus vel potius Nazaræus vocaretur; eo, quòd sine ulla controversia ipse Servator noster fuerit. Nam verbum Nazar Hebraicum, idq; per Zade scriptum, non minus quàm oppidum Nazareth, servare significat, & Deus ipse nomine ex hoc verbo ducto, & in libro Iobi cap: 7. 20, & in Salom: Proverb: 24. 12. modò servator hominum, si rectè memini, modò servator ani-

marum appellatur. Certum est autem non tantum Christum fuisse revera & esse servatorem nostrum, sed etiam id predictum per prophetas fuisse, ut inter alia loca fidem faciunt 23. & 33. cap. Jeremia. Vtroque enim in loco disertè scriptum est, tēporibus illius insignis regū, quem inibi Deus promittit, quiq; sine ullo dubio Christus est, servatum in iudam, & alia multa adduntur, ex quibus intelligitur, quamvis nomen Servatoris, aut servandi verbum expressum non fuerit, debuisse id existere, ut per regem istum salus populo Dei pareretur. quemadmodum & idem Evangelista noster testatur, cum ait Iussu Angeli impositum ei fuisse nomen Iesus, quia si servaturus esset populum a peccatis suis. Et hæc quidem satis esse volumus, ad ostendendum, etiamsi verum esset nusquam predictum fuisse a prophetis, Christum Nazareum vocatum iri, quod tamen nō concedimus, cum, ut dictum est, multi Sacri libri, in quibus variocinationes continebantur, perierint, tamen nullo pacto inde sequi, non rectè dictum ab Evangelista fuisse, ut impleretur quod per prophetas dictum fuerat, quòd ille Nazareus vocari deberet, Hoc tamen postremo addemus non esse oblivioni tradendum, quòd phrasi Hebraica idem sæpissimè significat Vocari quòd Esse, ex quo maximè via aperitur, ad omnes objectiones diluendas, quæ isto in loco Evangelistæ nostro fieri possunt.

Decreveram jam hic finem facere disserendi de hoc loco, quòd Nazareus vocabitur, sed postea aliquid inveni, unde adhuc cogor de vera istius loci

inter-

interpretatione verba facere. Et miror sanè, nec Be-
 zam in suis annotationibus, nec Tremellium & Iu-
 nium, nec Matthiam Flaccium Illyricum, quos ta-
 men auctores ego habeo qui in locum istum quid-
 quam scripserunt, ullam hujusce rei disertam fecisse
 mentionem. Tantùm inveni modò, in Expositione
 Ecclesiastica, quam vocant, Novi testamenti a Mar-
 lorato edita, id quod dico commemorari. Est autem
 illud, Quòd Iosephus Iacobi Patriarchæ filius, qui sine
 ulla controversia multis de causis Christi typum ges-
 sit, disertè ab ipso ejus patre, in illa eius prædictione
 de omnibus & singulis suis filiis, quæ habetur Gen.
 49, dicitur Nazareus fratrum suorum. idem repeti-
 tur quodammodo a Mose, in sua itidem prædictione
 de tribubus populi Israelis cap: 33. Deuter. Ex quo
 ita concludere possumus, meritissimò ab Evangelista
 nostro dictum fuisse, per prophetas prædictum esse
 Christum vocatum iri Nazareum. Ad eò ut mirum
 videatur, tot præstantes viros in invenièdo, quomo-
 do id meritò noster Evangelista dicere potuerit, tan-
 to opere se torfisse, cum res admodum clara & aperta
 esse videatur. Fuit autem Iosephus dictus in hisce
 duobus locis (quorum utriusque auctor est propheta
 Iacob, siquidem ut propheta eo in loco loquitur, (de
 Mose verò quin propheta fuerit nemo dubitat) ita aut
 meritò Mattheus numero plurali dicere potuerit, a
 prophetis dictū id fuisse quod ait.) Nazare^o fratrum
 suorum, quia erat tanquam princeps suorum fra-
 trum, quos, & patrem unà cum ipsis, a morte quo-
 dammodo liberaverat, paverat, soverat, quosq; om-
 nes

mnes dignitate, potentia, scientia, apud omnes gra-
 tia longissimè superabat, ita ut inter ipsum & illos
 harum rerum ratione vix ulla esset comparatio. Est
 enim vox ista Nazareus ut antea diximus, a Nezer,
 quod coronam significat, deductum. Quamvis, qua-
 tenus illū significat, qui Deo nominativè consecratus
 esset, possit à verbo Nazar, quod separare significat,
 deduci. Quamquā non desunt, & quidem iudicio meo
 meritò, qui velint & Nezer, quatenus coronam si-
 gnificat, ab isto verbo quod separationem declarat
 deductum esse. quandoquidem corona, vel gestamen
 aliquod insigne in capite, efficit, ut separetur quis
 & distinguatur per præcellentiam ab aliis. Illud est
 certum, in hisce duabus Iacobi & Mosis prædictioni-
 bus, cum Iosephum fratrum suorum Nazareum vo-
 cant, mentionem fieri alicujus rei, quæ quodammo-
 do super verticem Iosephi esset, unde Nazareus vo-
 catus fuerit. Hac verò quæ non videat quantopere ipsi
 Christo conveniat, qui fratrum suorum, id est, ipsius
 Christi & Dei fidelium, & princeps & Servator,
 & præ illis tanta excellentia in rebus divinis omni-
 bus præditus, ut vix cum illo ulla ratione comparari
 possint. Cum igitur Ioseph, qui manifestè typum Chri-
 sti gessit, Nazareus vocatus fuerit, cum Samson,
 qui similiter, quamvis non ita plenè, aliqua tamen
 ratione Christi typus fuit, Nazareus, id est Deo con-
 secratus, ab ipso matris sue utero fuerit, & nomine
 isto disertè in Sacris litteris insignitus, cum denique
 & ipse Samuel, qui et ipse, ut dictum fuit, Christi ty-
 pum aliquomodo gessit Nazareus similiter, simul atq̃
 natus

natus est sacer factus, a suaq; matre Deo consecratus, nulli dubium esse potest, quin omnino statuendum sit, & predictum & adumbratum fuisse in prophetarum scriptis, Christum debuisse vocari Nazareum. In quo & illud observandum est, quod tres isti Iosephus, Samson, & Samuel paulo minus quam miraculose nati esse videntur, Immo in Sāsone & Samuele miraculose id factum merito dici potest. cum utriusque mater sterilis esset. In Iosepho verò, etsi non verè per miraculum, tamen non longè id ab eo factum est. Rachel enim ejus mater per satis longum tempus non concipiebat, & ut ex historia colligi potest, precibus à Deo impetravit, ut conciperet, & sic primogenitum suum filium Iosephum habuit. Hac enim in re isti omnes tres, cum Christo aliquid commune habuerunt, quod omnino miraculose natus est, & primogenitus suae matris fuit. Nihil hinc repetam de differentia illarum duarum litterarum, quae videatur impedire. quominus quis in hac interpretatione acquiescat. Ea enim et levissima res est, & jam plus satis de ea dictum est superius, & ostensum nihil eam curari debere.

Iam igitur ad alia exempla transeamus, ubi videantur scriptores N. T. in loco aliquo ex Vetere Testamento citando, falsi aliquid dixisse. Occurrit igitur, post jam explicata exempla, id quod legitur Matthaei 27. Idem enim Evangelista noster predicto in loco, cum vellet ostendere id, quod factum est de Christo prodito a Iuda 30. argenteis, quos postea ipse Iudas projecit in templo, ex quibus emptus est ager figuli in sepulturā
pere-

peregrinorum, cum inquam ostendere vellet, hoc totum prædictum esse, ait: Tunc impletum esse quod dictum est per Ieremiam prophetam &c. Primum enim hîc falsò citatur ab ipso propheta Ieremias; cum apud eum nihil tale legatur, quod huc accommodari possit, sed tantum apud Zach: cap: 11. Verum responderi potest duplici ratione Primum non esse falsitatem appellandam, ubi non modo lapsus tantum memoriae esse potest, sed etiam is lapsus nihil rem mutat, & nihil falsi, quod attinet ad rem ipsam, de qua queritur, omnino inducit. Queritur autem hîc, an id quod evenit circa Christum, prædictum aliquo modo a propheta aliquo fuerit. Quare sive is propheta Ieremias sive Zacharias fuerit, nihil planè refert, modo alioqui constet, id prædictum fuisse. Sed quia non pauci ab eo abhorrent, ut Evangelistæ nostro, vel cuiuspiam alii Novi Testamenti scriptori, lapsum eiusmodi memoriae, quamvis levisimum ullo modo tribuant, tamen si non defuerint ex veterioribus & religiosioribus patribus, qui id hoc in loco fecerint, possumus alia ratione ab omni culpa & errore, falsitatisve suspitione Evangelistam nostrum vindicare, ed quòd in Editione Syriaca, quæ antiquissima est & multum in locis, in quibus variè contingit verba aliqua legi, maximum adjumentum ad veram lectionem inveniendam præbet, nullum in isto loco alicujus prophetae nomen habetur, sed tantum dicitur quod dictum est per Prophetam. unde etsi in Græcâ & Latinis codicibus nomen Ieremie expressum legatur, id accidere potuit ex eo, quòd quæ in margine nomen

pro-

prophete a scripserit in Græco textu, unde latinus fluxit, posueritq; nomen veri prophete, hoc est Zacharia, sed per compendium scripta tantum prima littera que Ζηττα est, & extrema diphtongo δ; compendiosè enim scriptura ista Ζεττα significare potest, id quod librari^o aliquis animadvertens, crediderit id in textum transferendum esse, & simul pro Ζηττα Ιωττα legerit. Nam cum Iota compendiosa eadem scriptio Ιεπεμυδ significabit, id quod ipse in ipso textu scripserit, eo magis quod apud ipsam Ieremiam cap: 32. aliquid habetur de agro empto, Iehove seu Domini iussu; quod facile potuit ab aliquo, qui rem diligentius non perpenderit credi, illud esse quod citare voluit Evangelista noster, apud quem & agri empti, & Domini iussus fit mētio, quamvis locus iste Ieremie alioqui nil ad rem faciat. Itaque satis constare videtur nullam causam esse, cur Math: ob istam causam, quod in græcis & Latinis codicibus nomen Ieremie apud ipsum isto in loco habeatur falsitatis ullius damnari possit. Sed in ipso loco qui apud Zachariam extat loco predicto, & quem sine dubio Matheus intellexit, citando, multo magis videtur falsitatis suspicionem incurrere, admodum enim diversè ibi scriptum est, ab eo quod a Matthæo citatur. Sic enim ad verbum predicto capite 11. Zacha: v: 12. incipiendo legitur, secundum quidem Hebraicum contextum: Et dixi ad eos, Si bonum in oculis vestris [est] afferte mercedem meam, & si non, cessate. Et appenderunt mercedem meam 30.

am 30. argenteis, & dixit Iehova ad me. Projice illos, (seu potius illam, scilicet mercedem) ad figulum, magnificentiam gloriae, qua appreciatus sum ab eis. Et tuli 30. argenteos, & proieci illud, id est illos in domum Iehovæ ad figulum. In loco verò Evangelistæ, Matth: inquam 27. v: 9, & 10. sic habent græca verba: Et acceperunt triginta argenteos præcium æstimati (seu appreciati,) quem æstimaverunt; seu appreciaverunt a filiis Israël, & dederunt eos in agrum figuli, quemadmodum constituit vel potius præcepit mihi Dominus. Nemo non videt, arbitror, quantum opere distent verba Prophetæ a verbis Evangelistæ, undè merito videri posset, falsitatem aliquam ab Evangelistâ commissam fuisse, in testimonio isto recitando, ut nihil dicamus, quod non videtur hoc testimonium, quicquã facere. neque enim id pertinet ad præsens caput objectionum, quæ sunt scriptoribus Novi Testamenti in citandis testimoniis veteris, hoc est, non pertinent ad historiam, sed ad doctrinam, & sic ad caput superius. quãquam, dum conabimur nostrum Evangelistam vindicare a suspitione falsitatis, eodem tempore apparebit, quomodo nihilominus, ut aliter prima fronte videatur, locus ad rem, de qua Evangelistâ agit, omnino accommodatus sit; ius præsertim animadvertens ac servatum, quæ in capite superiori animadvertenda etiam & servanda diximus, in ejusmodi indagatione. Sed ad propositum nostrum revertendo, dico primum, facile credi posse in Græca 70. interpretum editione, aliter atque nunc in Hebraico textu legitur, lectum

Evangelista tempore fuisse. Nam Græca editio quam hodie habemus, præsertim in prophetis, quicquid multi contra sentiant, non esse videtur ullo modo eadem, cum editione illa 70. interpretum. Quare nihil mirandum est, si quemadmodum cum Hebræico textu, sic etiam cum Græco quem hodie habemus, id quod Evangelista noster recitat, minimè consentiat. Iam enim dictum est, scriptores Novi Testamenti Græcè scribentes, græcam quidem editionem admodum frequenter secutos fuisse, sed non quamcumq; (erant enim plures) sed eam quæ erat majore in præcio, ea autem, ut antea diximus, erat ista 70. Interpretum. Meritò igitur credere possumus, in editione ista ita lectum fuisse, ut ab ea lectione nihil aut parum discreparet id, quod a Mattheo hoc in loco recitatur. Et hæc est ratio una a falsitate Evangelistam nostrum liberandi. Alia ratio est, quòd, ut antea monuimus, valde sæpe Scriptores Novi Testamenti, etiam si verba ipsa citare videantur, sententiam tamen tantummodo revera recitent. Videndum igitur est an hoc in presente loco factum fuerit. Nam si id factum fuisse ostenderimus, satis ab omni falsitatis suspitione Mattheus hac in parte defensus fuerit. Igitur quamvis apud Zachariam habeatur, quòd propheta accepit illos 30. argenteos, apud Matth. verò dicatur, Et acceperunt 30 argenteos, non pugnantia men inter se. Intelligendum enim est, apud Zachariam 30. illos argenteos quos Propheta accepit, sensit, & projecit in domum Iehovæ, fuisse deinde acceptos a principibus Iudeorum, & quidem ita ut emerent ex illis agrum figuli, quod significatur apud

ipsum prophetam per illas duas voces ad figulum, apud Evangelistam verò expressius dicitur. Præterea, quamvis apud Prophetam non legantur verba illa, quæ apud Evangelistam leguntur, Sicut constituit seu præcepit mihi Dominus, legitur tamen res ipsa, & interim ex istis ipsis verbis quæ apud Evangelistam leguntur, apparet illum rationem habuisse ejus, quòd ipse Propheta accepisset & tulisset 30 illos argenteos, quemadmodum apud Zachariam legitur, quamvis superius nullam ejus rei mentionem fecisset, sed tantummodo dixisset, Et acceperunt 30 argenteos quod quomodo cum sententia, quæ apud ipsum prophetam habetur, conveniat, jam dictum est. Sed dicet aliquis, quomodo ista conveniunt, quòd apud Zachariam ipse propheta, tulit istos 30 argenteos, in domum lebove, apud Evangelistam verò legitur, quòd Iudas eos in templum projecit. quomodo item Evangelista secum ipse non dissidere dicendus est? cum postquam narravit Iudam illos projecisse, deinde subdidit in recitatione ipsius prophetici testimonii verba illa: sicut constituit mihi Dominus. Dicendum est, etiamsi Propheta non fuerit typus Iudæ, nec Iudæ quicquam Dominus præceperit, circa triginta istos argenteos, tamen satis esse, quòd ea in re projiciendi illos 30 argenteos in templum Domini, similitudo sit inter Zachariam & Iudam. et quod etiamsi Deus Iudæ circa rem istam nihil præceperit, tamen Iudas, non sine Dei operatione, & certo decreto ac motu, 30 illos argenteos in templum ejus projecit, quod respondere potest expressè jussioni, quam Deus hac eadem

de re propheta olim fecerat. Restat adhuc ut videamus, quomodo Evangelista verba illa, precium apreciati, quem appreciaverunt a filiis Israel, cum eo conveniant quod scribitur apud Prophetam. Dicimus igitur textum Evangelista ita ordinatum esse, ut dicatur illum a filiis Israel appreciatum fuisse. quod, quantum pertinet ad propheta locum, significet mercedem constitutam a Filiis Israel Prophetae, sive ut alii volunt ipsi Deo, quae merces apud ipsum Prophetam ita consideratur, ut ex verbis a nobis ante recitatis ipsius Prophetae patet, ut, sive Deus, sive Propheta ipse, tanti aestimatus fuisse videatur. Quod verò pertinet ad rem de qua Evangelista agit, hoc idem rectè ei convenit, quandoquidem cum Iudaei, qui sunt filii Israel, constituerunt Iudae triginta argenteos, ut illis Iesum proderet, iam hac ratione meritò dici possunt ipsum Iesum pretio isto triginta argenteorum aestimasse. Verùm, dubium aliquod facere videntur illa verba: Quem appreciaverunt. Non enim apparet quomodo illa possint interjecta esse, inter vocem apreciati & voces a filiis Israël, nam secundum eum sensum, quem exposuimus, & quem verissimum esse credimus, omnino videntur esse superflua. Ad hoc respondendum est, nullo pacto censenda esse superflua, ob eam causam quòd nisi addita fuissent, vox apreciati non fuisset planè intellecta. Intelligi enim potuisset eam esse generis Neutri, & significare rem aliquam, non autem hominem quempiã. quemadmodum tamen ut significet, totus locus & Evangelista mens, de qua satis constat, omnino requirit. Quare exprimendum fuit

non de re quapiam sed de homine agi, id est de Iesu, qui ea ratione quâ diximus a filiis Israel estimatus fuit. Relativum quem cum nihil precesserit Masculini generis, ad quod referri posset, necessario ex vi Grammaticæ ad hominem aliquem refertur, & sic optimè omnia cum Evangelistæ nostri mente, ejusq; proposito conveniunt. Postremò sciendum est, quòd Hebræi, præsertim verò Rabbi David Kimchi, vocem quam nos figulum legimus, Thesaurarium legit, unde videri posset falsò ab Evangelistâ locum citatum fuisse. Et quidem nihil videtur ad rem facere, quòd apud prophetam figuli fiat mentio, & quod necesse sit ut vox illa, quæ apud nos reddita est figulum, si thesaurariû significare possit, thesaurarii voce reddenda omnino fuerit; qua scilicet significetur, jussum fuisse prophetam a Deo, ut præmium istud projiceret ad eum, qui in templo curam habebat colligendæ pecuniæ, quæ illuc inferebatur. Verùm sciendum est nomen Hebræum Iozer, quod legitur in omnib^o Hebræis codicibus, ad istum modum scriptum & pronunciatum, non significare ullo modo thesaurarium, sed tantummodo figulum seu fictorem, idq; ipse Kimchi animadvertens dixit, isto in loco litteram Iod positam esse pro Aleph. Sæpe enim fit ut litteræ illæ, quæ apud Hebræos quiescentes vocantur, inter quas istæ duæ sunt, invicem commutentur, adeò, ut non pauci ex ipsis Christianis sententiæ ipsius Kimchi adhaerent, & affirmaverint, a propheta isto in loco Iod pro Aleph fuisse positum; quod etsi verissimum esset, tamen dicendû esset id non sine magno myste-

rio fuisse factum, quemadmodum ipsi Hebræi fatentur vel potius contendunt, nullam ejusmodi commutationem litterarum fieri sine aliquo mysterio. Mysterium autem hoc esset, quod aperte ex accomodatione istius testimonii, ad rem suam ab Evangelista facta, omnibus constat, ut scilicet interim ista vox, ut proprie significat, sigulum declararet, cujus videlicet ager 30 istis argenteis emptus fuit, ita ut verba illa apud Prophetam, & ad Thesaurarium legi possint, quod attinet ad sensum rei tunc presentis, atque etiam & multò certius ad sigulum, quod videlicet significant ad emendum agrum siguli.

Nunc, alio de loco agemus, ubi similiter obijci posse videtur citatum fuisse in Novo Testamento locum ex S. scriptura, qui tamen in ea non extet, & proinde videatur scriptor falsi aliquid dixisse. Estque hic locus eò magis consideratione dignus, quòd citatio ista in eo tribuitur ipsi Christo, ita ut scriptor dupliciter falsum dixisse videatur. Primum, ea citando quæ scripta non sunt; deinde, citationem istam tribuendo ei qui est summa veritas, cum tamen nullo modo inveniatur, quomodo id verè ab ipso fieri poterit. Locus est Ioh: 7. ubi Evangelista ad hunc modum Christum loquentem inducit. Si quis sitit, veniat ad me, & bibat. Qui credit in me, sicut dixit scriptura, flumina de ventre ejus fluent aquæ vivæ. Illud autem certum est, testimonium istud, quòd qui credit in Christum, flumina de ventre ejus &c. non inveniri in sacris veteris Testamenti litteris, in hunc modum scriptum & prolatum. Quapropter torquent se plurimum huius le-

ei explanatores, ut inveniant quomodo tandem Evangelista, adeoq; ipse Christus verum dixerit. Suntq; hic tres precipuae sententiae. Una est, quod verba illa, sicut dixit scriptura, coniungi debeant cum superioribus illis; Qui credit in me, non autem cum iis quae sequuntur: ita ut non citetur a Christo testimonium aquarum quae fluiturae essent ex iis, qui in illum credituri essent; sed tantum dicatur, fore ut aquae vivae fluant ex eo, qui in Christum crediderit, ad eum modum ut scriptura dicit. Quod potest intelligi, vel de ratione credendi in Christum, vel simpliciter de ipsa in Christum fide, ac si dictum foret: Qui credit in me, sicut scriptura jubet ut credatur. Altera sententia est, ut locus qui hic intelligitur citatus sit Proverb: cap: 5. de quo loco postea agemus, eiusq; verba recitabimus atq; expendemus. Tertia sententia est, non citari isto in loco ex Test: Vetere singulare aliquod testimonium, sed illa omnia, ubi de aquis dandis seu effundendis sub Novo Testamento aliqua mentio, vel expressè vel adumbratè fiat. Prima sententia citantur auctores Chrysostomus, Eutymius, & Theophilactus. Secundè verò Origines & Hieronymus quos sequitur Franciscus Toletus in suis in hunc locum annotationibus, Tertia est complurium recentiorum, atque inter ceteros Calvini.

Quod ad primam attinet, ea sine dubio videtur non parum coacta, verumtamen sequitur quiddam in ipsis Evangelii verbis, quod videtur sententiam istam minus duram facere, quatenus ex verbis

istis colligi videtur, non citari a Christo locum aliquem, ubi id scriptam esset quod ille dicit; sed potius ipsius Christi simpliciter verba esse, quae de aquis fluentibus ex iis, qui in illum credant, asserit. Evangelistae verba sunt haec: Hoc autem dixit de spiritu, quem accepturi erant credentes in eum. Nam si praecedentia verba, ubi de aquis fit mentio, intelligerentur citata ex ipsa scriptura, verisimile est Evangelistam non dicturum, Hoc autem dixit nempe Christus, sed potius, Hoc autem scriptum fuerat &c.

Quod attinet ad secundam sententiam, ea mihi nulla prorsus ratione non modo probanda, sed ne excusanda quidem videtur; adeo ut vehementer mirer eos, qui primam quam diximus reiectam, tanquam plane absurdam, istam tamen ita constanter retinere videntur. Locus ita habet, Bibe aquam de cisterna tua, & fluente de medio putei tui. Dispergant sese fontes tui foras, in plateis rivus aquarum sint tibi soli, & non alienis tecum; sit scaturigo tua benedicta, & laetare de uxore adolescentiae tuae. Quid, quaeso, locus iste totus commune ostendere potest, cum eo quod a Christo dicitur. neque enim quidquam hic praedicitur sed praecipitur, quod solum satis est ad absurditatem istius sententiae patefaciendam. quod sane videns Franciscus Toletus, qui illam vehementer probat, necesse habuit in aliud absurdum incidere, ac dicere Christi verba non ita accipienda esse, quasi velit dicere illud scriptum esse, quod ipse ait de aquis illis, sed intelligendum Christum dicere voluisse, eas aquas, ea-

fluenta, quæ præcipiuntur bibenda in loco isto, fluenta ex eo qui in Christum crediderit, ubi mirum est, quàm inconcinnè & coactè possimus credere ista ad Christi verba accommodari posse. Primum enim omnino in alium sensum ea detorquentur, atq; apertè sonant. Deinde illa verba: Qui credit in me, & sic ratio quæ haberi debet fidei in Christum, in eo quod futurum prædicitur, nullum locum hîc habere possunt; cum nihil omnino sit in omnibus istius loci verbis, ex quo aliquid elici possit, quod ad fidem Christo adhibendam pertineat.

Iam quod attinet ad tertiam sententiam, ea sine dubio omnium probabilissima videtur, omnium, inquam, istarum trium, crediderim tamen posse non sine causa affirmari, Christum, ut ipsius verba sonare videntur, locum aliquem singularem scripturæ sacræ intellexisse, eumq; illum esse, qui legitur Esaie 44, qui unus est ex illis locis, quem alii etiam animadverterunt, ubi aquarum istarum spiritualium, quæ futurae erant sub Novo Testamento, in veterè sit mentio.

Loci verba sic habent. Et nunc audi Iacob serve mi, & Israel quem elegi. Sic dixit Iehova factor tuus, formatorque tuus ab utero, qui auxiliatur tibi, Ne timeas serve mi, Iacob & Ieschûrun quem elegi, quia effundam aquas super sitientem, & fluenta super aridam: effundam spiritum meum super semen tuum, & benedictionem meam super germen tuum. Hic locus quominus possit accommodari

modari ad Christi verba, duo tantum habere videtur. Vnum est, quod non de Christo sed de Israele hic fiat mentio. Alterum, quod nihil dicatur de aqua fluxuræ ex ventre alicujus. Verum neutra ex istis objectionibus videtur quidquam momenti habere. Nam, quod ad priorem attinet, certum est, apud ipsum eundem Prophetam, atque etiam alibi in sacris literis, nomine Israelis figuratè seu typicè Christum significari; Inde illa accommodatio, de qua superius egimus, loci Osee prophetae ad Christum: Ex Aegypto vocavi filium meum. cum apertissimè constet, quicquid Tremellius & Iunius conentur sua interpretatione aliud docere, verba ista primo suo sensu ad Israelem pertinere. Hinc Israel toties primogenitus Dei appellatur, hinc ille servus Iehovæ esse dicitur quem ipse elegerit, & alia multa de Israele in scriptura dicuntur, quae non nisi hyperbolicè quodammodo & figuratè ad ipsum pertinent, sed propriè ac revera, & sine ulla hyperbole ad Christum spectant. Sunt autem apud eundem prophetam Esaiam loci duo, qui videntur apertè docere sub Israelis typo Christum intelligi. Vnus locus est cap: 49. ubi sic legimus: Et dixit mihi (nempe Iehova) servus meus tu Israël, quia in te gloriabor. Ego autem dixi, in vacuum laboravi, inaniter & vanè fortitudinem meam consumpsi, verè iudicium meum est cum Iehova, & opus meum cum Deo meo. & nunc dixit Iehova qui formavit me ab utero servum sibi, ut reducam ipsi Iacob, & Israel ei congregabit sese. **Hic apparet eundem, quem antea Israelem nomi-**

naverat, eum futurum qui reducat ad Iovam ipsum
 Israelem, hic autem nullus esse potest nec fuit, præ-
 ter Christum, de quo statim ea dicuntur, quæ appa-
 ret manifestè ad alium ullum accommodari non pos-
 se, id videlicet: leve est, ut sis mihi servus &c.
 Hic enim locus expressè ad Christum accommodatur
 Act: cap: 13.

Alter locus est, ca. 52. ubi ita scriptum est: Non
 enim cum festinatione exhibitis, & cum fuga
 non ambulabitis, quoniam præcedet vos Ie-
 hova, & congregabit vos Deus Israel. Ecce
 intelliget servus meus, exaltabitur & eleva-
 bitur, sublimisque erit valde, quemadmo-
 dum admirati sunt super illum multi, quòd
 adeò corruptus esset præ viro aspectus ejus,
 & forma ejus præ filiis hominum. Sic asper-
 get, &c. In his enim verbis sub Populi Israelis typo,
 qui primùm in captivitate duci, & postea inde glo-
 riosè liberari debebat, prædicitur Christi mors atque
 supplicium, & gloria illa quæ inde est cõsecuta, quem-
 admodum omnes aperte fatentur, atque contendunt.
 Contendunt inquam adversus Iudeos, quorum ple-
 riq; auctore Rabbi David Kimchi, non solum hæc,
 sed ea omnia quæ sequuntur cap: 53. de Christo tam
 graphicè atque expressè prædicta, contendunt de I-
 sraele intelligenda omnino esse. & ad ipsum optime
 posse accommodari; nec ullam subesse causam, cur
 alia interpretatio queratur, cum ex propheta præ-
 cedentibus verbis aperte constet illum de Israele lo-
 qui. Hac igitur eò dicimus, non quòd quidquam du-
 bite.

bitemus, locum 63 cap: Esaia ad Christum omnino
 sensu prophetico, & porro ad locum ipsum ma-
 gis accommodato, pertinere: id enim per se ni-
 mis clarum est, ac praeterea aperte confirmatur ex
 iis, quae de loco isto ad Christum accommodata ha-
 bemus cap 8. Evangelistae Matthaei. Cap: itidem 8. A-
 ctorum Apostolicorum. Cap: 2. prioris Epistole Petri,
 & aliis fortasse in locis Novi Testamenti: sed ut a-
 pertè constet sub nomine Israelis, praesertim apud i-
 stum Prophetam, multa de Christo dici ac praedici.
 Nam quòd locus 54 cap: de quo agimus, quamvis a-
 pertè ad Israëlè referatur, tamen ad Christum
 spiritu prophetico referri debeat, verba illa osten-
 dunt: Effundam spiritum meum super semen
 tuum, & benedictionem meam super germi-
 na tua. Hoc enim de Israëlè dictum non simpliciter
 est verum; neque enim totum semen Israëliticum se-
 cundùm carnem, neque omnia germina ejus parti-
 ciparunt Dei spiritum, immo maxima pars eo sem-
 per fuit destituta; sed Christi semen ejusq; germina
 omnia & singula, donum spiritus sancti semper sunt
 consecuta. Nam alioquin quòd Christus dicatur ha-
 bere semen, qui sunt ipsius veri fideles, ut alia quae
 id probant complura hoc loco omittamus, id aperte
 probat praedictus locus 53. capituli ejusdem prophe-
 tae. Ibi enim haec verba leguntur. Si posuerit sei-
 psum sacrificium pro delicto, anima ejus vi-
 debit semen, quod prolongabit dies. Est au-
 tem animadvertendum, quòd non sine causa in hoc
 44 capite Israël vocatur nomine Iesbûrun, quod no-
 men a-

men alibi etiam est illi tributum in sacris litteris, nempe Deut. 32, & 33 cap. De quo nomine quid verè significet, quamvis multa sit dubitatio ac controversia inter homines linguae Hebraicae peritos, tamen id negari non potest, duas posse illud habere origines. Vnam a Rectitudine, ut scilicet nomen istud a verbo Iaschar deducatur. Alteram verò a pinguedine, seu succulentia, ita ut ducatur hoc nomen a verbo Schor. Id enim non sine mysterio videtur esse factum, ut quia Israel erat futurus typus ipsius Iesu Christi, propterea nomē habuerit, quod Rectus verè potest, quemadmodum quidem a multis, et hoc in loco & alibi, id nomen redditur, quod nomen alioquē significatione ista retenta, parum videtur ad Israelem quadrare; qui scilicet minus rectus fuit semper. Sed interim factum est, ut alteram illam significationem haberet nomen istud, quae optimè ad ipsum Israelem accommodatur, qui omnibus donis a Deo decoratus ac repletus fuit, videturque omnino ad significationem istam respexisse Moses, cum praedicto capite 32 Deuter: ad hunc modum loquitur: Et impinguatus est Ieschürun, & calcitravit. Impinguatus fuisti, incrassatus fuisti, operuisti: & dereliquit Deum. Voluit igitur, ut ad propositum revertamur, propheta Esaias, praesertim in 54 isto capite, uti nomine isto Ieschürun, eam ob causam, quod melius ac plenius accommodatur nomen istud ad Christum, quam ad ipsum Israelem. In Christum enim utraque origo competit. Nam & rectissimus est, & omnibus donis ac bonis a Deo sine ulla men-

mensura decoratus ac repletus. Superest ut ad alteram objectionem quam fecimus, quominus hic locus possit ad Christi verba Iob: 7. accommodari, aliquid respondeamus. Dicimus igitur, etiamsi in verbis Christi habeamus de fluxione e ventre fidelium aquarum istarum, in Esaiæ verò loco de ista e ventre fluxione nihil dicatur, non inde tamen sequi, quominus locus ad Christi verba accommodatus sit. Cujus rei rationem suppeditat quodammodo nobis ipse Evangelista cum ait: Hoc autem dixit de spiritu quem accepturi erant credentes in eum. Videtis Evangelistam ipsum quod Christus dixit de fluxione e ventre, accommodare ad acceptionem, cujus acceptionis sit verbis ejusmodi mentio in Esaiæ loco, ut magis etiam intelligi possit fluxio illa, quæ inde erat consequutura. Inquit enim Propheta Dei nomine: Effundam aquas super sitientem, & fluentia super aridam, effundam spiritum meum. Hic quidem talis acceptio spiritus sancti insinuat, atque expressè significatur, quæ redundantiam omnino præ se ferat, & sic fluxionem illam mox futuram omnino significet. Neque enim potest in quæquam derivari maxima aquæ copia, quæ istis verbis significatur, quin ea iterum inde fluat.

Et sanè spiritus ille quem acceperunt credentes in Christum, de quo potissimum Christus loquebatur, & Evangelista intellexit, ejusmodi fuit qui Christi fidelibus propterea fuit datus, præsertim verò apostolis, ut inde quodammodo ad alios, flueret. Illa enim spiritus S. dona, quorum initium maximum

apparuit in initio Ecclesie Christi post ipsius in caelū
 ascensionem, ob id data fuerunt, ut cunctis appare-
 rent, & ad cunctorum utilitatem ex Christi Apo-
 stoli quodammodo fluerent. Concludimus igitur, si
 Christi verba sunt ad aliquem locum accommodan-
 da, qui in Vetere Testamento legatur, nullum inve-
 niri posse aptiorem isto 54. capitis Esaie, ad quem
 prophetam in verbis suis Christum respexisse, id om-
 nino probare videtur, quòd ab ipso initio isto in lo-
 co dixit, inquit: Siquis sitit veniat ad me, &
 bibat. &c. Videtur enim hisce verbis omnino ad id
 alluisse, quod in initio capitis 55. Esaie legitur: Om-
 nes sitientes venite ad aquas, & simul indi-
 casse, quam reverà secundum spiritum propheti-
 cum iste aquae essent, quarum isto in loco apud Esa-
 iam fit mentio. Hac inquam sententia nostra est, si
 Christi verba ita sunt accipienda, ut in Vetere Testa-
 mento disertè aquarum fit facta mentio, quae spiri-
 tum S. significant, quem accepturi essent ii, qui in i-
 psam credituri erant, ut scilicet potius ad locum i-
 stum unum ipse respexerit, quàm ita in universum
 ubi aquarum fiat mentio, quae fortasse aliqua ratione
 possint similiter ad istum sensum accommodari. Sed
 iudicio meo nihil planè cogit Christum ad aliquem,
 seu aliqua loca respexisse, in quibus disertè aqua-
 rum fiat mentio; ad quod probandum ea ratione
 moveor, quam supra attuli, cum ostendere volui
 interpretationem illam primam, quae volebat ver-
 ba illa sicut dixit scriptura, referenda esse ad
 illud qui in me credit, non autem ad sequentia.

non omnino improbabilem esse. Ea est quoddam Evāgelista, ut diximus, subjungat: Hoc autem dixit de spiritu. &c. Omnino enim videntur verba ista indicare, ejusmodi verba, quae Christus dixerat, non ita disertè, aut cum mentione ista saltem aquarum, scripta alicubi in Vetere Testamento inveniri; sed vel illud, sicut dixit scriptura accipiendum esse secundum istam primam interpretationem, quod nos tamen non probamus, propter insolentem, qui induceretur, loquendi modum; vel sentiendū, a Christo, id quod aliis verbis a scriptura prolatum fuit, hac aquarum metaphora prolatum fuisse, ad quam ut sibi Christus viam sterneret, propterea usus fuerit antea verbis illis: Si quis sitit, veniat ad me, & bibat. cum igitur Christus quod scriptura disertè de spiritu ait, sine ulla aquarum mentione, ut præcipuè Ioelii C.2, ipse sub aquarum Metaphora extulisset, meritò subjunxit Evangelista, Hoc autem dixit de spiritu &c. qui alioqui, ut antea dictum est, si sensisset ipsa Christi verba, & aquarum istarum Metaphoram haberi apud prophetam aliquem, dixisset, ni fallor, Hoc autem nō quidem ipse Christus dixit, sed vel propheta dixit, vel scriptum est seu fuerat, vel aliquid tale, unde appareret, testimonium a Christo fuisse iū verbis & eā Metaphorā, quā ab ipso prolatum fuit, ex S. litteris excerptum. Et hac jam satis superq̄ sint ad ostendendum non immeritò, & sine ulla prorsus falsitatis suspicione, tum a Christo dictum, tum ab Evangelista scriptum fuisse, scripturam dixisse, quod flumina aquae deberent fluere

ex ven-

ex ventre illorum, qui in ipsum credidissent, etiamsi id disertè nusquam scriptum extet, cum vel sententia ipsa, sub ipso aquarum nomine, in ipsis prophetis expressa reperiat, vel ea dicta inveniatur, quæ per Metaphoram, quam illico Evangelista declaravit, potuerunt a Christo sub nomine aquarum referri atq; citari. Vbi adhuc illud monendi sumus, verba illa e ventre, ex Hebraica phrasi idem pollere, quod e medio sive ex ipsis. ac si scriptum foret; Si quis credit in me, flumina ex ipso fluent aqua viva. Quod certè, ut diximus, re ipsa factum est, cum aquæ, interprete Evangelista nostro, spiritum significant. Ex Apostolis enim prodierunt multa, non solum ipso die Pentecostes, (quo tamen tempore ait Petrus Act. 2. impletam fuisse prophetiam illam loelis, de abundante illa spiritus S. effusione,) sed etiam, immo multò magis postea, variis locis ac temporibus, qui ipsius spiritus sancti rivi quidam meritò nominari possunt, quod ex ipsis fluxerint, in quos videlicet Deus per Christum valde abundanter spiritum suum effudit.

Post istum apud Iohannem cap: 7. locum, visus est mihi silentio minimè prætereundus locus, apud Paulum ad Eph: cap: 5. ubi sic scriptum est, Omnia autem quæ arguuntur a luce manifesta fiunt. Omne enim quod manifestum redditur, lux est. Quapropter dicit: Expergiscere qui dormis, & surge a mortuis, & illucescet tibi Christus. Videtur enim hic a Paulo falsò citari testimonium ex s. literis. Neque enim verba ista Expergiscere

Scire &c. ita ut ab ipso sunt prolata, usquam in Ve-
 tere Testamento leguntur, praesertim verò postrema
 illa, Et illucescet tibi Christus, ne vestigium
 quidem sui videntur usquam habere. Pleriq; enim
 putant, Paulum eum locum intellexisse qui est apud
 Esaiam cap: 60. in ipso initio. Vbi ad hunc modum ex
 Hebraeo legitur: Surge illuminare, quia venit
 lumen tuum, & gloria Domini seu Iehovæ
 super te orta est: Atqui videtur iste locus nimis
 multum abesse a sensu, secundum quem apparet A-
 postolum testimonium suum protulisse. Neque enim
 apud, Esaiam agitur alia de re, quatenus ad typum
 attinet, quàm de Israele, qui magnum aliquod decus
 a Deo consequuturus erat: Quod verò attinet ad rem
 typicè adumbratam, agitur, ut plerisque placet, de
 Ecclesia, qua Christi tempore extitit, qua res non
 videntur eò pertinere, quò Apostoli verba tendunt,
 ut scilicet is, qui somno ignorantia & peccatorum
 consopitus sit, evigilet jam, fore enim ut postmodum
 a Christo plenè illustretur. Quare alii crediderunt,
 Paulum potius respexisse ad locum, qui apud eun-
 dem prophetam habetur ad finem cap: 26, ubi ex
 Hebraeo sic legimus: Vivent mortui tui, cada-
 ver meum resurget, expergiscimini & præ-
 conia dicite habitatores pulveris, quia ros
 oleram, ros tuus. Apparet sanè locum istum mul-
 to magis convenire cum Apostoli mente, & verba ip-
 sius melius respondere verbis, qua apud ipsum Apo-
 stolum, in citando testimonio suo, habetur. Præterea
 etiam res ipsa multo magis convenit. Agitur enim
 in loco

in loco apud Esaiam de liberatione aliqua insigni
 populi Dei ex miseriis suis. Quod sanè respondet A-
 postoli menti, cum nulla major sit miseria, quàm i-
 gnorantia. Notetur verò illud nominatim, quòd id
 quod apud Apostolum habetur, & resurget a mor-
 tuis: non modò indicatur verbu illud, cada ver me-
 um resurget, sed satù expressè eodem in loco, quo
 apud Paulum dicitur in illis verbis habitatores
 pulveris, si id cum verbo ex pergisimini, quòd
 proximè antecedit, jungatur. Habitatores siqui-
 dem pulveris sunt mortui, qui tunc expergiscuntur,
 cum a mortuis resurgunt. Consentio igitur facillè
 cum istis, ut ad locum istum Apostolus alluserit cum
 testimonium illud citavit. Nam quòd attinet ad po-
 stemam ejus partem: Et illucescet tibi Chri-
 stus, quæ non videtur apud Esaiam extare, duplici-
 ter respondere possumus. Primùm, quòd nihil vetas
 de suo Apostolum id addidisse, & ita fiet, ut nullo pa-
 cto falsitatu argui possit, quandoquidem intelligen-
 dum est, ita illum addidisse, ut velit ab omnibus a-
 gnosci, tanquam a se additum. Deinde dici potest,
 partem istam contineri verbis illis, quæ apud Esaiam
 similiter adduntur: quia ros olerum ros tuus.
 Quæ verba explicans Paulus, & mysticum sensum,
 qui illi continetur nos docens, non ut ipsa sonant ea
 protulerit, sed ut intelligi mysticè atque accipi de-
 bent, id est, ut ad Christum referantur, qui sit
 ros ille, de quo in illis fit mentio. sumta interim sibi
 hac autoritate, ut ex una Metaphora in aliam,
 quæ nimirum magis cum precedentibus conveniat,

sententiam istam transtulerit. Quia verò posset aliquis suspicari, cum apud Apostolum illud tantum verbum legatur dicit, ne non sit necessario concludendum, illum alicujus testimonii sacri, quod scriptum extaret rationem habuisse; sed mentem ejus fuisse, spiritum sanctum ea dicere, que mox subjungit. Animadvertendum est hunc modum citandi scripturas, per simplex verbum dicit apud Paulum non esse novum. Ut enim alia loca omittam, que hoc docere possunt, locus est qui id probet manifestus. Cujus etiam superius aliquando mentionem fecimus, is est cap: 6. 2. ad Corint: in ipso ferè initio. Ex quo etiam loco si quis objiceret, Paulum non ad rem citasse locum istum, vel ad illum respexisse, qui apud Esaiam cap: 26. legitur, possumus responsonem ad eiusmodi obiectionem nancisci, & omnino ostendere, sultem id verissimum esse, nihil posse dubitari de falsitate ulla Apostoli hac in re. Nam & in predicto isto loco ad Corin:, ubi certissimum est Paulum ad locum respexisse, qui habetur Esaiæ 49, posset quis aliquid tale Apostolo objicere, quod tamen iurè fieri non posse, antea, cum de loco isto ageremus, a nobis demonstratum est: ita ut concludendam sit, obiectionem istam nullas vires habere ad persuadendum, quod Paulus in testimonio isto, ad Ephes. scribens, citando, minimè locum istum apud Esaiam intelligere potuerit. Nam quod ad id attinet, quod non ad rem illud citaverit, iam de hac materia, & quomodo nihilominus, ut videantur propheta verba eorumque sensus non convenire cum Apostoli mente, tamen
 omni-

omnino sentiendum esse, merito potuisse locum ab Apostolo citari, abunde satis supra suo loco a nobis disputatum est.

Venio ad locum alium, quem volo postremum esse eorum, ubi aliquid in Novo Testamento ex scriptura citetur, quod falso citatum esse videatur. Est locus iste apud Iacobum in eius Epistola cap: 4. ubi sic scriptum est. An putatis quod inaniter scriptura dicit, Ad invidiam concupiscit spiritus, qui habitat in nobis: majorem autem dat gratiam. Neque enim ullo in loco Testamenti Veteris verba ista aut similia inveniri videntur. Et sane, ne quid coacti a nobis hac in re, ut Iacobum a falsitate vindicemus, dici videatur, non verebor confiteri, me habere credere, Apostolum in sua ista citatione non respexisse ad locum ullum, qui hodie in libro veteris Testamenti legatur, & necesse esse agnoscere ipsum locum aliquem intellexisse, qui hodie non extet. quod quemadmodum fieri possit, ita ut nihilominus eiusmodi locum verè divinum testimoniū contineat, & in ipsis sacris libris scriptus extaret, superius videmus satis aperte docuisse, cum ex ipsis sacris libris Testamenti Veteris, quos habemus, clarè ostendimus, non paucos sacros similiter libros desiderari. Et arbitror quidem facile fieri potuisse, ut una ex causis, cur non apud omnes Epistola ista Iacobi ab initio recepta esset, hæc fuerit, quod inveniret aliquid ab ipso citatum, quod in scripturis Canonicis non haberetur. Nam & similem fuisse causam, cur & Epistola Petri posterior, & Epistola Iuda, non fuerit ab initio ab omnibus recepta, testatur Ecclesiastici scriptores, affirmantes, quia fieret in

illis mentio eorum, quæ in Apocryphis tantum libri alicubi fortasse diceretur, propterea illas multis fuisse suspectas. Fit enim in utraque mentio Angelorum, qui peccaverint, & propterea a Deo severiter puniti fuerint. Id quod plerique contendunt, nusquam in Canonicis libris haberi. In Epistola porro Iudæ disertè Enochii vaticinantis testimonium citatur, quod tamen hodie in veteris Testamenti libris non habetur. Itaque concludimus nullam esse causam cur quis Iacobo falsitatem ullam ob locum istum ab ipso citatum, qui hodie in scriptum non legatur, obijcere possit.

Absoluta examinatione locorum Novi Testamenti, quæ nobis majoris momenti sunt visa, in quibus aliquid ex veteri citetur quod falsò citatum videatur, unum adhuc restat, ex quo concludere quis fortasse audeat, in Novi Testamenti scriptis falsitatem aliquam inveniri. Testatur enim Sixtus Senensis, in bibliotheca sua sancta circa finem libri VII, ubi enumerat ac refellit obiectiones quæ sunt libro Apocalypsis, non defuisse qui isti libro obijcerent, falsò in illo fieri mentionem cap: 2. Ecclesiæ Tiatyrensis, quippe quòd eo tempore, quo opus istud conscriptum fuit, nulla esset in Tiatyrorum urbe Ecclesia. Adquam obiectionem ipse examente Epiphanius respondet; tametsi tunc temporis nulla in urbe ista Ecclesia extaret, tamen non ita multò post extitisse, eamq; eiusmodi quæ plurimum ab Hereticis, quæ Phrigastæ dicti sunt, turbaretur atq; contaminaretur, præcipue verò a quibusdam mulieribus, quarum

nomina sunt, Priscilla, Maximilla, & Quintilla, quae tanquam vates aliquae portentosa non pauca in ea disseminabant. Ait igitur Epiphanius, Dei spiritum, apud Iohannem in Apocalypsi, ad tempus mox futurum respexisse, & tanquam de re presente loquentem, ea ratione mox futura praedixisse, nomineque Iesabelis, cuius ibi disertè fit mentio, scēminas istas intellexisse. Et interim idem Epiphanius affirmat, suo tempore & Ecclesiā istā adhuc permansisse, & ab istis Phrygastarum erroribus planè perpurgatam fuisse. Mihi quidem, ut verum fatear, responsio ista non admodum probatur, cum propter alia, tum propter id, quod nimis apertè ex ipsa historia Apocalypsis conflare videtur, jam istam Ecclesiam Thyatirensē reverā extitisse. Quare censerem aliam responsionem querendam esse, & dicendum, valde periculosum esse affirmare, quod, cum Apocalypsis scripta est, vel potius, cum visio illa Iohāni apparuit, nulla in Thyatiris esset Ecclesia; praecipuè ob eam causam, quod ex Geographis aliūquē historicis doceri possumus, non unam fuisse urbem quae nomine isto vocaretur, adeò ut fieri quidem posset, ut in aliquo oppido istius nominis nulla tunc temporis esset Ecclesia, & tamen interim in alio ejusdem nominis non deesset. Quod autem non una fuerit civitas quae isto nomine appellaretur, quemadmodum & plures Antiochia, & plures Laodicea, & alia quoque urbes plures ejusdem nominis extiterunt, id satū probat, quod Strabo nobilissimus Geographus Thyatirorum urbem in provinciam Mysia reponit. Stephanus

verò qui de urbibus nominatim scripsit, eam Lydia assignat. at Plinius rursus eam nec Mysiæ nec Lydiæ tribuit, sed Ioniæ; & interim, sive in isto sive in alio loco, docet idem Plinius, fuisse etiam insulam que nomine isto vocaretur. Hinc enim satis intelligere possumus, aut certè meritò suspicari, plures fuisse urbes istius nominis; idque inde fieri potuit, quòd Tyatiri seu Tyatirenses populi quidam erant, qui aliunde venerant, & sedes suas in ea parte, que Asia peculiariter, vel Asia minor vocatur, posuerant. Verisimile est enim illos non uno oppido fuisse contentos, cum, ut dixi, populus aliquis satis magnus esset; sed credendum est, illos sibi plura loca delegisse ubi habitarent, & oppida sibi conderent, que omnia a se denominari voluerint. Quare non temere est affirmandum, vel visionis, que in Apocal: continetur, tempore, nullam fuisse in Asia urbem que Tyatira vocaretur, in qua cætus Christianorum esset, vel eò recurrendum, ut dicamus Dei spiritum, atque adeò ipsum Christum in visione illa aliud sensisse, quam verba & res ipsa præ se ferat.

Statueram, ut hic esset finis de prima causa disputandi, cur alicui libro fides adhiberi non debeat, quod attinet ad scripta Novi Testamenti, de quorum autoritate nunc agimus, & consulto omiseram questionem illam totam que versatur circa Christi Genealogiam, in qua tradenda Evangelistæ videntur omnino perperam aliquid scripsisse. Nam & res est admodum difficilis, nec in promptu est quomodo qui eam tutò explicare possit, & nos aliquot libris

caremus, quibus ad id faciendum planè opus esset. Sed tamen quoniam animadverti, esse inter vos, qui valde cupiat, ut tota hac de re aliquid a me explicetur, quamvis præterea valde imparatus cogar hodie ad hanc materiam tractandam accedere, censui potius aliquid esse dicendum, quàm tacendum, quia perfectè rem tractare non valeam. Torsit disputatio hæc, & ad huc torquet omnes ferè qui Theologia nostra dant operum, neq; enim una sed plures difficultates in hac re apparent, nos ad tria capita omnem disputationem redigemus. Primùm enim videtur Mattheus Evangelista in recensenda Christi Genealogia quedam scripsisse, quæ a veritate manifestè abhorreant, potestq; hoc caput pertinere ad membrum illud falsitati historiae, quæ in scriptis Novi Test. reperiatur, de quo postremò agebamus. Secundum caput faciemus, quòd cum, tam Mattheus quàm Lucas videantur eandem Christi Genealogiam scribere, id est ejus, qui existimatus fuit pater ipsius Christi, nempe Iosephi, mira tamen est inter ipsos hac in re discrepantia, quippe quòd Mattheus per Salomonem Davidis filium Genealogiam istam deducat, Lucas verò per Nathanem, filium ejusdem Davidis. Tertium caput erit de eo, cur uterque Evangelista, cum Ioseph verus Pater Christi non fuerit, videatur tamen omnino, ut dictum est, ipsius Iosephi Genealogiam describere. Ex quo capite, uti nunc tantummodo indicamus, quàm videantur Evangelistæ nostri perperam fecisse in describenda Genealogia ista, aliæ præterea difficultates emergunt, de quibus post-

bus postmodum Deo dante aliquid dicemus.

Iam quod attinet ad primum caput, Matthæo obijcitur, quòd, & non paucos prætermiserit in ea recensione, quam aggressus est, Genealogiæ Iosephi, & præterea quosdam fecerit filios quorundam quos meminit, qui tamen ex Sacra Historia appareant non fuisse. Quantum pertinet ad eos, qui ab ipso sunt prætermissi, aliquantò levior ac tolerabilior videretur esse error iste, si tamen error appellari debet, nisi etiam verba addidisset, ex quibus intelligi possit, illum credidisse ita se historiam habere, quemadmodum ejus verba sonant. Nam inquit fuisse ab Abrahamo usq; ad Davidem generationes quatuordecim. Similiter etiam a Davide usque ad deportationem Babilonicam generationes quatuordecim, ac totidem post captivitatem Babilonicam usq; ad Christum, cum tamen certum sit, si illi numerentur quos ipse prætermisit, fuisse a David ad deportationem Babilonicam plures quàm quatuordecim generationes. Huc accedit quòd in isto ipso numero, a Davide inquam usq; ad Babilonicam captivitatem non recensentur ab ipso nisi tredecim generationes, cum tamen ipsemet affirmet esse quatuordecim.

Huc toti objectioni credimus ad hunc modum respondendum esse. Evangelistam scilicet nostrum cum animadverteret, quòd nemo negare potest ab Abrahamo usq; ad Davidem esse generationes quatuordecim, voluisse, propter concinnitatem quandam & ad memoriam lectoris juvandam, in aliis reliquis duabus divisionibus ab ipso factis, 14. tantum
gene-

Generationes recensere, cum ea in re nihil esset vel
 periculi, vel falsitatis, præsertim in secunda illa par-
 te a Davide usq; ad Babylonicam deportationem, in
 qua difficultas potissimum est, immo vix apparet, in
 tertia difficultatem istam locum habere. Nam in
 tertia illud tantum potest falsitatis suspicionem præ-
 bere & simili erroris, quantum in secunda esse vi-
 deri posse diximus, quod Zorobabel dicitur esse filius
 Salathielis, cum tamen ejus nepos fuerit, natus ex
 Padaia Salathielis filio, ut constat ex primo libro
 Par: cap: 3. Sed & hic, & in superiore secunda par-
 te, ut dixi, permisit sibi Euangelista, ad numerum i-
 stum quatuordecim generationum statuendum, ali-
 quos intermedios omittere, dum extante historia
 sacra, que in manibus omnium erat, hic nullum pe-
 riculum esset, quin statim ejus consilium intelligere-
 tur. Nec falsum id poterat videri, quod ab ipso scri-
 ptum est, cum facit avum, vel proavum, vel etiam
 abavum genuisse descendentes suum, quamvis ve-
 rus filius ipsius non esset. Dicuntur enim merito isti
 descendentes suos genuisse, quantumvis longissimo
 gradu distitos. Qui enim (ut vulgo in scholis dici-
 tur,) est causa causa, idem est causa causati. Et
 sacra ipse litteræ manifestè ita loquuntur, ut filios
 appellent alicujus descendentes, quotocumque tan-
 dem gradu absint: & propterea idem Mattheus in
 principio enumerationis, vel potius antequam enu-
 meret Christi progenitores, appellat ipsum filium
 Davidis, & filium abrahami, a quibus maximo ge-
 nerationum numero tamen aberat, tantummodò
 quia ex illis prognatus fuerat. Jam qui fuerint ii qui

omissi sunt a Mattheo in secunda parte isti^o sue enumerationis, quamvis id videatur esse apertissimum, tamen reperi non inter omnes convenire. Tres quidem fuisse ab ipso omisos omnes fatentur, & plerique, ni fallor, omisos esse dicunt inter Ioram & Osiam, Ochostiam, Ioas, & Amaziam, statuētes istum Osiam eundem esse cum Azaria. Nam etiam manifestè in ipsa Sacra historia, idem qui Azarias fuit, Osiā etiam vocatur, & sic legitur in vulgata editione Latina; quamvis apud Hebræos legatur etiam Vzīa. Sunt tamen quidā, qui id non animadvertentes, putarunt Osiā istum a Mattheo nominatum, per compendium syllabarum, esse eundem cum Ochostia, adeo ut dixerint, tres, qui prætermissi sunt, esse Iohasum, Amaziam, & Asariam. sed sine dubio falluntur isti. Iam quod ad illud attinet, quod diximus de Zorobabele, qui hic ponatur a Mattheo genitus ex Salathiele, cum tamen Salatiel, non pater sed avus ejus fuerit, eandem habet responsionem. Manifestè enim in historia sacra scriptum extat, cujus verus filius fuerit, & potuit alioquin meritò dicere Mattheus, quod Salathiel genuerit Zorobabelem, quamvis non filium sed nepotem suum, non solùm ob causam iam a nobis expositam; sed etiam quia in ipsa sacra historia Zorobabel iste filius Salathielis vocatur, ut apparet ex 3. cap: primi Libri Esdræ.

Restat ut aliquid dicamus de eo, quod interim tamen in secunda parte Mattheus non 14., ut profertur, sed tredecim tantùm generationes enumeraverit. Vbi unà cum responsione ad objectionem istam quid-

quiddam dicemus quod a nobis omisum est, cum mentionem faceremus paullo ante de iis, qui a Matthaeo in secunda ista parte sunt praetermissi. Nam praeter illos tres, certum est desiderari in ipsius enumeratione, inter Iosiam & Iechoniam filium Iosiae, Ioachimum, qui pater Iechoniae fuit. Verum istud Ioachimi nomen, etsi scriptum non extet in vulgaris Latinis aut Graecis codicibus, extat tamen in correctioribus quibusdam exemplaribus Graecis, ita ut neq; omisum istum fuisse a Matthaeo dici possit, & numerus 14. generationum ab ipso enumeratarum planè constet. Iam quod ad illud attinet, quod praeterea diximus, in enumeratione ista sua Matthaeum filios quosdam eorum fecisse, quorum nullo modo sunt, id revera non videtur affirmari posse, nisi de uno tantum, hoc est de Abiud, quem facit Zorobabelis filium, cum tamen ex supra dicto loco cap. 13. 1. libri Paralipomenon, ubi Zorobabelis filii enumerantur, nomen istud minimè inveniatur. Quod si quis dixerit, fieri potuisse ut unus ex illis filiis Zorobabelis, qui ibi enumerantur, duplici nomine vocatus fuerit, tunc responderi potest, saltè, si id esset, futurum fuisse, ut nomina descendantium istius eadem ex aliqua parte essent, & apud Matthaeum & in loco illo Paralip: ubi pariter enumerantur. Sed nullae sunt nominum istorum inter se conformitates: quare aut dicendum est totum numerum descendantium a Zorobabele, qui extat tam apud Evangelistam nostrum, quàm in praedicto libro Paralipomenon, eorum fuisse qui duplicia singuli nomina habuerint. aut

consensendum, in libro Paralipomenon istum Abiud Zorobabelis filium, omisum fuisse, cujus progenies consequenter in illo libro penitus prætermissa ab Evangelista nostro describatur: quippe per quam tandem ad Iosephum deveniatur, cujus Genealogiam ipse Evangelista manifeste describit.

Quod ad primam solutionem hujus dubitationis attinet, ea non improbabilis esse videtur. Certum enim est, huiusce rei aperta sunt exempla in sacris libris, qui adhuc extant, multos fuisse in populo Iudeo, qui binomines fuerint, ut de Asaria, qui idem Osius dictus est, superius a nobis dictum fuit, & præter ipsas s. literas non desunt scriptores alii, qui idem apertè testantur, inter quos præcipuè numeratur Philo, de quo postea aliquid latius dicem^{us}. Nam quòd attinet ad secundam solutionem, ea sanè parum probabilis videtur. Apparet enim, scriptorem illum libri Paralip. diligentissimum esse in enumerandis omnibus filiis eorum, quorum descendentes sibi describendos sumpsit, adeoq. tantum non disertis verbis profiteri, se nullum prorsus prætermittere. Priorem igitur solutionem retinebimus, & ita quod attinet ad primum caput difficultatum, quæ sint in istu Christi Genealogiis ab Evangelistâ nostrâ traditis, videtur satù a nobis esse explicatum, quomodo nulla causa sit, cur qui de veritate eorum, quæ ab Evangelistâ nostrâ scribuntur, dubitare possit, & Mattheum nihil perperam aut falsò dixisse, in Genealogia ista describenda.

Non est tamen, antequam caput hoc huius disputationis absolvamus, omittendum, dextrè accu-

pienda esse verba illa Matthæi, In transmigrati-
 one Babylonis. Neque enim verum est, si, ut so-
 nant, accipiantur, Iechoniam fuisse genitam in
 transmigratiōe Babylonica, sed intelligendum est
 eum fuisse genitum cum instaret captivitas Babylo-
 nica, illumq; ei captivitati annumerari, quia capti-
 vus factus est, & in Babylonem deductus, idq; cum
 vix regnare incepisset. Estq; ipse numeratus inter 14
 illos, quibus constat enumeratio Matthæi in tertia
 sui parte. Sic enim numerus 14. generationum pla-
 nè constat, ipso inquam primo hujus tertiæ parti e-
 xistente, Christo verò ultimo. Quod non animadver-
 tentes quidam, putarunt, non secundam partem, ut
 antea diximus, 13. tantum generationes habere, sed
 hanc tertiã. Numerabant enim Iechoniam in se-
 cunda parte. Iam verò quomodo respondendum sit
 de defectu isto generationis unius, in parte secunda
 satis supra a nobis dictum est.

Supereft adhuc alia quedam difficultas, qua
 propriè ad hoc ipsum caput pertinet, ut scilicet Mat-
 thæus videri possit aliquid falsi in Genealogia ista e-
 numeranda dixisse, illud est, quod facit Salathielem
 filium Iechoniæ, cum tamen ex cap: 22. Jerem: circa
 finem videatur liquidò apparere, Iechonium illum
 nullos habuisse liberos: sed quia hac de re in secundo
 capite, quod mox agrediemur, diligenter agendum
 nobis est, ne huius idem dicatur, id in præsentia omit-
 temus. Et ad prædictum secundum caput venientes,
 de discrepantia maxima, quam esse appareat inter
 Matthei Genealogiam, et eam quam Lucas descri-
 bit, di-

bit, dicimus conciliationes hujus discrepantiæ, quarum mentionem inveni apud scriptores, ad tria capita redigi posse. Vna conciliatio est, quod Lucas vera non Iosephi, sed Mariæ Genealogiam describat, ita ut nihil sit mirum eum a Mathæo discrepare, qui manifestè Iosephi Genealogiam describit. Atq; in hac conciliatione intelligitur utrumque Evangelistam, hunc quidem Mariæ, illum verò Iosephi Genealogiam veram & naturalem describere, hancq; sententiam videntur pleriq; Pontificiorum Theologorum sequi. Altera conciliatio est, quod tamen si tam Lucas, quàm Mathæus Iosephi Genealogiam describat, tamen Mathæus naturalem, Lucas verò legalem describendam sibi sumpserit. Legalem hoc loco appello, quatenus non verum & naturalem patrem, hujusq; progenitores Lucas posuerit, sed vel adoptivum, vel eum, cujus alia de causa secundum legem Ioseph filius dictus ac reputatus fuerit, quamvis ejus pater naturalis non esset. Quod adoptivum patrem Iosephi Lucas posuerit sensit Augustinus, quod verò non adoptivus, sed alia ratione legalis pater Iosephi a Mathæo positus fuerit, senserunt multi, ac sentiunt hodie viri docti atq; præstantes. Tertia conciliatio est, quidam ex utraque jam exposita mistum: idq; non simplex. Sunt enim qui existiment, immo constanter asserunt, Solomonis stirpem, per quem Mathæus suam Genealogiam deducit, in Ochosia defecisse, & qui subjiciuntur a Mathæo post Ioram, omnes pertinere ad stirpem Nathanis, que regnum sit adeptæ, stirpe Solomonis jam extinctâ. Ex istis qui ita volunt, sunt qui

qui putent, quamvis nomina apud utrumque Evangelistam non consentiant, nisi Salathielus & Zorobabelus, tamen usque ad genealogiae finem eos omnes, qui a Matthaeo recensentur, recensitos etiam fuisse a Luca, sed sub diversis nominibus, additis compluribus, quos Matthaeus omiserit ob eam causam, quam jam diximus, & propter quam illum quosdam omisisse satis constat, ut scilicet lector non plures generationes haberet a Davide ad captivitatem Babylonicam, & rursus inde usque ad Christum, quam fuerint revera, quemadmodum etiam ab ipso enumerantur ab Abrahamo usque ad Davidem. Et sic sentiunt isti, non minus a Luca quam a Matthaeo Iosephi genealogiam describi. Alii vero, qui idem sentiunt de Solomonis stirpe que in Ochosis defecerit, volunt nihilominus a Luca non Iosephi, sed Mariae genealogiam describi, de quibus singulis est nobis ordine aliquid explicandum.

Quod igitur attinet ad primam ex istis conciliationibus, ut scilicet simpliciter dicamus, Lucam non Iosephi, sed Mariae genealogiam describere, ea mihi nullo pacto probari potest, cum omnino necesse sit, ut in genealogiis describendis, is, qui pater alii cujus esse ponitur, aut naturalis aut saltim legalis sit pater. Verum si Lucas non Iosephi ipsius sed Mariae genealogiam descripsit, necesse est, ut ille, ex quo natum fuisse Iosephum, seu quem patrem Iosephi esse omnino dicere videtur, non pater, sed socer ipsius fuerit. Nam quod quidam ajunt solere, & generos a soceris, & nurus a socrabus, filios & filias appellari, & ad hoc afferunt quod in Libro Ruth, ipsa Ruth, & affinis eius que fratri mariti ipsius nupsit, ab earum socru filia appellata fuerint, hoc inquam nullam vim habet cum de genealogiis agitur, in quibus nunquam invenietur hoc factum fuisse, ut socer

pro patre positus fuerit, praesertim nulla ejusce rei
 diserta mentione facta. Quae ratio adeo valida est,
 ut frustra laborent, qui ex eo, quod expressè apud
 Lucam legitur, quòd Iosephus fuerit filius Heli, què
 ipsi patrem Mariae fuisse contendunt, & alio nomi-
 ne Ioachim vocatum fuisse concludere volunt, nihil
 absurdi in eo esse, si predictus Heli non pater, sed
 focer Iosephi esse inveniatur. Nec illos iuvat quod a-
 junt in ipsamet ista genealogia deprehendi, aliquem
 dictum esse alicuius, quemadmodum Iosephus dici-
 tur esse istius Eli. Nec tamen uicujus esse dicitur, sit
 ejus pater. hoc est, cum Adam dicitur esse vel fuisse
 Dei, cum tamen apertum sit Deum non fuisse pa-
 trem Adami, istud inquam illos non iuvat. Apparet
 enim manifestè, & sine ullo falsae sententiae periculo,
 illum improprie eo in loco loquutum fuisse, & quan-
 do adam nullum alium patrem revera habuit, De-
 um, a quo suum esse planè acceperat, eius patrem
 nominasse. Sic enim intelligendus est locus iste, &
 sermonis improprietas ista, quae non adeo magna est,
 admittenda: non autem sentiendum, ut isti faciunt,
 verba illa, Adam Dei, quae ita ad verbum apud Lu-
 cam leguntur, ita interpretanda esse, ac si dixisset,
 Adam creatura Dei, ut scilicet hinc evinci possit
 similiter, cum dixit, Ioseph Eli, nihil absurdi esse, si
 non vox Filii, sed vox Generis subaudienda. Adde
 quòd, etià si Christus non ex ipso sed eius uxore Maria
 natus fuerit, tamen ab omni verisimilitudine abest,
 quòd Lucas, praeter morem perpetuum genealogia-
 rum describendarum, matris Christi genealogiam
 descri-

describere aggressus esset, non autem eius, qui eius pater esse credebatur, & tamen huiusce rei nihil prorsus lectorem monuerit; præsertim cum non modo is, qui maritus alicuius mulierum est, possit meritò vocari pater filii, quem mulier illa ex ullo alio viro pepererit, (quemadmodum infra suo loco apertius explicabimus, & auctoritate eruditissimorum hominum confirmabimus,) sed etiam ipsemet Evangelista disertè ibi proximè, cum incipit genealogiam istam texere, mentionem fecerit, quòd Iosephus putaretur esse Christi pater. Neq; enim aliam ob causam verba ista expressa ab ipso fuisse videtur, nulla interim, ut dixi, mentione facta ipsius Mariæ matris Christi, quàm ut sibi viam sterneret & gradum faceret ad Iosephi genealogiam describendam, quamvis Iosephus non verus ipsius Christi pater esset.

Postquam satis ostendisse videmur, primam conciliationem, quam commemoravimus, genealogiarum Christi a Mattheo & Luca descriptarum, sustineri non posse, & ita nullo modo videri admittendum, quòd Lucas non Iosephi sed Mariæ progenitores recensuerit, sequeretur ex ordine, ut eam, quam secundam conciliationem fecimus, examinarem. Sed quia secundam istam conciliationem præter ceteras probamus, credimusq; illam veram ac rationabilem ostendi posse, propterea illius examinationem postremo loco reservabimus, ut totum de hæc sermonem nostrum hæc sententiâ concludamus, quæ nobis omnino in tanta difficultate sequenda videtur. Nunc igitur ad tertiam, quam fecimus, con-

ciliationem examinandam accedemus. Quae quidem
 mihi, quamvis a praeclaris aliquot viris defendatur,
 nullo modo probari potest. Potissima ejus quod dico
 causa est, quod mihi nullo pacto admittendum vide-
 tur id, quod isti sentiunt atque affirmant, Solomonis
 stirpem in Ochosia defecisse. Nam in ipsa historia
 sacra manifestè Ioas, qui in locum Ochosiae, post ty-
 rannidem Athaliae Ochosiae matris, ipsa Athalia oc-
 cisa extincta, Rex Iudae est factus, filius ipsius Ocho-
 siae esse dicitur, idque planè disertis verbis tam lib: 2.
 Reg: 11. quam lib. 2. Para: 22. Id quod animadver-
 tentes isti, qui istam sententiam, quod stirps Solomo-
 nis in Ochosia defecerit, omnino veram esse volunt,
 ajunt, quamvis Ioas filius Ochosiae esse dicatur, in-
 telligendum tamen esse, eum propterea Ochosiae fi-
 lium vocari, quia in ejus locum, tanquam si filius ejus
 fuisset, in regno successerit, eam nimirum ob caus-
 sam, quod proximus illi esset inter superstites ex fa-
 milia Davidis, tanquam is qui ex Nathane Davidis
 filio, & Salomonis ex eadem matre fratre, originem
 duceret. Ad cuius rei confirmationem, quod ob causam
 istam meritò Ochosiae filius nominari potuerit, af-
 ferunt tanquam simillimum exemplum, quod cap:
 3. libr: 1. Paral: Salathiel, seu ut ibi legitur, Se-
 althiel, Iechoniae filius esse dicitur, cum tamen re-
 vera ejus filius non esset, tantummodo ob eam caus-
 sam, quod in ea captivitate Babylonica, in qua tunc
 erant, Sealthiel post Iechoniae mortem principatum
 quendam in Iudaico populo obtinuerit. Ad proban-
 dum verò quod Sealthiel sive Salathiel non fuerit
 revera

*revera filius Iechoniae, afferunt verba, quæ Ieremias cap. 22. ad finem, in hunc modum protulit: Sic dixit Iehova. Scribite virum istum (Iechoniam sive Choniam, ut ex precedentibus patet, omnino intelligit.) orbum. Ecce, aiunt, manifestè ipse Deus pronuntiat Iechoniam orbum esse, id est, filius carere, aut certè cariturum esse. Atqui nos, cum multis præstantissimis viris, aliter verba ista accipimus, & interrim, dum sententiam nostram & istorum exponemus, id exequemur, quod supra attingimus polliciti-
 g; sumus nos inferius explicaturos, & responsuros ad objectionem, quæ Matthæi Genealogie fit, tanquam minus veræ; ob eam nimirum causam, quod & ipse, unà cum auctore libri Paral., Salathielem Iechoniae filium facit, qui tamen ex verbis istius Ierem: loci nullos filios reliquisse videtur. Dicimus igitur nullo pacto esse probandam istam interpretationem, quæ facit auctorem libri Paral. falsa dicentem, aut certè præter omnem modum negligentem, qui scilicet lectorem non monuerit, Salathielem a se Iechoniae filium vocatum, aut revera ejus filium fuisse, sed tantum illi in principatu populi Iudaici successisse. Quamquam nihil apertius est, quam auctorem ejus libri isto in loco filios veros ac naturales eorum, de quibus meminit recensere. Quomodo ergo, dicit aliquis, intelligenda sunt verba Dei apud Ierem: nempe ea in eum sensum sunt accipienda, qui ex verbis proxime sequentibus apertè colligitur, quæ ista sunt: Virum cui nihil prosperè cedit in diebus suis:*

non enim prosperè ager de semine ejus vir sedens super solium David, & qui dominetur ultra in domo Iehuda. Ex quibus satis apparet, quos sensu Iechonias a Deo orbis vocatus fuerit, nempe quia nemo ex ipsius filiis in Davidis solio sedit, in quo tamen ipse Iechonias sederat, nec in Iehuda dominatus est. Namq; Salathiel, si quid primi loci in populo Iudaico, in captivitate constituto, habuit, id non modò nihil habuit commune cum sessione in solio Davidis, sed neque etiam dominationem in se continuit ipsius populi Iudaici. Quapropter meritò, Deus verba ista ac verissimè protulit, quòd scilicet nullus filius Iechoniae, ei in regno aut dominatione populi Iudaici successurus esset, quamvis Salathiel revera ipsius Iechoniae filius fuerit. Praeterea si quis istos interroget, cur ipsi tam firmiter assererent stirpem Solomonis in Ochosa defecisse, nihil habent quòd sit admodum magni momenti. Nam quòd quidam verba illa 2 Paral: 22. quòd in domo Ochosa non essent vires ad obtinendum regnum, ita accipi volunt, ac si dictum esset, non extitisse ullum ipsius filium qui regnum posset capere, haec, inquam, istorum ejus loci interpretatio, nullo pacto sustineri potest. Immo ex istis verbis contrarium elicitur, id est quòd erant quidem filii, sed propter aetatem infirmam imbecilles, atque inepti ad regnum obtinendum adversus Athaliam ipsorum aviam, quae illud omnino occupare voluit. Sed aliud quiddam est, quòd aliquantò firmius videtur, ex quo isti sententiam suam confirmant; quòd scilicet apud Philonem Iudaum,

eum, virum doctissimum & rerum Judaicarum
 peritissimum, scriptum inveniatur, stirpem Salomo-
 nis in Ochusia defecisse. Qua in re duo animadver-
 tere oportet, quae nobis dicenda sunt pro tota respon-
 sione ad rationem istam, cum ipsum Philonis librum
 minime habeamus. Altera istarum rerum est, quod
 illi ipsi, qui testimonium hoc Philonis citant, faten-
 tur, in Philone, quem ipsi vidissent, testimonium i-
 stud non extare; sed illos qui ita statuerant, quod
 scilicet testimonium istud apud Philonem extet,
 auctoritatem secutos fuisse illius, qui ipsum Philonis
 librum edidit. Altera res consideratione digna est,
 quod iste libri illius editor, fuit Monachus quidam
 ordinis Dominicani, cuius nomen erat Iohannes An-
 nius Viterbiensis, qui floruit annis ab hinc circiter
 140. Sciendum enim est virum istum, licet alioqui
 rerum antiquarum indefessum indagatorem, & me-
 ritò, quod ad hanc partem litteraturae attinet, inter
 eruditissimos ac praestantissimos numerandum, ta-
 men quaecumque eius rei fuerit causa, libros alios ejus-
 modi veteres edidisse, qui a recentioribus multum,
 testimonio Iosephi & aliorum clarissimorum scri-
 ptorum, magna ex parte adulterini esse convincun-
 tur. cuiusmodi est Berofus Chaldaeus, qui nunc in o-
 mnium ferè manibus versatur, & Metastenes Per-
 sa, nec non Maneto Aegyptius. Ex quibus priores duo
 potissimum, praecipue verò Berofus, ita ut illum ab
 Annio editum habemus, multum in locis minime cum
 eo consentit, quod de eo nominatim apud Iosephum,
 rectè memini, in ejus libro adversus Appionem

Grammaticum, scriptum invenitur. Quare non videtur ullo pacto temere isti testimonio Philonis, quod istos movit, fidem adhibendam esse; præsertim cum rem planè contrariam in ipsis sacris libris scriptam habeamus. Opus est tamen interea ad rationes duas respondere, quas, ni fallor, Calvinus adfert, ad ostendendum, quòd Ochosias nullum filium reliquerit, & quòd Ioas, qui in locum ejus post Athalia tyrannidem successerit, non fuerit Ochosie filius. Una ratio est, quòd si Ochosie filius fuisset: Athalia non curasset omni studio ut illum interficeret, adeò ut necesse habuerit Iehosabat, ipsius Ochosie soror, illum occultare. Nam, inquit, multò meliùs ac tutiùs regnare potuisset Athalia sub isto prætextu, quòd nepotii regnum administraret. Ad quam rationem sic respondendum videtur. Primum, ex ipsa historia posse apertè intelligi, non Ioam tantùm fuisse Ochosie filium, sed alios plures. Dicitur enim ibi, tam cap. prædicto 11. 2. lib: Regum: quàm cap: 22. 2. Paralipomenon, quòd soror ista Ochosie furata fuerit Ioas e medio filiorum regis, qui interficiebantur. Verisimile est autem istum omnium minimum fuisse, & propterea non ab ipso, sed ab aliis ejus fratribus, qui jam grandiusculi essent, initium factum esse occidende stirpis regie. Erat enim Ochosias cum mortuus est annorum 41, si quidem cum ad regnum est erectus 40 annorum erat, regnavit autem in Iuda annum unum. Ex quo intelligi potest, illum potuisse filios relinquere, qui iam grandiusculi essent. Quapropter cum & plures essent, & maximus natus non planè

planè infans, non videbat Athalia, quomodo regnum occupare posset, & plenè dominari, nisi funditus stirpem regiam delevisset. Nam si majores tantùm natu occidere voluisset, jam hoc eius factum omnino impediturum fuisset, quominus admitteretur, ne illa nomine nepotis superstiti alicuius regnum administraret, nec potuisset ipsa sub hoc prætectu jam populo imponere. Itaque necesse habuit, per apertissimam vim regnum invadere, quam dum exercet, & ut scriptura loquitur, omne semen regium perdit, evasit nihilominus, amita operâ, Ioas iste, qui adhuc lactebat, ut ex eo potest intelligi, quod in historia dicitur, eum cum ipsius nutrice absconditum fuisse a facie Athaliae, atque ea ratione non fuisse interfec-
tum.

Altera ratio Calvini est, quòd nullo modo sit verisimile, Ochosia filium tam diligenter potuisse occultari, quin diligentius ab Athalia conquireretur, & porrò inveniretur. Atqui haec ratio non minùs locum habet, modò Ioas ex stirpe regia fuerit, ad quem regni successio post Ochosiam pertineret. Nam Athaliae eam penitus delere omnino propositum fuisse, ex ipsa sacra historia evidenter apparet. Sed non minùs evidenter ex eadem historia, & ex ipsius Calvini, & aliorum quos ipse sequitur, cõfessione constat, Ioam fuisse ex regia stirpe, ad quem regni successio spectabat, cum disertè historia illù ipsius Ochosia filium nominet, quòd ipse Calvinus & alii ob id factum esse volunt, quòd is proximus ac legitimus in regno successor Ochosiae esset, qua de re

suprà a nobis satis disputatum est. Nō igitur quod vereamur cōstanter affirmare, quemadmodum quidem plerique docti viri censere videntur, Solomonis stirpem minimè in Ochostia defecisse, & consequenter conciliationem istam non esse admittendam, ut scilicet dicamus, non esse discordes Mattheum & Lucam in suis Christi genealogiis, quia Lucas, cum per Nathanum deducit genealogiam suam, naturalis propagationis rationem habuerit, Mattheus verò dum per Solomonem idem facit, legatis.

Sed habet præterea sententia ista ac conciliatio plurimum difficultatis, & inter alias hanc, quòd ab isto Ioas, quem volunt apud Lucam Simeonem vocari, usq; ad Selathielem generationes numerantur plures unâ, quàm sint ille que extant apud Mattheum, illis numeratis quos ipse prætermisit. In hoc enim alioqui omnes consentire videntur, quòd is, qui apud Mattheum & Lucam Salathiel vocatur, sit unus & idem homo; id certum est, illos, qui conciliationem istam, quam nos minimè approbamus, sequuntur, pro certo istud habere ac statuere. Quinimmo satis apparet hanc fuisse causâ potissimam, cur ipsi post istud Philonis testimonium sententiam istam amplexi fuerint. Animadvertens autem unus ex illis id, quod diximus de maiore numero generationum, ait, in Matthei genealogia, quemadmodum Ochostias, Amasias, & Asarias adduntur ab omnibus, sic præterea post Iosiam non tantum Ioaehim, quod a plerisque fit, addendum esse; sed etiam ante Ioaehim Leochanam, qui fuit primogenitus

Iosias,

Ioseph, eique prius in regno successit. Atqui hoc ni-
 bil est, cum tertia ista conciliatio omnino ferat, u-
 nam perpetuò naturalis propagationis rationem ha-
 buisse, ita ut necesse sit Melchi a Luca nominatum,
 quem, secundum conciliationem istam, eundem esse
 oporteret cum Ioachim apud Matthæam, ab Addi,
 qui idem cum Ioachaso isto esset, verè generatum
 fuisse, & sic Ioachimum fuisse Ioachasi filium, cum
 tamen certum sit, non filium fuisse sed fratrem ex
 eodem patre Ioseph natum. quod quàm sit verisimile,
 cum Ioachim qui post ipsum numeratus esset, non ip-
 sius filius, ut verba Matthæi ferunt in aliis quos enu-
 merat, sed frater fuerit, viris cordatis iudicandum
 relinquo. Sed iam ad reliqua, quæ ad istam tertiam
 conciliationem examinandam pertinent, explican-
 dâ accedo. Animadvertendum enim est eos, qui
 tertiam istam conciliationem amplectuntur, quam-
 vis in eo diversè sentiant, quòd quidam existimant
 a Luca describi genealogiam Mariæ, non autem Io-
 sephi, quidam verò sentiunt, non minùs a Luca quàm
 a Matthæo Iosephi genealogiam describi, tamen in
 eo utriusque conveniunt, ut dicant, eos omnes, qui
 post Ioram in Matthæo habentur, usq; ad Sathielem,
 quamvis singulos aliis nominibus nominatos quàm
 apud Lucam, tamen esse eosdem unà cum iis, qui ab
 ipso Luca nominantur, a Simeone sursum versum
 usq; ad Salathielem. Nam qui censent Iosephi ge-
 nealogiam ab utroque describi, ii necesse habent
 contendere, non modò hos, sed omnes usq; ad ge-
 nealogiæ finem eosdem esse; quemadmodum rursum

quò

qui volunt a Luca Marie genealogiam describi, necesse habent contendere, non omnes esse eosdem. Repetendum autem hic illud est, quod supra docuimus, eos qui putant Osiā a Matthæo nominatum, eundem esse cum Ochosiā, & ita tres qui eo in loco desiderantur esse, Ioām, Amasiā, & Asariā, non leviter falli. Nam Osiās iste non Ochosiās est, sed Asariās, qui & Osiās nominatus est, ut patet ex lib: 4. Reg: cap: 15. Itaque qui desunt apud Matthæum, non quidem tres isti sunt modò nominati, sed Ochosiās, Ioās, & Amasiās, quemadmodum supra alibi a nobis dictum est. Iam verò cùm omnino necesse sit, utrosq; velimus sequi qui istam tertiam conciliationem probant, ut post Ioām, ut diximus, usq; ad Salathielem iidem sint qui nominantur a Matthæo, cum totidem eorum qui ante Salathielem a Luca nominantur, apparet conciliationi isti aliud, præter illa, que diximus, objici posse satis magni momenti. Nullo enim pacto verisimile videtur, ut tot reges, inter quos non pauci præclarissimi fuere, omnes aliis planè nominibus a Luca nominentur, quàm ex ipsis litteris doceamur, quales sunt Amasiās, Asariās, Ezechias, Iosias, quorum nomina & fama, præsertim verò Ezechie & Iosie, sūnam celebritatem habent; adeò ut nimium absurdū videatur, tãtos reges tamq; celebres, & quod caput est, valdè pios, nominib; obscuris quibusdam & incognitis, ac de quibus nihil aliud prorsus alibi constet, a Luca nominatos fuisse. Que una ratio apud me tantri est ponderis, ut, etiamsi nihil aliud præterea haberemus, quod isti

tertia

tertia conciliationi objiceremus, vel ob hoc solum
 eam penitus rejiciendam esse arbitraturus essem.
 Causa potissima, ut antea dictum est, huius senten-
 tia, quod isti iidem sint apud Lucam qui apud Mat-
 theum, fuerunt nomina Salathielis & Zorobabelis,
 qui omnino iudicati sunt propter eadem nomina,
 iidem etiam esse apud utrumq; Euangelistam, quod
 nos tamen minus verum esse credimus. qua de re a-
 liquid apertius explicabimus mox in secunda con-
 ciliatione, quam nobis probari praeter alias diximus,
 tractanda & explicanda. Non existimo autem istius
 diversitatis, quam esse diximus inter utrosq; istos
 tertiae conciliationis assertores, ullam aliam causam
 fuisse, nisi quod quibusdam nimis durum visum est,
 nullum prorsus nomen usque ad genealogiae finem,
 a loco illo quem diximus, apud utrumque evangeli-
 stam idem esse. Quam absurditatem ut vitarent
 quidam, propterea noluerunt a Luca, quemadmo-
 dum a Mattheo, Iosephi sed Mariae genealogiam
 describi. Atqui mirum est cur isti, etiamsi non tot
 nominum, tamen multorum & quidem praestantissi-
 morum virorum, perpetuam diversitatem nihili fe-
 cerint, neque absurdam esse, ut debebant, omnino
 statuerint. Adde, quod istorum sententia, de genea-
 logia Mariae a Luca descripta, alius rationibus evin-
 citur esse falsa, quemadmodum superius a nobis de-
 monstratum fuit. Non est igitur ut ullo modo pute-
 mus, tertiam istam conciliationem, quae tota eo con-
 tinetur quod in Ochozia stirps Salomonis defecerit,
 & sic a Mattheo legalis propagationis habita fuerit
 rati

ratio a Luca verò naturalis, ullo modo sustineri posse.

Ad reliquam igitur conciliationem, quam secundo loco ab initio recensuimus, deveniendum est. Dicimus igitur nobis valde probari, quòd in ipsa tantum Iosephi persona Matthæus naturalem filiationem ipsius Iosephi, Lucas verò legalem secutus fuerit. in eo tantum est difficultas, qua ratione explicanda sit ista legalis Iosephi filiatio. Duobus enim nec pluribus hactenus modis eam acceptam esse invenio, quòd scilicet Iosephus vel ab Eli adoptatus fuerit, vel eius filius dicatur, quamvis naturalem patrem alium haberet, quia ù naturalis pater semen suscitasset, ut scriptura loqui consuevit, ipsi Eli. Quòd Iosephus ab Eli adoptatus fuerit, censuit, ut supra indicavimus, Augustin^o, nec invenio adhuc qui ipsius sententiam, vel sequatur, vel rationibus refellat. Nec mirum est, cum omnibus ferè libris, ad hanc rem necessariis, destituar. Dicam tamen de sententiâ ista quid sentiam. Illud autem est, eam mihi propterea non admodum probari, quia nec ullum vetus testimonium habet, & modus iste faciendi sibi filios per adoptionem, vix in sacris litteris nominatur. Itaque existimo alteram sententiam multò probabiliorē esse, ut scilicet Iosephus propterea duos patres haberet, Iacobum et Eli, unde ista diversitas genealogiarum apud utrumq; Evangelistam manaverit, quia Iacob a Salomone descendens ejus verus ac naturalis pater fuerit, Eli verò a Nathane, non minus quàm Salomon Davidis filio, prognatus, eius fuerit legalis pater; ut pote cuius semen Iacob suscitaverit. Habet enim sententia ista primùm a vetustate testimonium valde amplum.

Nam apud Eusebium lib: 1. Ecclesiastica historia
 cap: 7. habemus ipsa verba descripta Aphricani ve-
 rustissimi & nobilissimi scriptoris, ex ipsius episto-
 la quadam excerpta, quam ad Aristidem scripse-
 rat de conciliatione Evangelistarum. Quorum verbo-
 rum hæc summa est, quod antiqui tradidissent istud
 quod diximus, de duobus Iosephi patribus naturali &
 legali; idq; hac ratione contigisse notatum posteris
 reliquissent, quod scilicet Matthan, naturalis avus
 Iosephi, & Iacobi pater uxorem duxisset, cuius etiam
 nominis memoria manserat, Est enim vocabatur,
 quam post mortem ipsius Melchi pater Eli duxisset,
 ex eaq; ipsum Eli progenuisset, unde fiebat, ut Iacob
 & Eli uterini fratres essent ex eadem matre nati.
 Contigit autem ut Heli, quamvis minor natu, prior
 diem suum obiret post cuius mortem Iacobus, quippe
 eius frater, eam quæ Heli uxor fuerat, uxorem habu-
 erit, eamq; ad suscitandum fratris semen duxerit. Ex
 quo secundo istius femina matrimonio, primogenitus
 natus sit Iosephus, qui, ex lege quæ habetur Deut: 25.
 cap., in semine non Iacobi sed Eli censeretur. Ante-
 quam verò, quæ possunt huic sententiæ obijci, com-
 memorem atq; refellam, illud animadvertendum
 est, unde possit fieri, quod in ista historia duo viri re-
 tinentur, qui apud Lucam in genealogia illa habentur,
 in qua non Melchi, quemadmodum historia ista
 fert, sed Matthat dicitur esse avus Iosephi; nam Mel-
 chi apud Lucam, qui primò in illa genealogia nomi-
 natur, non quidem avus, sed abavus Iosephi fuisse
 ponitur, interiectus inter Eli & Melchi Matthat &
 Levi, quæ res posset falsitatis suspectam alicui red-

dere istam ab Aphricano recitatam historiam. Sed non est verisimile, eum, qui illam consingere voluisset, hac in re tam turpiter errasse, tamq̃ supinum fuisse, ut id non animadverteret quod diximus. Quare censendum est, variasse tunc temporis exemplaria Evangelii Lucae in loco isto, & multa exemplaria fuisse, quæ istos duos Matthæ & Levi, qui hodie in omnibus exemplaribus habentur, planè omitterent, & secundum exemplaria ista historiam, ab Aphricano litteris mandatam, proditam fuisse.

Videamus igitur, an aliquid solidius possit isti sententia obijci. Illud autem videtur eiusmodi esse, quòd in lege illa Deuteronomii fratrum sit mentio qui simul habitent, atque, ut necessariò inde colligi videtur, hereditatem adhuc communem habeant, id quod de Iacob & Eli, qui tantùm fratres uterini erant, & consequenter communem eandem hereditatem paternam non habebant, dici non potest. præsertim cum alioqui ipsorum inter se cognatio, nimis e longinquo suam originem duceret, nempe a Davide rege. Cæteròquin enim facile responderi potest ad id, quòd fratres ex eodem patre non essent. Primum enim scimus hebraica phrasi, quemadmodum etiam apud alios id invaluit, eos nominari fratres, non tantùm qui ex eodem patre sint nati, sed eos etiam qui ex eadem sint consanguinitate, quos, nisi nimis longinquo gradu inter se distent, nihil prohibet posse etiam hereditatem communem habere, patrimoniale, inquam, hereditatem, id est, quæ ad genus & stirpem ipsorum patrum pertineat.

Præte-

Præterea ex historia libri Ruth manifestè constat, legem illam Deuteronomii locum habuisse, etiam inter eos qui fratres non essent, modò ex eadem essent cognatione, & alter alteri omnium aliorum proximus. Dicitur enim ibi, in Ruth inquam historia, quòd mortuo Elimelecho, & post ipsum ejus filio Machlone, qui Ruth vir fuerat, requisitus est ab ipsa Ruth, docente ac monente socru Noemi, Boozus, ut vellet ipsam Ruth & bona quæ fuerant Machlonis & Elimelechi vindicare, ut pote qui ipsorum propinquus esset. Sciendum est enim, præter id quod in prædicto loco Deut: habetur, in Levitico cap: iidem 25. legem perscriptam esse de vindicandis bonis a suo propinquo, & ex eadem familia nato, qui mortuus fuisset divenditù. Itaque in casu prædicto historie Ruth, contingebat ut utraque lex locum habere possit, cùm præter bona Elimelechi & ejus filii Machlonis, quæ divendita fuerant, superesset etiam ipsius Machlonis uxor, nempe Ruth. cuius precibus Booz permotus dixit, se præsto esse, ut id faceret quod illa rogabat, sed alium esse se propinquiorem ad quem id facere pertineret, qui si id recusaret, tum demum se facturum. Quare iussit Booz in porta ipsius oppidi, quod Bethlehem erat consistere istum propinquiorem se, qui illac transibat, ibiq; coram decem senioribus ipsius oppidi, re tota narrata, monuit istum ut vindicaret bona illa, & Ruth in uxorem duceret, id quod ille recusavit facere, & sic Booz secundùm promissum suum id ipsum fecit, & tamen Booz non modò non fuerat frater, propriè loquendo,

quendo, prioris mariti Ruth, sed minus erat illi propinquus quam quidam alius, & tamen in ipso locum habuit lex non Levitici modo, verum etiam Deuteronomii, ipsūq. Ruth duxisse uxorem ad suscitandum semen Machloni priori eius viro, sic enim habent ipsius Booz verba ad seniores illos. Testes estis hodie, quod acquisiverim omnia quæ fuerint ipsius Elimelech, & omnia quæ fuerant ipsius Chilion & Machlon, de manu Noemi. Sed et Ruth Moabitidem uxorem Machlonis acquisivi mihi uxorem, ad suscitandum nomen defuncti, in hereditate sua &c. Ex quibus verbis aperte constat, in hoc casu fuisse executioni mandatam illam Deuteronomii legem, præsertim cum etiam in toto hoc negotio conficiendo, cum propinquior ille recusaret id facere quod Booz fecit, ceremonia illa intervenerit detrahendi calceum, de qua disertè præceptum est in prædicto Deut: loco. Et est præterea animadvertendum, quod propinquior ille propterea recusavit id facere quod rogabatur, quia, inquit, non possum redimerem mihi, ne forte deleam hereditatē meam. Quorum verborum hic videtur esse omnino sensus, se nolle periculum subire, ne potest mortem suam, nulla ipsius hereditas nominaretur, sed tantum prioris mariti, cui Ruth nupserat; nam si ex ea unum tantum filium suscepisset, is, vi prædictæ legis, non ipsius filius, sed prioris mariti nominandus, totam ipsius hereditatē, tam eam quā vendicaverat, quā sam quam antea habuerat, possedisset, & sic ipsius

*naturalis patris nomen post ipsius mortem abolicum
 fuisset, & ut diximus, hinc factum est, ut si recusa-
 verit Ruth uxorem ducere. Vbi obiter notandum est,
 haberi isthic locum, ubi manifestè verbum posse
 significat velle, seu, Nō possum facere, idem est, quod
 Nō sum facturus. Hoc autem monere voluimus pro-
 pter loca non pauca, ubi ad eundem modum in nova
 Testamento verbum posse accipiendum est, inter
 quae sunt celebra illa duo Rom: 4. & Heb: 11, in quo-
 rum priorē scriptū est, plenè persuasum habens,
 eū quod promiserat posse etiā facere. Vbi sine
 dubio Posse etiam facere, significat, facturū etiam
 esse. In altero verò loco, ubi de eodem Abrahamo, de
 quo in isto priorē verba fiunt, scriptū est, cum illud
 secum perpenderit, Deū, vel a mortuis exci-
 rare posse. Quē locū nos, in nostra Disputatione de
 Iesu Christo servatore, docuim⁹ ita accipiendum esse,
 ac si scriptum foret, Deum vel a mortuis suscitatu-
 rum. Videmur objectioni quae fiebat isti secundae
 conciliationi, quod scilicet Eli & Iacob non essent
 fratres consanguinei, nec eandem hereditatem pa-
 trimonialem haberent, fecisse satū exemplo isto ex
 historia Ruth. Sed remanet tamen difficultas alia,
 quam superius attigimus, quod scilicet nimis longin-
 quo gradu consanguinitatis iuncti essent isti duo. nec
 enim verisimile videtur, ut solus Eli ex stirpe Na-
 thanis cum mortuus est inveniretur, ita ut eo mortuo
 iam stirps illa penitus interisset, ita ut nullus gradus
 agnationis propinquior ipsi Eli inveniretur, quàm a-
 liquis qui ex altero Davidis filio, nēpe Solomone ge-
 nus su-*

nus suum duceret, qualis Iacob erat, cuius scilicet esset ducta uxorē Eli, ei semen suscitare: eo concessō, quod ex prædicta historia Ruth probari omnino videtur, satis esse, ut is qui id facturū esset, propinquissimus omnium inueniretur. Non est, inquam, verisimile rem ita se habere, ob id quod diximus de tota Nathanis stirpe extincta, quod necessarium ad hoc fuisset. Nam, quod Iacob et Eli uterini fratres essent, quod & potissimum & solū videtur respicere Africānus, cum historiam illam exponit, ut Evangelistas inter se conciliet, hoc non videtur ad rem facere, cum fraternitas ista, ut ita loquar, non pertineat ad agnationem & ad eandem patrimonialē hereditatem: cuius rei potissima ratio haberi videtur, in illa Deut. lege. Immo hoc quod isti fratres uterini fuisse dicantur, cum ad hoc probandum historia illa referatur, & qui ea utuntur, huc tantummodō respiciant, videtur falsitatis suspectam reddere historiam istam, si, ut dictum est, ejusmodi fraternitas nihil ad rem facit. Videtur enim aliquis id confuisse, existimans, cum Deut. lex de fratribus loquatur, satis fore, si historia narretur, ex qua constet istos duos fuisse fratres, si non ex eodem patre, saltem ex eadem matre. Immo legenti historiam istam apud Eusebium, satis constare videtur, eos, qui illā utuntur ad Evangelistas conciliandos, putasse necessarium fore, ostendere, quod Eli & Iacob essent aliquomodo fratres: fratres inquam, eo sensu, quo appellatio ista in usu latine lingue est. cum tamen ex eadem illa historia Ruth liquido appareat, id necessari-

cesarium non esse. Quid igitur ad hæc dicemus? Nempe cum aliunde constet, historiam istam, quod Iacob eâ ductâ quæ fuerat uxor Eli, ipsi Eli semen suscitaverit, ab omni antiquitate communiter receptam fuisse, hinc concludi debere, vel Nathanis stirpem post Eli mortem omnino defecisse, vel usu apud Iudeos invaluisse, ut lex illa Deut: locum haberet etiam in fratribus uterinis, præsertim si contigisset, eam, quæ istorum mater fuisset, heredem fuisse sui patris; quemadmodum fieri facile potest, ut in ea, quæ uxor Eli fuerat, evenerit. Sed, ut diximus, satis per se verisimile videtur, ut lex illa Mosis ad uterinos etiam fratres porrecta fuerit. Quod autem historia ab Aphricano relata, fuerit communiter recepta, indicant verba ipsa Eusebii in loco supra citato: eo præsertim addito, quod Aphricanus eâ referendâ testatur, sic scilicet traditum a maioribus fuisse. Adde, quod auctor questionum ad Orthodoxos, quæ falso Iustino inscribuntur, in responsionibus ad questiones 66. & 133. apertissimè pro concesso sumit, rem ita se habere, ut scilicet, Iosephus maritus Mariae, propterea diceretur & esset secundum legem filius Eli, licet non ex ipso revera natus, sed ex alio patre, nempe quia ñ naturalis pater, ex ea quæ Eli uxor fuerat, illum genuisset, ita, inquam, hoc scriptor ille pro concesso sumit, ut satis constet, tunc temporis, neminem inter eos qui Orthodoxi haberentur fuisse, qui id verum esse negaret. Quamvis autem scriptor iste non tam antiquus fuerit ut Iustinus, cui opus illud inscribitur, sed duobus saltem post seculis,

ut verissimile est, floruerit, tamen non nisi vetustus author ac fide dignus hac in parte haberi potest & debet. Fraterea Hieronymus, ut eum citat Sixtus Senensis, in sua Bibliotheca Sancta, lib: 7. hanc historiam veram esse credidit, & secundum eam in Mattheum scribens diversitatem istam Genealogia Christi inter Evangelistas conciliavit. Accedit quod Augustinus eodem Sixto in eodem libro referente, cum prius, ut dictum est, ita conciliandos esse Evangelistas censeret, ut diceretur Eli fuisse pater adoptivus Iosephi, id quod apud ipsum Augustinum dicit Sixtus haberi lib: 2. cap: 3. de consensu Evangelistarum, postea tamen, cum in narrationem Historie illius ab Aphricano relata incidisset, sententiam mutasse videtur, & omnino isti Historie totus adhaesisse, ut legere est, eodem Sixto citante, apud ipsum Augustinum lib: 2. Retractationum cap: 7. Eusebius quoque, qui sanè vir magnus fuit, & Aphricano excepto, istum omnibus antiquior, eandem istam historiam, dum eam ex Aphricano recitat, omnino etiam probat. Itaq; satis habemus & autoritatum & rationum ad confirmandam historiam istam.

Sed tamen adhuc ad alia respondendum est, qua possunt obijci ei historie parti, quod & Eli & Iacob, uterq; reverà, quamvis ab eodem Davide prognatus, tamen alter quidem per Solomonem, alter verò per Nathanem progenitus fuerit. Primum valde videtur obstare, quod tam in Genealogia Eli, quam in Genealogia Iacobi fit mentio Salathielis & Zorobabelis, hujus tamquam filii, illius verò ut
 patris,

patris, quemadmodum eadem planè ratione iidem, Salathiel & Zorobabel, nominantur in Genealogia Iacobi. Verisimile est enim istos, eosdem utrobique esse, quod nulla ratione fieri potest, si ex diversis progenitoribus due istæ Genealogie deducuntur. Et sane, ut antea monuimus, hæc videtur esse potissima causa, cur affirmatum ab aliis fuerit, Matthæum post Ioram jam non veros & naturales descendentes Solomonis enumerasse, sed qui tantum legales erant, id est, progeniti fuerant ex Nathanis stirpe, ad quam devoluta fuisset successio regni, quæ istos legales descendentes Solomonis faciebat, ipsa videlicet, naturali Solomonis stirpe jam extincta. Sed nos jam satù demonstravimus, totum hoc a veritate longè abhorrere. Quare, ad objectionem adversus hanc secundam conciliationem, quam sequimur, modo a nobis factam, respondendum est, nihil vetare quominus, etiamsi eadem sint nomina utrobique; apud Evangelistas patris & filii, tamen non eosdem homines utrobique fuisse. Cum enim Salathiel & Zorobabel, præsertim verò Zorobabel, ex stirpe Solomonis, ut quidem nos censemus & scriptura abunde testatur, verè nati, insignes admodum viri fuissent, nihil vetat in iis, qui ex stirpe Nathanis erant, ad tantorum virorum memoriam renovandam, eadem nomina aliis indita fuisse. Huc accedat, quod cum ex Historia sacra lib: 1. Parap: cap: 3. aperte constet, Zorobabelem non fuisse revera Salathielis filium, sed tantum nepotem ex Pedaia Salathielis filio ortum, nullo pacto est verisimile, Lucam, qui

nullam causam habebat, ne unum quidem ex tota
 illa genealogia reticendi, Pedaiam verum patrem
 illius Zorobabelis, qui a Matthæo commemoratur,
 reticuisse: ipsumq; Zorobalem filium fecisse illius,
 cujus erat reverâ nepos. Nam si Matthæus id fecit,
 nihil planè est mirum, quia certissimum est, illum
 antea non paucos alios reticuisse, & non solùm ne-
 potem, sed abnepotem etiam pro filio posuisse, quem-
 admodum antea a nobis demonstratum fuit, & ab
 omnibus est animadversum. Voluit enim, ut dictum
 est, constare numerum illum, in tripartita illâ sua
 genealogia ubiq; 14. generationum. Quare tan-
 tùm abest, ut censere debeamus, tam apud Lucam
 quàm apud Matthæum eosdem esse istos Salathie-
 lem & Zorobabelem, ut potiùs, contrarium ex ipsa
 met ratione genealogiæ scribendi, quam uterq; E-
 vangelista secutus est, separatim alter ab altero,
 colligi a nobis debeat. Nam diversa ista utriusq;
 Evangelistæ ratio, potuit etiam per se efficere, ut
 Matthæus, qui scilicet non tam exactè hac in re
 versari curavit, ut Lucas, satis habuerit, quod in ip-
 sa sacra veteris Testamenti historia alicubi, & non
 semel Zorobabel Salathielis filius vocatus fuerit, ut
 supra a nobis indicatum fuit. Sequitur alia objectio,
 quòd scilicet parum sit verisimile, quòd eodem tem-
 pore in stirpe Nathanis multò plures generationes
 extiterint, quàm in stirpe Solomonis. Incipiendo ab
 eo loco genealogia, post quem postea non apparet ul-
 lum in Solomonis stirpe, que in conciliatione ista a
 Matthæo enumerata ponitur, prætermissum fuisse.

Hac objectio est satù lavis. Primum propter id, quòd etiamsi ea de re nihil alioqui constet, tamen verisimile est Matthæum, in tertia parte sue Genealogia, ut constaret numerus ille 14 generationum, non paucus prætermisisse. Deinde, & quidem multò firmitus respondetur, nihil impedire, quin in duabus diversis stirpibus eodem tempore, id est, per idem temporis spatium, generationum numerus sit valde dispar. Habemus hujusce rei exemplum luculentissimum in stirpe Jagellonica, & Austriaca. A nato enim Vladislao Jagellone, usq; ad natum Sigismundum Augustum pronepotem ipsius, numerantur anni plus minus 163. at rursus, a nato Maximiliano 1. Imp: ad natum Philippum secundum Hispania regem ejus similiter pronepotem, non numerantur nisi anni circiter 70. Adeò, ut totidem generationes hùc extiterint 70 tantùm annorum spatio, quot ibi centum sexaginta trium. Itaque nihil mirum videri debet, etiamsi nullus descendentium prætermisus fuisset a Matthæo stirpis Solominica, a jam dicto loco incipiendo, tamen non conveniret numerus istarum generationum, cum numero illarum stirpis Nethanica a Luca descriptæ eodem tēporis spatio, sed novem circiter generationib: minor esset. Quod nihil est, præ eo, quod evenire posse ostendunt exempla a nobis modo allata: præsertim cum spatium ibi ferè triplo longius fuerit, quàm hùc in exemplis, inquam, istis que attulimus. Non est etiam reticendum id quod superius attigimus, quòd apud Matthæum post Zorobabelem nullus nominatus inveniatur, cujus nomen

conveniat cum veris Zorobabelis descendantibus, enumeratis prædicto Par: libro: 1. cap: 3. Hoc enim omnino indicare videtur saltem post Zorobelem, Mattheum non naturalem & veram Solomoniam stirpem enumerasse, sed legalem fortasse aliquam, quæ eadem sit cum stirpe Nathanica, quam Lucas enumeravit. Et quia superius diximus nobis verisimilius videri, istos omnes binomines fuisse, quàm quod Abiud, qui a Mattheo ponitur Zorobabelis filius, ab auctore libri Paral: prætermisus fuerit, cum alterutra ex istis rationibus sit obiectio ista dissolvenda, liberum, in non obstantibus quæ supra diximus, unicuique facimus, quod quidem attinet ad sententiam nostram, utram velit istarum rationum sequi: cum alioquin ex iis, quæ antè a nobis disputata sunt, & postea fortasse dicentur, satis constet, Mattheum veram & naturalem Solomonis stirpem in Genealogia Christi a se descripta secutum fuisse. Non reticebo etiam propter viri auctoritatem, aliam obiectionem, quæ fieri posse videatur conciliationi istius, quam nos amplectimur. Augustinus enim lib: 2. Quæst: Evangelicarum cap: 5. teste eodem Sixto in loco ante indicato, quamvis nondum sciret, Historiam de ratione, quomodo Eli legalis Iosephi pater fuerit, ab Aphricano fuisse tam luculenter descriptam, tamen noverat modum istum conciliandi Evangelistas, quippe qui ut paullo ante docuimus, in ipsa Ecclesia notus & receptus esset: sed interim tamen eum non probabat, quia verba legi Deut: cap: 25. ubi dicitur. Erit autem primogenitus quem

quem pepererit, stabit nomine fratris sui defuncti; ne deleatur nomen ejus ex Israele, ita interpretabatur, ut voce nominis intelligeretur nomen quo defunctus vocabatur, nempe in casu, de quo agimus, nomen Eli, ita ut secundum legem istam, necesse fuisset, ut Jacobi filius naturalis, ex ea que uxor Eli fuerat natus, vocaretur Eli: quod cum non evenisset, quippe cum non Eli sed Iosephus vocaretur, censuit eo in loco Augustinus, rationem istam Evangelistas conciliandi rejiciendam esse. Sed postea rem melius considerans, vidit voce nominis istud minime significari, sed ea voce declarari debere, eum qui primogenitus ex matrimonio isto fuisset, haberi & appellari filium simpliciter defuncti prioris matris sue mariti, & consequenter, priorem istum matrum patrem ejus perpetuo nominandum. Hoc, inquam, Augustinus animadvertit, & seipsum corrigens scripsit eodem libro secundo Retractionum cap. 12.

Credimus abunde satis per nos responsam ad ea fuisse, que videantur posse objici conciliationi ista quam ipsi maxime probamus. Vbi illud etiam non videtur ad aliquam conciliationis istius confirmationem omittendum, quod prestantissimi quidam viri attingunt. Illud est, quod Lucas non perinde ac Matthæus in sua Genealogia exponenda usus est generandi verbo, sed tantum ait; Iosephi, & aliud id est simpliciter, qui fuit Eli, ut scilicet hac ratione posset patrem, quamvis non naturalem, eo in loco ponere, utrumque enim verum est, videlicet neque eum, cui se-

men

men suscitatum fuerat, generasse illum, qui post ipsius mortem ex eius uxore natus fuerit, & tamen ipsum eius esse, & quidem ex legis decreto, filium. Est enim obiter hic monendum, etiamsi Lucas in istis verbis filii nomen non posuerit, tamen illud ex precedentibus repetendum esse. Dixerat enim ante, Erat autem Iesus quasi annorum 30, ut putabatur filius Iosephi. Itaque cum postea subiicit statim, qui fuit Eli, subaudiendū est sine dubio filius. quæ vox ab ipso breuitatis & elegantia causa, in tam longa generationum enumeratione consulto ac merito fuit omissa. Quamquam nihil est opus repetitione ista ex precedentibus vocis filius in loco isto, cum hæc phrasis exempli causa, Iosephus Iacobi, ita per se prolata, significet, tum apud prophanos, tum verò apud ipsos sacros autores, Iosephum Iacobi esse filium. Habetis huiusce rei exemplum in Evangelii, inter cetera in filiis Zebedei Iacobo & Iohanne apostolis. Illi enim simpliciter vocantur alicubi Zebedei, genitivo scilicet casu, numeri singularis, huius nominis Zebedæus, ut apparet de Iacobo cap: 10. Matthæi, & 1. ac 3. Marci. Hoc igitur in sacris litteris ipsius receptissimum est, ut cum vir aliquis, seu maritus, homo aliquis masculini generis, alicujus esse dicitur, is, cuius esse dicitur, sit ejus pater. Quemadmodum in foeminis, is, cuius aliqua esse dicitur, ejus maritus est. Quod si is, qui voluerunt dictum fuisse Iosephum Eli hoc est Græcè Πύλι, propterea quòd Eli fuerit Iosephi socer, habuissent exemplum aliquod quo id confirmarent, tolerabilior esset ipsorum opinio. Sed nullum ni

lum, ni fallor, habent. Inveni tantum quod Matthias Flaccius Illyricus, qui istius est opinionis, & ex numero illorum, qui quantumvis velint in Ochozia stirpem Solomonis defecisse, tamen nihilominus arbitrantur a Luca genealogiam non Iosephi sed Mariae describi. Inveni, inquam, quod ibi vir iste ob praedictam suam sententiam statuit dictum fuisse Iosephum esse $\Phi\acute{\iota}\lambda\iota$, quamvis Eli non pater, sed socer Iosephi esset, motus exemplo quodam ex Actis Apostolorum petito, cap. 7. v. 16., ubi Stephanus vocat Hemor $\Phi\sigma\iota\chi\epsilon\mu$, cum tamen legatur Sichem non fuisse patrem sed filium Emor, ut habetur Gen. cap. 33. & Iosue cap. ultimo. Ex hoc enim Flaccius sic infert. Quemadmodum in isto loco Actorum Sichem genitivo casu positum, non significat, ut solet, patrem, sed filium, ita & in loco apud Lucam cap. 3. non est mirum, si Eli generandi casu positum, non patrem declaret, sed socerum. Et sanè ante ipsum Illyricum fuerunt viri docti, qui in illo loco verborum Stephani censuerunt addendum verbis Graecis non filii, ut in vulgata editione legitur, sed patris, inter quos est is, qui in Bibliis, quae vulgò Vatabli dicuntur, eas annotationes fecit, aut collegit, quae habentur in Novo Testamento, horumq; sententiam in sua translatione secutus est Beza. Verum nos aliter omnino sentimus, cum habeamus pro significatione prorsus inusitata, ut nomen generandi casu positum, & ab alio nomine rectum, filium significare possit. Nec credimus usquam alibi ejusmodi phrasim cum significatione ista reperiri. Sed quia hac ratione videretur, nisi aliud dice-

diceremus, argui Stephanus & Lucas falsitatis, cum, ut dictum est, constet, Sichem fuisse filium Emor, necesse est ut aliquid præterea dicamus, & ostendamus quomodo debeat locus accipi, & tam Stephanus quam Lucas a suspitione falsitatis vindicari. Atque hac occasione nobis oblata, cum mihi idem locus videatur aliquid falsi ad historiam pertinens continere, de hoc etiam agemus, quod superius explicare omisimus, cum nominatim de iis ageremus, quæ, quod attinet ad historiam, falsa videntur deprehendi in Novi Testamenti scriptis. Iam verò altera ista, quæ in Stephani verbis falsitas esse videtur, hæc est, quod ait, patres Israelitarum translatos fuisse in Sichem, & positos in sepulchro, quod emit Abraham precio argenti a filio Emor. Nam certum est, sive hoc de Iacobo intelligatur, sive de filio eius Israelitarum patriarchis, non ita rem se habere. nam Iacob quidem, ipsius ante mortem iussu, translatus fuit post mortem ex Ægypto, sed in terram Chanaan: & sic non in Sichem. Præterea, sepulchrum in quo positus fuit, ab Abrahamo quidem fuerat emptum, verum non a filio Emor, sed ab Ephrone Hittæo: quemadmodum de hisce aperte constat Gen: 23, 49, & 50. Rursus, si de filio Iacobi sit locus accipiendus, tunc invenimus quidem, quod Ioseph translatus fuit post mortem in Sichem, ut legitur prædicto cap: ultimo libri Iosue. Et ossa ipsius, quæ ex Ægypto Israelite in terram Chanaan transtulerant, ibi in Sichem, inquam, fuerant sepulta, & quidem in sepulchro empto a filio Emor ut habent Stephani verba, sed quod tamen ab illis

non Abraham, ut verba ipsius habent, sed Iacob enumerat, quod apertum est & ex dicto loco libri Iosua, & ex altero a nobis antea citato cap: videlicet 33. Gen. Quocirca videtur vix posse inveniri via, quomodo falsitas aliqua, in ista parte historie a Stephano recitata, non inveniatur. Primum igitur hac de re agemus, Deinde de priore, quam commemoravimus, fassitate explicabimus.

Primo igitur loco dicimus unà cum aliis doctis viris, presertim verò cum Beza in suis annotationibus in locum istum, nihil cogere, ut Stephani verba referantur ad Iacobum, sed satù ea vera esse, & videri debere, si referantur ad patres tantùm Israelitarum. Et quamvis non possemus ostendere alium ex patribus præter Iosephum in Sichem fuisse sepultum, id tamen satù esse posset ad vindicanda a falsitate Stephani verba. Frequens est enim satù apud omnes probatos auctores, & apud ipsos scriptores sacros figura synecdoche, adeò ut vera sint verba illa, patres nostri qui translati sunt in Sichem &c. quamvis plurali numero patres nominentur, modò unus ex patribus eò translatus fuerit. Sed præterea, ut citatum inveni apud Bezam, habemus Hieronymi testimonium, qui in Epitaphio Paula testatur, in Sichem fuisse sepulchra aliorum patriarcharum Iacobi filiorum, seq. illa suis ipsius oculis vidisse. Quare etiamsi id in sacris literis scriptum non inveniatur, cum ex altera parte nihil, quod ei adversetur, ibi scriptum deprehendatur; non est ullo modo abroganda fides tanto viro, & quòd prudens sciens tam aperte

pertè mentitus fuerit suspicandum, Quemdamodum
 verè mentitus fuisset, si nullius alterius præterquam
 Iosephi ex patribus illis ossa in Sichem fuissent sepul-
 crum. Vtèrius autem progrediendo & ad id responden-
 do, quod obijcitur, sepulchrū istud in Sichem positum,
 non ab Abrahamo sed a Iacobo emptum fuisse, dici-
 mus dupliciter responderi posse. Primū hīc potuisse
 evenire id, quod verisimilimum esse supra ostēdimus,
 ut eveniret in loco Matthæi cap: 27., ubi Ieremie no-
 men legitur, cum tamen certum sit verba Prophetæ
 illic citata non Ieremie esse sed Zacharie. diximus
 enim planè esse verisimile, ut a Matthæo nullum po-
 situm fuerit Prophetæ nomen, quod postea sciolus ali-
 quis in margine adscripserit, idq; tandem irrepserit,
 ut solet evenire, in ipsum contextum, quod ob quam
 causam a sciolo isto factum esse potuerit, & Ieremie
 nomen Evangelistæ verbis additum ibidem explicu-
 imus. Itaque & hīc facillè evenire potuit, ut in ver-
 bis Stephani a Luca scriptis simpliciter legeretur,
 quod emit, nulla addito expressè emptoris nomine,
 quod sciolus aliquis supplere voluerit, & nomen A-
 brahami adscripserit, (cum subaudiendum tamen
 esset Iacobi nomen, ibidem paullo ante expressum,)
 propterea quòd pro certo haberet, inter istos transla-
 tos, ut sepelirentur, Iacob esse numerandum, ut qui-
 dem ipsa Stephani verba ferre videntur. De Iacobo e-
 nim legerat iste, cum ut ante diximus, & loca cita-
 vimus, fuisse positam post mortem suam in sepulchro
 quod Abraham emerat. Nam quod ad alia iste non
 animadvertit, quæ cum hoc non conveniunt, &

sunt

sunt in ipsis Stephani verbis contenta, nihil esset mirum. Nam quâ audaciâ & incuriâ tentasset supplere verba Stephani, eâdem fieri potest ut de quibusdam Stephani verbis haud diligenter cogitaverit, neq; quicquid ille ibi dixit, cum ipsa historia contulerit. Hæc nos dicimus supplendo, id quod a Beza hoc in loco est annotatum, quem hæctenus tantum legimus auctorem huius primæ responsionis. Alter porrò modus respondendi est, quòd nihil vetat, ipsius Abrahami nomine non quidem ipsum Abrahamum, sed Iacobum eius nepotem intelligi; hac nempe ratione, ut Abrahami nomine significet Abrahami posteros, & perinde sit ac si scriptum fuisset, quòd emerit posteri Abrahami: id quod verum esse deprehenditur, cum Iacob id fecerit. Nam quod nomine alicuius eius posteritas, seu aliquis ex ipsius posteris intelligatur, hoc satis tritum est in litteris sacris. nam solum Israelis nomen hoc quod diximus comprobatur. Nemo enim nescit, nomen istud fuisse Iacobo Patriarcha ab Angelo impositum, & tamen passim Israelis appellatione simplici, non modò ipse Iacob, sed eius posteritas, nulla ipsius Iacobi ratione tunc habita, nisi quatenus fuit autor posteritatis sue, significata invenitur. Namine etiam Davidis, non ipsummet Davidem, sed vel posteritatem ipsius, vel aliquem ex posteris, ut Messiam, significatum fuisse deprehendet, qui quis legerit Ieremie caput 33. v. 17. & cap: 34, & 37. Ezechielis, nec non cap: 3. Osee. Nam apud Ieremiam loco prædicto, Davidi nomine posteritas Davidis significata est: in reliquis verò locis Messias seu Christus di-

fertè David vocatur. Sciendum est autem hanc falsitatis suspicionem in nomine isto Abraham, quòd in illis Stephani verbis legitur, tanti fuisse apud aliquos momenti, ut dixerint, Stephanum quidem dixisse & Lucam scripsisse nomen Iacobi, non autem Abrahami, sed postea nescio quo pacto immutatum fuisse: quod tamen nobis probari non potest. Atque etiam ob similem causam, cur istud nobis non probetur, censemus satius esse secundum modum objectioni istius respondendi amplecti, quem modò exposuimus ac verisimilem fecimus.

Iam igitur censemus, per ea quae diximus satis factum esse prioris falsitatis suspicioni, Nunc videndum est de altera, & quomodo potuerit Stephanus dicere, & Lucas scribere Emor Sichemi; cum tamen Sichem, ut phrasis omnino ferre videtur, non pater sed filius Emoris fuisse legatur. Dicimus igitur nihil incommodi esse, id quod sanè miramur, alios quos hactenus legimus non animadvertisse, si dicamus Emor fuisse, non tantum patrem Sichemi, ut scriptum extat, sed etiam filium, filium inquam ejus, qui vocaretur eodem isto nomine, quo ipse vocavit filium suum, quamvis id scriptum nusquam legatur: non enim omnia, quae in Novo Testamento dicuntur, licet pertinentia ad veteris Testamenti Historiam, quamvis verissima sunt, in ipsis veteris Testamenti libris, quos hodie habemus, consignata leguntur. Qua de re supra a nobis satis diligenter ac copiose pro praesente disputatione disputatum est. Quod si quis hanc sententiam sequi nolit,

nec satù habeat, ut credat, Emorù patrem Sichem nominatum fuisse, quod ita ipsius Stephani verba ferant, poterimus aliter etiam respondere, ac dicere, illud $\text{Ἐμορὸς πατὴρ Σιχέμ}$ non denotare nec patrem nec filium, sed locum unde Emor esset. Sic enim simili loquendi modo invenimus, dictos viros Ninive cap: 11. v. 32. pro eo quod est, viri Ninivite. Est enim sine dubio vox Græca Ἐμορ isto in loco Genitivi casus. Sic etiam Iudicum cap: 8. v. 5. scriptum invenitur. Dixitq; viris Suchot: ubi similiter nihil dubitandum est, quin vox Suchot sit Genitivi casus. Constat autem idem isto in loco, qui unà cum præcedente apud Lucam multos alios sibi similes in sacris literis habent, esse viros Suchot, quod viros ex loco isto ita nominato oriundos. Tremellius ac Iunius ajunt posse subintelligi, non patrem aut filium, sed principem. videtur enim probari posse ex historia sacra, præsertim verò ex cap: 34. Gen: Emor fuisse principem istius loci Sichem dicti. Quanquam ibi hoc disertè non habetur, sed tantùm quodd esset princeps loci illius. Afferunt enim isti hanc phrasim ab Hebræis usurpari, ut nomen quod ab alio regitur, si sit nomen loci, indicet eum, qui nomine a quo regitur significatus fuerit, principem esse loci eo nomine significati quod regitur. Sed cum nullam exemplum huiusce rei proferant, non audemus nos istam sententiam & explicationem eorum amplecti: præsertim cum ipsimet, si quis eorum verba diligenter consideret, aliud nihil videantur affirmare, nisi quodd hac constructio unius nominis ab altero recti, usita-

ea sit apud Hebræos, quod nullum prorsus dubium habet; non autem usitatum esse, ut in tali constructione nomen principis subaudiatur, qua de re hic agitur. Ex istis omnibus apparet, facile posse depelli a Stephano & Luca omnem suspicionem falsitatis in toto isto loco, exq; eo nullo pacto, per ullam similitudinem qua hæc inter se habeant, posse probari, non longè esse a verisimili, quòd cum Lucas dixit, *Ιωσηφ τὸ ἑλὶ* intellexerit Iosephum Eli fuisse generum.

Iam igitur concludimus, ex commemoratis a nobis conciliationibus istarum duarum genealogiarum Christi, que apud Mattheum & Lucam leguntur, eligendam esse eam, que statuit, ab utroq; quidem Evangelista genealogiam Iosephi mariti Mariæ matris Christi descriptam fuisse, sed tantum a Mattheo per patrem naturalem dicti Iosephi, a Luca verò per patrem legalem. Quod quantum attinet ad legalem patrem, cum duobus modis præcipuè id intelligi possit, vel scilicet, quòd Iosephus filius fuerit ejus adoptivus, vel quòd propterea fuerit filius, quia patri isti suscitatum in eo fuerit semen, libentiùs isti secundo modo adharemus, quam alteri: tum quia prior modus non adeò usitatus erat, neque ita omnino filium alicujus quenquam faciebat, ut modus posterior; tum verò quia posterior modus, ut diximus, testimonium satè amplum ab Historia & Antiquitate habet, in ipsa Iosephi persona, prior verò non habet. Sed nobis sententiam istam sequentibus, restat adhuc pertractandum tertium caput, quod fecimus, difficultatum, que in istis duabus genea-

genealogiis inveniuntur, & ex illis proficiuntur. Nempe, quod si verum est, Iosephi tantum genealogiam ab utroque Evangelista fuisse descriptam, & nullo modo ab utrovis eorum genealogiam Mariae matris eius, quemadmodum supra demonstravimus, non apparet cur istud ab illis factum fuerit, nisi velimus adversus id, quod uterque ipsorum aperte docet, statuere, Christum revera ex Iosepho natum fuisse. Id quod alioqui etiam videtur ex eo persuaderi, quod disertè Christus ex semine Davidis natus fuisse dicitur, ut habetur 2. Tim: cap: 2. v. 8. & in initio epistole ad Rom. Hæc quæ fuit potissima causa, cur invaluerit apud plerosque ea sententia, quod a Luca Mariae matris Iesu genealogia fuerit tradita, ab eoque ostensum, eam, ex qua Christus revera est natus, a Davide ortum ducere, Unde meritò concludi possit, ex semine Davidis Christum esse natum, id quod de Genealogia, inquam, Mariae a Luca descripta, cum multis aliis, quemadmodum & nobis, non probetur; hinc factum est ut fuerint, qui non veriti sint affirmare, quicquid apud Lucam & Matthæum de conceptione ex Spiritu sancto Domini Iesu, in utero ipsius Mariae legitur, adulterinum esse & addititium, hodieque non pauci sunt inter Germaniae inferioris appellatos Anabaptistas, qui id asseverare pergunt. Alii verò, ad solvendam hanc difficultatem, dicunt, satis fuisse ostendere, Iosephum ortum suum a Davide duxisse. Hinc enim aiunt sequi, quod similiter Mariae uxor eius ex eadem familia fuerit, de quibus duabus opinionibus, quid senti-

endum sit postea clarius docebimus. Oportet autem prius statuere, quid sentiendum sit de eo, an Christus ex Iosepho natus fuerit nec ne. Quanquam enim hoc nullum habet dubium, nisi velimus istis adherere, qui censent, eam partem Historiæ, quæ apud utrumq; Evangelistam tradit, sine conjunctione ulla Iosephi cum Maria, præter eam quæ simplex matrimonium necessario facit, Christum conceptum & natum fuisse, esse adulterinam: tamen recte est ad veritatem melius noscendam, alia etiam ratione, quid hac de re sentiendum sit, ostendere. Quapropter dicimus ex uno illo loco Esaiæ prophete cap: 7. a Mattheo in testimonium allato, si ea considerentur, quæ de eo loco agentes superius satè prolixè disputavimus, nullo modo negari posse, & eum locum prædictionem continuisse, & continere ejus, quod futurum fuerat in Christo, & consequenter, Christum ex virgine natum fuisse, cum apertè ostenderimus, vocem illam Hebraeam, quæ virgo ab ipso Evangelista, & ante ipsum a 70 Interpretibus redita est, verè virginem significare, necesseq; esse, ut id in loco isto omnino significet.

Veruntamen, ut totum hoc mysterium melius intelligamus, videndum est nihilominus, an absolute necesse fuerit, ut Christus ex virgine nasceretur, præter eam necessitatem, quæ inde oritur, quod Deus ante sic statuerat: quemadmodum ex prædicto Esaiæ loco, ut a nobis factum est, pensitato atque explicato, abunde constat. Dicimus igitur, quicquid plerique contrà sentiant, nullam alioqui necessita-

dem fuisse, ut Christus omnino ex virgine nasceretur. Id quod nobis, qui scimus quae sit natura & essentia Christi, creditu non admodum difficile videtur. Sed neq; iis videri deberet, qui, cujus essentiae Christus sit ignorantes, praeter humanam naturam, divinam aliquam ab humana plane distinctam in eo constituunt. Nihil enim divina ista natura impedire sua vi, citra Dei consilium, potuisset, ne Christus alioqui secundum carnem ita nasceretur, ut alii homines nascantur. Neque enim nativitas ista revera ac proprie ad naturam ejusmodi divinam pertinere poterat, aut illam ullo modo attingere, remanente perpetuo ipsa divina natura intacta & libera ab omni imperfectione naturae humanae, quae illi fuisset juncta, quantumvis humana ista natura consueta ratione producta fuisset. Nam si quis dicat, se Christus ex Iosepho, & sic ex semine viri natus esset, futurum fuisse ut peccatum originale, quod vocant, haberet, quae res ut in filio Dei inveniretur, qui ab omni prorsus labe debuit esse immunis, nimis absurdum atq; adeo impossibile videri debeat; dicimus sententiam istam de labe originali peccati, quae trahatur ex eo, quod quis ex Adamo per virile semen propagatus fuerit, ita expositam & intellectam, ut labem dicatur propterea is contrahere, qui eo modo sit natus, labem inquam spiritualem, & quae ipsum peccato penitus obstrictum faciat, ut hic intelligere est necesse, vanam esse, & nullo divinarum oraculorum testimonio suffultam: cum, ut alibi a nobis ostensum fuit, & si in istis perrexi-

mus tradendis, quæ hæcenus tradidimus, postea suo loco apertè ostendetur, aliud nihil, ipsum per se ex Adamo prognatum esse, secum mali afferat quàm reatum mortu, ita ut is, qui ita natus fuerit, mori omnino necesse habeat, nisi singulari Dei gratia a tali reatu absolvatur. Atqui nemo est, qui id possit aut ullo modo debeat affirmare, ipsum Iesum Christum morti necessario non fuisse obnoxium naturâ suâ, immo necesse est fateri, Christum a nobis hac in parte nihil diversum fuisse, & propterea si aliqua ratione de eo dici possit, eum non fuisse mori necessario subiectum, oportere eum id ex Dei gratia habuisse, quemadmodum & de nobis censendum est dici aliquomodo posse; quemadmodum latè docuimus in disputatione nostra cum Francisco Puccio de primi hominis mortalitate. Adde, quòd si velimus, quemadmodum ferè omnes, præter eos Anabaptistas qui Menonite vocantur, qui non aliter sentire videntur, Christū videlicet ex substantia Mariæ matris suæ aliquid traxisse, immo naturam suam humanā, non alia ratione, quàm alii homines ex ea habuisse, immo, ut multi sentiunt, multò magis a matre sua traxisse quàm quilibet nostrum traxerit & trahat, necessarium est fateri, eum nihilominus, ut ex virili semine natus non fuerit, ex Adamo tamen fuisse prognatum, & ex eius semine ortum; ac propterea non minus quàm nos ex Adamo, quidquid labi trahitur similiter traxisse. Apparet igitur, ni fallimur, seclusa Dei ordinatione ac voluntate, quæ fuit, ut Christus ex virgine nasceretur, ut ita fieret, alioqui nihil coe-

hi coegisse, nihilq; aut incommodi aut absurdi in eo futurum fuisse, ut ipse Dei filius & Christus ejus ex virili semine, si ita Deo placuisset, natus foret. Quare si sententiam illorum nihilominus detestandam esse, & nos unà cum aliis profiteamur, qui volunt, eum ex ipso Iosepho natum esse, non ob id detestamur, quòd hic aliquid blasphemi inveniatur, si rem ipsam per se tantummodo consideremus, sed quia opinione ista fit, ut in dubium revocentur ea, quae a Matthæo & Luca, de Christo, ad reliqua ejus vitae pertinentia scripta sunt, adq; mortem, & exitum, & exaltationem ipsius sunt scripta. & breviter nihil firmi nobis relinquatur in ipsorum historiis. Nullum enim indicium habemus, quòd ea, quae uterque scripsit de Christo ex virgine nato, vel potius scripsisse affirmantur, suspecta esse debeant. Neq; enim ullus codex, ullum exemplar invenitur, quod parte ista historiae apud utrumvis eorum careat, nec ullius antiqui & probati scriptoris testimonium extat, quod illam nobis suspectam reddat. Sunt igitur omnes isti, qui nihilominus partem istam utriusq; historiae tam audacter rejiciunt, meritò ac maxime culpandi: qui debuerant, si interim intelligere non poterant, vel quomodo Christus ex semine Davidis natus esset, vel cur uterq; Evangelista Iosephi Genealogiam descripsisset, debuerant inquam fateri ignorantiam suam, Deumq; rogare, ut si id ad ejus gloriam pertineret, vellet eos ex his difficultatibus exolvere. Istis igitur jam missis a nobis factis, videamus quid sentiendum sit de altera illa

sententia, quòd, si Iosephus ex semine Davidi natus esse ostenditur, satis hoc sit ad probandum, quòd Maria uxor ejus similiter ex Davide fuerit prognata, & consequenter ad ostendendum, quomodo Christus, quamvis non ex Iosepho, sed ex ipsa sola natus, ex semine tamen Davidi natus fuerit. Inquiunt igitur isti, unam quamq; mulierem debuisse nubere alicui ex familia patris sui, atque ita necesse fuisse, ut Maria esset ex familia Davidi, cum Iosephus cui nupserat ejus familiae esset: ad idq; probandum postremum caput Libri Numerorum 36. ubi scriptum est, quòd cum quidam ex tribu Manasse filius tantum reliquisset, quibus, ex voluntate Moysi Deiq; ipsius, adjudicata fuerat paterna hereditas, adierunt quidam ex precipuis illius tribus ad Moysen, & rogârunt ne permitteret, ut istae puellae alicui nubere extra tribum ipsorum, ne videlicet, cum iam coepta esset dividi terra illa, a Deo promissa, inter 12 illas tribus, & singulae tribus suam propriam portionem a ceteris distinctam habiturae essent, confunderentur portiones istae, si bona unius tribus ad alteram transferrentur: quod sine dubio factum fuisset, si puellae istae heredes alicui ex alia tribu quam Manassis nupsissent. Absensus est Moyses, & statuit ut sic fieret, ut isti petierant. unde factum est ut puellae istae nupserint filiis patruorum suorum, quae res fuit causa & est, ut multi hoc, quod Moyses tunc statuit, atq; ut ibi habetur, voluit perpetuum esse, arbitrati fuerint ita esse accipiendum, ac si Moyses statuisset, ut, quemadmodum tunc fa-

ctum

Etum est, unaqueq; puella alicui ex sua paterna familia nuberet. ubi tamen in eo manifestè errarunt, quòd ad omnes filias Israelis id pertinere voluerunt, quòd Moses disertè de filiabus hæredibus sanxit.

Iam verò quòd ad illud pertinet, ut filia Israelis, de quibus isto in loco agitur, nubere deberent alicui ex familia sua paterna: quamvis id nullo pacto ita se habeat: sed tantummodò iussæ fuerint nubere alicui ex paterna tribu, videntur tamen Tremellius & Iunius, id verum esse sensisse: cum in sua translatione versiculo 12. Hebraica verba ad hunc modum verterunt. Fuitq; possessio earum, conjuncta tribui ac familiæ paternæ earum. Nam tametsi verum est, ut antea diximus, id factum fuisse in eo casu qui ibi recitatur, quòd ista verba significant, ut scilicet puellæ istæ nupserint, non tantum in tribu, sed etiam in familia paterna sua: tamen id casu, ut supra indicavimus, factum est, non autem quia Mosis decretum aliud ferret, quàm ut naberent in tribu sua paterna. Nec sanè quidquam aliud viri illi ex tribu Manassis a Mose petierunt. Propterea etiam, neque in ipsis verbis Hebraicis habetur conjunctio illa Ac. Eam enim Tremellius ac Iunius de suo addiderunt, & locus ita legi debet, Fuitq; possessio earum conjuncta tribui familiæ paternæ earum. Quæ verba, sine conjunctione illa, aliud nihil significant, nisi habitam suæ rationem, ut bona illa remanerent in tribu illa paterna. Poterant autem duo isti, alioquin eruditissimi, &

mi, & sanè oculati admodum viri, animadvertere, similiter supra v. 8. mentionem fieri & tribus & familia, cum ea tamen significatione, ut tribus tantum ratio haberetur. Nam & ipsi ibi in translatione sua verba Hebraica sic reddiderunt. Alicui e familia tribus suæ paternæ nubito: ubi, conjunctionem illam ac, fortasse libenter addidissent, sed non potuerunt id facere, ut versiculo 12. fecerunt. Nempe quia prædicto versiculo 8, contrà quàm fiat versiculo 12, familia prius nominatur, & postea tribus. Neque enim poterat ibi dici, Alicui e familia ac tribu sua paterna, Supervacaneum enim est, ubi dixeris e familia paterna, addere etiam e tribu. nemo enim tam fatuus est, qui nesciat, eum, qui sit ex eadem familia paterna, necessario quoque ex eadem tribu esse. Agnoscendum est igitur Mosem eo in loco usum fuisse hac phrasi. ut familiam quidem & tribum paternam simul nominaret, modò familiam modò tribum prius nominans, ut indicaret eum, cui nubere filia heres debebat, debuisse esse ex aliqua familia tribus paternæ suæ, seu maris, quod planè idem re ipsa significat, qui esset ex tribu paternæ suæ familie. Concludimus igitur, ex supra dicto loco Numer: cap. 36. nullo modo posse colligi, quòd exposità ab Evangelistis genealogià Iosephi mariti Mariæ matris Christi, & ostenso, quòd Ioseph ipse esset ex familia Davidis, sequatur, simul expositum, atque ostensum fuisse, Mariam ejus uxorem ex eadem familia fuisse. cum caput illud, ut diximus, non loquatur quidquam de eadem familia, sed tantum de eadem

dem tribu, quod attinet ad decretum ibi commemoratum, & si de eadem tamen familia loqueretur, non pertineat decretum istud nisi ad filias heredes. Quod autem Maria mater Iesu haeres fuisset, neque ab Evangelistis ullo modo indicatur, neque aliunde id ulla ratione constat. cum tamen necessarium videatur, si Evangelistarum mens ea fuisset, ut ex eo, quod Ioseph e familia Davidis esse ab ipsis dictus fuisset, intelligeretur, Mariam quoque ex eadem familia fuisse prognatam, ut aliquid aperte indicarent de eo, quod hic omnino requireretur, Mariam scilicet fuisse heredem. Quid igitur dicemus? cum & impium, aut certe omnino rejiciendum videatur commentum illorum, qui existimaverunt, apud utrumque Evangelistam adulterinam esse eam partem Historiae, quae tradit Christum ex Maria sine viri conjunctione natum esse: nec ullo modo constet Mariam ex familia Davidis fuisse. immo non desint argumenta, ex quibus videatur posse concludi, eam neque ex ista familia, neque ex tribu Iuda fuisse ortam. quae hic commemorare, praesertim, cum ipsa, ut verum fateamur, parum firma nobis videantur, nihil est necesse. quid inquam, dicemus? quam causam asserre poterimus, cur Iosephi tantum Genealogia descripta ab utroque Evangelista fuerit, & quidem, ut nobis videtur, ab altero legalis, ab altero vero naturalis ejusdem Iosephi propagatio; cum tamen interim certum sit, natum esse Christum, cujus ratione Iosephi genealogia describitur, ex matre tantum Maria sine Iosephi ipsius conjunctione. Necesse est omnino ali-

quid

quid aliud excogitare, ad difficultatem istam & scrupulum eximendum. Hinc factum est ut quidam etate nostra (nam quod id superioribus seculis excogitatum ab aliquo fuerit, non legi) dixerint, quamvis verissimum sit, ut Evangeliste ambo isti testantur, Christum sine conjunctione Iosephi cum Maria matre ipsius, natum fuisse; non tamen hinc sequi, ne ex semine quidem ipsius Iosephi fuisse natum. Aiunt enim nihil impedire, quominus sine coniunctione ulla Iosephi cum Maria, potuerit Christus ita DEO operante, nihilominus ex Iosephi semine concipi ac nasci, & propterea, quia ita factum fuerit, ajunt ipsi tam diligentem fuisse utrumque Evangelistam in genealogia Iosephi describenda, adduntq; necessariò ita sentiendum esse: alioqui nulla ratione ostendi poterit, quomodo Christus ex Davidis semine fuerit natus, cum tamen id sacra oracula absurde testentur. Quamquam verò hæc istorum opinio, & absurda alioqui, & indigna quodammodo ipso DEO videatur, tamen negari non potest, quin hac ratione ei dubitationi videatur occurri, quam postremo commemoravimus, de Christo nato ex semine Davidis. Nam quòd ad illud attinet, quod uterque Evangelista tradit, e spiritu Sancto conceptum & natum Christum fuisse, non videtur omnino cum istorum opinione pugnare, qui volunt propterea e spiritu S. conceptum esse natum fuisse, licet ex Iosephi semine conceptus & natus fuerit, quia nihilominus ea in re spiritus sancti opera intervenerit, nulla viderit interveniente virili conjunctione. Verumtamen, quibus-

dam omiſſis, quæ dici poſſent ad verſus iſta, pro iſtoſtorum opinione diſputata, ſatis eſſe volumus in præſentia, oſtendere, iſtam opinionem, quam nos planè rejicimus, quantumvis vera eſſet, non tamen tollere difficultatem pro poſitam, de ratione cur Evangeliſte noſtri tam accurratè Joſephi genealogiam nobis tradiderint. Nam ſi id feciſſent propter id, quod iſta opinione continetur, ſine ullo dâbâ id aliquomodo indicâſſent. Verùm non modo id non fecerunt, neq; ullum indicium nobis dederunt, quò aliqua ratione ſpiritus ſancti ope ex Joſephi ſemine natus fuerit Chriſtus, ſed contrâ ea dixerunt, ex quibus contrarium videatur omnino debere colligi, prout unicuiq; totam hîſtoriam apud utrumq; legenti conſtare poteſt. Et proſectò eventus ipſe id verum eſſe oſtendit quod diximus, cum omnes ferè ex ipſorum Evangelîſtarum Hîſtoria collegerint, atq; intellexerint, Chriſtum nequaquam ex Joſephi ſemine fuiſſe ortum. Itaq; opinione iſtorum exploſa, iam tandem tentemus, an aliquid invenire poſſimus, quod difficultatem, de qua agimus, omnino tollat. Non eſt autem ut admodum in hac re querendo laboremus, cum non pauci præſtantîſſimi viri, quid ſentiendum ſit, ſcriptum reliquerint. Inter quos præcipuè videtur mihi commemorandus ſcriptor quidam, de quo ſuperiùs mentionem fecimus, ad aliud pro poſitum duo ipſius loca citando, quæ huc maximè pertinent. Is eſt auctor Reſponſionum ad Orthodoxos, quæ Juſtini nomen inſcriptum habent, cum tamen nullo modo opus illud Juſtini eſſe poſſit, ut ſuperiùs, ni fallor, de-

lor., docuimus. Iam scriptor iste, in ante citatis Responsionibus ad questionem 66. & 133. hanc difficultatem attingens, de qua hic agimus, ait; Propterea Christum dici Iosephi filium, quia sit filius ejus uxoris, & non ex alio ullo viro natus. Inquit enim. Quocumque modo Deo placeat alicui dare filium, sive per ipsius cum uxore coniunctionem, sive minus, iam eum censendum esse revera filium eius. Vbi autem nullus alius pater nominari, ulla ratione potest, certum esse videtur, quod ex aliqua muliere natus eius sit filius, cuius ea est uxor, cum vir & uxor censeantur esse unum corpus & una caro, quemadmodum scriptura loquitur. Ad cuius rei confirmationem, & simul ad declarationem aliquorum testimoniorum, de Iesu Christi ex Davide pro generatione, considerandum diligenter est, quod uterus seu venter uxoris, ipsius mariti uterus seu venter dicitur; suntq; hujusce rei testimonia non pauca in veteri Testamento. Sed nos uno capite 28. Deut. erimus contenti; ubi versiculis 4, 11, 18, & 53 habetur disertè hæc phrasis, cum Moses cum viris Israëlitis loqueretur, Fructus ventris sive uteri tui, pro eo quod est filius, seu filii tui; ut expressè, præter rationem ipsam quæ ubiq; id docet, prædicto versiculo 53 explicatum habemus. Si igitur uterus, seu venter uxoris, ipsius mariti uterus ac venter esse censetur, sequitur necessariò, ut quidquid ibi conceptum, quidquid inde natum fuerit, modò ne alius quispiam ejus conceptionis & ortus auctor dici nullo modo queat, ad ipsum maritum pertinere. Propterea

pterea Psal: 132. scriptum est, Deum jurasse Davidi, quod e fructu ventris ejus sessurus esset aliquis in ejus folio. qui locus, sine ulla dubitatione, ad Christum pertinet; id quod & ipsi Judæi, facile concedunt (intelligentes tamen Christi nomine non Iesum Nazarenum, sed alium quempiam ab ipsis adhuc expectatum, & Petrus Apostolus aperte docet, cap: 2. Actor: Apostolicorum versu 30. quamvis, ut max dicemus, ille paullo aliter verba ipsius Psalmi citare videatur, quam in ipso Psalmo leguntur. Prius enim dicendum est, considerandum omnino esse, quomodo loquutus fuerit spiritus sanctus in Psalmo illo, inquit, Ex fructu ventris Davidi, ut scilicet propter ea, que modò dicebamus, satis indicaretur, fore, si ex muliere aliqua, que ad aliquem ex familia Davidis pertineret, id est ejus uxor esset, nasceretur Christus. Iræneus certè lib: 3. cap: 27. multum ponderis in eo ponit, quòd in predicto Psalmo minimè fuerit dictum, ex fructu lumborum Davidis, sed, ex fructu ventris Davidis, ut ostenderetur, inquit, eo in loco, de ortu non ex viro, sed ex muliere verba fieri. Quanquam, nisi fallor, & si rectè memini, ipsa Irænei verba indicant, ita ille rem intelligebat, ut Maria ipsa mater Iesu esset ex familia Davidis, & propterea eius uterus, Davidis uterus dici posset. non autem ut nos censemus, & sine dubio verum est, quia Maria uxor alicuius ex familia Davidis fuerit.

Sed interim tamen animadvertendum est, quòd Petrus supra dicto loco Actorum Apostolicorum 2. cap. cum, mentionem facit illius divini juramenti, de

di, de quo predicto Psal: 132. clarum testimoniū habetur, non ait, de fructu vētris ejus, id est, ventris Davidis, sed de fructu lumbi ejus, ita ut videatur vana cōsideratio ista, quōd venter Davidis in eo iurejurando fuerit commemoratus. praesertim si addatur id quod Iraneus commemorat, quōd non sit dictum de fructu lumbi. Apparet enim ex Petri verbis non minus isto in loco dici posse de fructu lumbi, quā de fructu ventris: etiamsi in Psalmo sit ventris tantūm diserta mentio. Et sanè mirum videtur quōd Iraneus scriptor non minus diligens quā eruditus, verba ista Petri non observaverit. Immo omnino statuendum est, quōd in locum optime inspexerit, & aliter legerit, atq; hodie in exemplaribus omnibus, tam Graecū quā Latinū legatur. Cujus etiam rei habemus satis apertum indicium in editione Syriaca. Ibi enim nulla penitus mentio lumbi fit, sed tantūm ventris. ubi obiter (quod tamen ad rem nostram aliquōmodo pertinet) notandum est, in eadem Syriaca editione desiderari verba illa, secundum carnem, quae in codicibus tam Graecū quā Latinū leguntur. Et certè cum verba ista non habeantur in Psalmo ipso, neq; etiam in alio quodam loco, ad quem Petrus similiter respexisse affirmari possit, id est cap. 7. lib. 2. Samuelis, verisimile omnino videtur, cum Petrus ipsum Dei iusjurandum & promissionem commemorat, non addidisse de suo duo ista verba, quantumvis illa rectissime alioquin addi possint, atq; aded alibi re ipsa addita inveniatur, ubi fit mentio de Christo ex Davidis semine, sive ex Patribus

tribus Iudeorum prognato, seu mari ex ipsis Iudeis, ut loci supra a nobis citati ad Rom. cap: 1. & 9. Unde potest aliquis conijcere, propter testimonium, Irenaei & Syriacae editionis, quemadmodum fortasse duo illa verba, Secundum carnem, addititia sunt, sic non mirum videri debere, si aliqua mutatio isto in loco Actorum Apostolicorum evenerit in voce ventris, pro qua substituta fuerit vox lumbi. Veruntamen, quia non libenter sine necessitate nec ipsi recedimus, nec cuiquam ut recedat consulimus, in loci Novi Testamenti a vulgata exemplarium Graecorum & Latinorum lectione, propterea videndum erit, quomodo pro re constanti posito, quod in libro Actorum legi debeat lumbi: tamen nihilominus hoc nihil obsit ei rei quam jam constitumus, quod scilicet Christus nullo modo ex semine, proprie loquendo, ipsius Iosephi sit natus, & quod nulla verisimilitudo appareat, quod Maria mater Iesu ex ipso Davide prognata fuerit, quod postremum propterea commemoramus, quia, eo non obstante quod Irenaeus scripsit & passim traditur, non desunt qui dicunt, infantem, qui in utero matris concipitur, non ex semine viri tantum, sed ex mulieris etiam semine simul concipi, in qua sententia Medici vulgo esse videntur. Dicimus igitur, & sic, quod hactenus diserte non fecimus, simul explicabimus, quomodo intelligendum sit, quod Christus ex semine Davidis fuerit natus, dicimus inquam, ob id quod ostendimus, dici merito posse, Christum fuisse Iosephi filium, quamvis ex ipsius semine revera non sit conce-

ptus & natus, ob id videlicet tantum, quod Maria, ex qua verè natus est, ejus uxor fuerit, similiter dici posse, Christum ex semine Davidis, sive ex lumbis Davidis fuisse ortum, quia Iosephus, cujus filius esse dicitur, revera ac propriè semen Davidis fuerit, & ex lumbis Davidis prognatus. quam si quis velit Medicorum sententiam, quam ante commemoravimus, amplecti, & omnino statuere, id quod fortasse verius est, mulieris semen concurrere ad infantis conceptionem, seu magis, sine semine mulieris conceptionem istam non fieri, dici hic potest, non minus uxoris semen & lumbos, dici posse semen & lumbos mariti ejus, quàm venter dicatur, quemadmodum superius aperte docuimus. Non est tamen sine consideratione praterendum, quod tamen si in Novo Testamento habeantur locutiones istæ Ex semine, & Ex lumbis Davidis, ea tamen, ni fallor, non interveniuntur in ipsis divinis promissionibus veteris Testamento contentis. Quare eò nihilominus redimus, ut unà cum Ireneo moneamus, id non sine mysterio factum esse, etiamsi, ut dictum fuit, in ipsa hujus rei causa aliquantum ab Ireneo dissentimus. De loco Psalmi 132. jam dictum est, quod ibi disertè, non lumbi aut seminis sed ventris fiat mentio. In loco porro 2. Sam: cap: 7. secundum veritatem Hebraicam, viscerum mentio fit, quod non minus mulieri partum concipienti atq; edenti, quàm viro illum generanti convenit. nec enim minus potest dici homo e visceribus maternis, quàm paternis extitisse. Iam alibi, ut apud Hieremiam cap: 23, & 33. ubi Christi

stus
sic or
expr
quit
alio
tine
imu
non
tus f
terq
deno
fius
Dav
quis
te at
retu
diffu
Deu
dere
jus f
cimo
stre
tual
stolis
vera
ris l
lem
furr
ut in
Pau
stus

flus promittitur, & quidem, quamquam verba non
 sic omnino sonant, ex ipso Davide, nulla fit mentio
 expressa seminis, seu lumbi Davidi: sed tantum in-
 quit Deus, Suscitabo Davidi semen, ita ut nihil
 aliud requiratur, quam ut Christus ad Davidem per-
 tineat. Pertinere autem jam ostendimus, cum docu-
 imus quomodo filius Iosephi sit, licet revera ab ipso
 non generatus, cum Ioseph ab ipso Davide progna-
 tus fuerit, quæ quidem causa est, ut diximus, cur u-
 terq; Evangelista tam diligens fuerit in eo osten-
 dendo, ita ut, sive naturalem sive legalem ortum ip-
 sius Iosephi spectemus, omnino appareat ipsum a
 Davide genus suum duxisse. Sed dicet interim ali-
 quis, Si nihil necesse erat, seclusa ipsius Dei volunta-
 te atq; decreto, ut Christus e spiritu sancto concipe-
 retur, cur tamen id factum est, atque hac ratione
 difficultatibus rota res involuta? Ad hoc dicimus,
 Deum hac ratione duo efficere voluisse. Vnum, osten-
 dere in Christi persona non esse spectandum, ex cu-
 jus semine revera natus fuerit. Alteram, nobis spe-
 cimen quoddam exhibere ortus ac nativitatis no-
 stræ quatenus Christi sumus, & sic quatenus spiri-
 tualiter nascimur; quemadmodum videmus ab Apo-
 stolis, præsertim Paulo & Petro, ea quæ pertinent ad
 veram mortem & resurrectionem ipsius veri corpo-
 ris Iesu Christi, accommodari ad mortem spiritua-
 lem nostram, quâ mori peccato debemus, & ad re-
 surrectionem itidem spiritualem, quâ renovamur
 ut in vite novitate ambulemus, ut habetur apud
 Paulum præcipue cap. 6. ad Romano. 1. Sed interim

objiciet aliquis. Si Deus, ut primo loco dixisti, ostendere voluit, nihil esse curandum ex cujus semine revera Christus natus fuerit, cur tamen adeò expressè promisit, & ab ipso promissum fuisse Apostoli commemorant, Christum ex Davide progenitum iri? adeò ut non modo non paucis in locis disertè scriptum habeamus, istud ipsum quod dicimus, quemadmodum antea ostensum fuit, sed etià inveniamus ipsum Christum, Davidem, non modò Davidis filium, fuisse appellatum. Nam de ipso nomine Davidis, attulimus superiùs ad aliud propositum locum Ezechielis, itidemq; locum Osea prophetae. Respondemus, id factum propterea fuisse, ut Iudaei seu Israelitae, quibus Christus seu Messias promittebatur, non haberent ullam excusationem, si, cum exhibitus illis suo tempore fuisset Christus, eum non agnovissent nec recepissent, quippe quòd Deus ut promisit sic etiam effecit, ut Christus ita natus fuerit, ut unus quisq; meritò & existimare & affirmare possit eum e Davide fuisse progenitum, & sic non deesse illi hanc notam, quam illi Deus adhibere voluit, ob praedictam, ut diximus, causam, non autem quòd aliqui quicquam necesse esset, ut Christus ex Davide potiùs, quàm ex alio quopiam a Davidis familia descritto, ortum suum duceret. Immo ne necesse quidem erat, ut Christus ex aliqua muliere, vel alia quavis ratione ex hominibus propagaretur: sed tantùm necesse erat, considerata ratione quomodo per Christum Deus nos servare vellet, ut ù revera esset homo. ad hominem autem constituendum nihil neces-

se est, eum ex homine nasci, id quod tum experientia, tum ratio, & consensus prudentium virorum manifestè docet. Nam quod attinet ad experientiam, videmus ac scimus omnes, Adamū patrem omnium hominum, verissimum hominem fuisse, & tamen is ex nullo homine prognatus fuerat, sed ab ipso Deo creatus. Quod verò attinet ad rationem & consensum virorum prudentium, scimus non minùs ad hominū essentiam constituendam non requiri, ut is ex homine aliquo nascatur; sed ipsius essentiam eo constare ac contineri, quòd sit animal rationale, seu inuis, substantia sensu ac ratione prædita, ubi igitur mihi talem dederis, jam hominem verissimum habebo, etiamsi ex nullo homine prognatus fuerit. Quare, ut alia multa omittamus quæ dici tota hæc de re possent, quippe quòd ea, quæ dicta a nobis fuerunt, satis esse videantur, concludimus tandem, tertiam difficultatem, quæ oriebatur ex duabus illis Christi genealogiis ab Evangelistis descriptis, nullius momenti esse, neque ob illam magis, quàm ob duas alias priores, quicquam dubitandum esse de fide ipsorum Evangelistarum ac veritate, hæc quidem in parte; unde similiter concludimus jam nihil superesse, quod nobis persuadere possit, scriptores Novi Testamenti minùs veri aliquid scripserunt. Et sic absoluta tandem erit examinatio primæ causæ, cur forsasse qui scriptum Novi Testamenti fidem adhibendum non esse suspicari possit, jamq; ad secundam causam, Deo bene annuente, accedendum tandem nobis est. Tamen si non ignoramus alia multa, præter ea

que a nobis commemorata sunt, obijci a nonnullis Novi Testamenti scriptis, potissimum verò scriptis Evangelistarum, ex quibus suspicari merito quis posse videatur, ne historia in ipsis contenta non sit vera, de quibus si voluissimus, ut quidem deceret, eam diligentiam disputare, quàm de aliis multis que commemoravimus, disputatum a nobis est, nimis multum temporis in ea re consumere opus fuisset, propterea satius esse duximus, cum presertim ex illis, que a nobis examinata sunt, possit quilibet pius & cordatus homo conijcere atque intelligere, cuiusmodi sint objectiones istæ que scriptis Novi fœderis fiunt, ex quibus a nobis dictis, fortasse per similitudinem quamdam rerum, solutionem petere aliquarum ex istis objectionibus, quas non attigimus: satius, inquam, esse duximus, iam ulterius progredi, cum unicuique merito videri possit, nos nimis diu in tractanda hac prima causa versatos fuisse.

Secunda igitur causa quam fecimus, ut merito videri queat alicui libro fidem adhibendam non esse, ea est, si de auctore ipsius libri minimè constat, in qua causa examinanda, ejusque examinatione ad rem nostram accommodanda, duo nobis facienda sunt. Primum, considerandum nobis est, quam vim causa ista habeat & quanti momenti ea sit. Deinde inquirendum, An illa in eo, de quo quaerimus, locum nec ne habeat. Itaque quòd ad illud attinet, quod priori loco proposuimus, videtur omnino ignoratio auctoris alicujus libri impedire, quominus tali libro fides adhibeatur, sive in rebus historicis, sive in iis que ad doctri-

doctrinam pertinent. Nam quod attinet ad histori-
 am, certum est, potissimam causam, cur libro alicui,
 quidquid sit narranti, ea in parte fides habeatur, es-
 se, quod ejus scriptor rectè noverit ea quae ibi nar-
 rantur: vel quia ipse praesens fuerit, vel quia ab iis,
 qui praesentes fuerunt, audierit, vel quacunque alia
 ratione ad veram notitiam & cognitionem suae nar-
 rationis pervenerit. Atqui hoc nullo pacto sciri a no-
 bis potest, nisi simul sciamus quisnam fuerit ipsius li-
 bri scriptor; id quod necesse est ut sciatur, an iste talis
 homo fuerit, quem non sit verisimile scientem pru-
 dentem voluisse mentiri. Quod verò attinet ad ea
 quae ad doctrinam spectant, non videtur posse negari,
 necesse esse, si scriptori alicui credendum a nobis sit,
 scire, eum fuisse peritum ac doctum ejus sive scientiae,
 sive artis, seu denique facultatis ad quam ista refe-
 rantur. Verum hic quoque non apparet, quomodo pos-
 simus istud resciscere, ubi quisnam fuerit scriptor iste
 ignoraverimus. Verumtamen considerandum est
 cum ratione, tum experientia duce, quod, quamvis
 negari non possit, quin ignorantia ista Scriptoris, possit
 ipsa per se ista impedimenta afferre quae commemo-
 ravimus, & propterea digna sit, de qua a nobis dili-
 genter queratur, utrum ea in scriptis Novi Testa-
 menti locum vel habeat, vel habere posse videatur:
 tamen ex altera parte facile fieri potest, ut dignissi-
 me talesque causae adsint, cur alicui libro fides haberi
 queat, & porro debeat, etiamsi ejus scriptor planè i-
 gnoretur. quicquid enim paullo ante diximus sciri
 necessarium esse, ad fidem libro alicui addibendam,

& videri haberi non posse, si scriptor libri ignoretur, id eorum nihilominus sciri a nobis potest, modò testimonia fide digna habeamus, vel quòd scriptor eiusmodi fuerit, quem non sit verisimile aut falsum fuisse, aut quemquam fallere voluisse: etiamsi alioqui eius nomen ad notitiā nostrā non pervenerit: vel quòd, quicumque tandem eum librum scripserit, vera omnino ea sint quæ in eo leguntur. Ratio enim aperitissimè dicitur, eiusmodi testimonia satis esse ad fidem libro alicui conciliandam, nihilominus ut scriptoris nomen ignoretur. Iam quòd attinet ad experientiam, exemplis omissis librorum nō sacrorum, unde fortasse quedam illustria peti possint, plus satis exemplorum, eorumq; valde illustrium habemus in ipsis libris sacris. Sunt enim inter scripta Veteris Testamenti libri non pauci, & historiam, & doctrinam continentem, quibus ab omnibus veram divinarum rerum scientiam profitentibus, semper integra fides adhibita fuit, & quorum testimonio, ipsi sacri Novi fœderis scriptores, adeoq; Christiani omnes, uti non dubitant, quorum tamen quis fuerit auctor planè ignoratur. & ne Iudæi quidem ipsi, alioquin in eiusmodi rebus curiosissimi, & tantum non superstitiosi, cum interim tamē istis ipsis scriptis summā perpetuò habuerint fidē, qui nam ipsorum auctores fuerunt, audent vel affirmare, vel in plerisque dubitantes saltem asserere. ex horum auctorum librorum numero est liber Iosue, liber Iudicum, libellus Ruth, duo libri Samuelis, duo libri Regum, & alii, quos silentio præterimus, libri tantum Iobi adhuc mentionem facien-

res, quippe qui valde insignis liber sit, siue ipsam hi-
 storiam spectes, siue doctrinam multiplicem, non sine
 prophetica alicubi spiritu, que in eo continetur. &
 tamen qui librum istum scripserit, nullo modo certo
 unquam sciri a quoquam potuit, & tamen is liber
 summo communiter in pretio est, tum apud Iudæos,
 tum apud Christianos, & quantumvis difficilis at-
 que obscurus, eximiam atque irrefragabilem aucto-
 ritatem apud utrosque semper habuit, sed etiam ha-
 bet is liber comprobationem apertam ac manifestam
 in ipsis sacris Novi Testamenti scriptis. Primum e-
 nim Paulus Apostolus priore Epistola ad Corinthios
 citat locum & verba tamquam divinitus scripta,
 auctore interim non nominato, que tamen non nisi
 in libro Iobi leguntur, nempe cap: 5. & 13. ea verba
 sunt de Deo ejusmodi, Qui comprehendit sapi-
 entes in astutia eorum. Vbi interea animadver-
 tendum est, in Vulgata Latina editione Paulini lo-
 ci, non legi, ut in loco Iobi, Qui comprehendit,
 sed, comprehendam, ex quo audacter pronunciar-
 e posse videmur, mendosam esse vulgatam istam
 lectionem loci Paulini, presertim cum ipsius nullum
 vestigium inveniatur in Græcis codicibus, & ipsa
 Syriaca translatio cum Græcis exemplaribus planè
 consentiat, habens ut illa, Qui comprehendit,
 quemadmodum apud Iobum legitur. Ex quo aperti-
 us confirmatur omnino testimonium istud a Paulo
 citatum, ex illo Iobi loco petatum fuisse. Deinde ve-
 rò Iacobus in Epistola sua cap: 5. non obscure menti-
 onem facit istius Iobi historia, ipsamq; ut verissimam
 comme-

commemoratur, inquit: Sufferentiam Iobi au-
distis, & finem Domini vidistis, quoniam
misericors Dominus est. ex quibus verbis appa-
ret, illum Iobi historiam pro verè sacra habere, &
que ibi Deo tribuantur, a se ut verissima sic notatu
dignissima judicari. Apparet igitur fieri posse, ut li-
bro alicui, res quantumvis magnas atq; arduas, vel
ad historiam, vel ad doctrinam continenti, meritò
possit fides a nobis haberi, atq; aded id facere debe-
amus, etiamsi ipsius auctor penitus ignoretur; quod
expressè docere ac tradere hìc voluimus, ut quem-
admodum alibi fecimus, ita & hìc rei ipsius verita-
tem aperire, quantum in nobis est, non negligamus.
Non autem quia hac ratione difficultatem, quam
nobis afferre hac secunda caussa possit, aliquomodo
devitemus. Iam enim, Deo bene iuvante, ostensuri su-
mus, eam in plerisq; ac ferè omnibus Novi Testa-
menti scriptis, nullum locum habere, & admodum
evidenter constare, aut certè facile conjici posse ac
status, quinam fuerint istorum scriptorum auctores.
Ad illud igitur aggredientes, quod posteriore loco
in hac secunda caussa nobis faciendum proposuimus,
quodq; majoris momenti est, & proprium huius loci
ac disputationis, dicimus, tantum abesse, ut de au-
ctoribus librorum Novi Testamenti, de plerisq; in-
quam, dubitari possit, quinam fuerint, & affirmari
eorum nomina nobis certò nota non esse, ut nullus
umquam liber fortasse scriptus fuerit, de cuius au-
ctore tam certò constet, quàm de libris Testamenti
Novi. Est siquidem talis, ut sic dixerim, certitudo
peten-

petenda potissimum ex rebus duabus. Vna est, testimonium eorum, qui vel tunc temporis, vel paullo post vixerunt, cum liber scriptus fuit. Altera est, consensus hominum iudicio praeceptorum, de eo quod liber continet aliquid statuere valentium, consensus, inquam, perpetuus ac diuturnus, quod libri auctor is fuerit, qui esse dicitur. Atqui utraq; haec res, sine ullo dubio, apertius atq; uberius locum habet in Novi Testamenti scriptis, quam in ullo alio libro veteri. Multa enim sunt testimonia hominum, qui non longè ab ea aetate, immo etiam quidam eo ipso tempore vixerunt, quo, si non omni pars, tamen aliqua istorum scriptorum est edita, ex quibus satis constat, auctores eos fuisse scriptorum istorum, qui esse dicuntur, ut praecipue ex Ignatii Epistolis colligi potest. quae licet fortasse, ut ad nostras manus pervenerunt, nonnullis in locis sint contaminata: tamen satis constat, illas alioqui non esse adulterinas, maxima quidem ex parte. Verùm Ignatius, Iohannès Apostoli & Evangelistae discipulus fuisse, constantissimè a veteribus traditur, post ipsius verò Epistolas, habemus Iustini, Irenaei, & Clementis Alexandrini opera, ex quibus testimonia ejusmodi colligi possunt. Fuerunt autem tres isti scriptores, eo ordine quo ipsos recensuimus, alius post alium, non ita procul ab Apostolorum temporibus, ut multos alios omitteremus pervetustos scriptores, ex quibus itidem talia testimonia peti queunt. Sunt enim ipsorum scripta, quae ad manus nostras pervenerunt, quamvis, ut ex multis iudiciis constare potest, non planè adulterina.

contaminatiōra etiā, quā esse diximus Ignatiū
 Epistolā. Iam de communi consensu, eoq; perpetuo
 ac diurno, cordatorum ac peritorum hominum,
 quōd auctores maxime partis ac potissima Testa-
 menti Novi ii sint, qui esse hodieq; creduntur, & qui
 a nobis supra in prima causā examinanda expositi
 sunt, non est quōd quisquam, neleviter quidem, du-
 bitare possit, ut satū intelligere poterit, quisquis li-
 bros veterum Christianorum evolverit, & nomina-
 tim libros Ecclesiasticae historiae Eusebii, cognomen-
 to Pamphili, pervestigaverit, ex quibus facile depre-
 bendet, usq; ad ipsius aetatem, id est per spatium du-
 centorum & quinquaginta, atq; eo plus, annorum,
 ex quo scripta novi federis edita fuerunt, ab iis, qui
 Christianam religionem profitebantur, nihil dubi-
 tatum fuisse, quin quatuor Evangelia, Acta Aposto-
 lorum, Epistolae Paulo inscriptae omnes, excepta illa
 una quae est ad Hebraeos, prior Petri Epistola, & pri-
 ma Iohannis, ab iis revera scriptae fuerint, a quibus
 scriptae esse feruntur, adeo, ut quamvis non dees-
 sent, qui Pauli Epistolae reiicerent, tamen non pro-
 pter id rejicerent, quōd ab ipso Paulo Apostolo scri-
 ptas esse differenter, immo ob hoc ipsum auderent
 id facere, quōd Apostolus Paulus earum auctor esset.
 aiebant enim, eum apostatam fuisse, & desertorem
 divinae legis, cui calumnia obnoxium ab ipso initio
 eum fuisse, non obscure docet historia Actorum Apo-
 stolicorum. Extat autem testimonium istud, quod di-
 ximus, de Pauli Epistolae reiicientibus, apud Eusebi-
 um lib. 3. cap. 21. Atq; hic obiter monemus, quia se-
 pius

pius ejusdem Eusebii auctoritate deinceps nobis utendum erit, cum numerus capitum librorum eius historiae Ecclesiasticae non idem sit ubiq; in Latinis, quas habemus, ejus operis translationibus, nec fortasse in editionibus Graecis, nos in citando sequutos numerum ac divisionem, quae habetur in translatione Iohannis Christophorsoni, quandoquidem eam nos tantum habemus, eaq; una utimur. Idem porro quod apud Eusebium in praedicto loco legitur, habetur etiam apud Irenaeum lib. 1. cap. 26.

Sed quia in Bibliotheca Sancta Sixti Senensis lib. 7. ex Augustino annotatum legimus id, quod indicat etiam ante Eusebii tempora fuisse celebres aliquot homines, qui de quibusdam libris testamenti Novi dubitarint, an ab eis fuerint scripti, quorum nomen in fronte gerunt, id quod videtur pugnare cum eo quod paullo ante asseruimus, aliquid, antequam ulterius progrediamur, ad hoc respondendum nobis esse censuimus. Sunt autem homines isti celebres, quos dixim^{us}, ii, qui Manichaei vocati sunt, quorum dux & auctor Manes seu Manichaeus, ante Eusebii aetatem vixit, imperante (ut conjici potest) Diocletiano. Iam igitur respondemus, Manichaeum istum, quamvis alioqui celebrem, vix numerari posse inter eos qui Christianam religionem profiterentur, ut intelligi potest ex iis, quae de eo memoria prodiderunt Eusebius lib. 7. cap. 25., tum vero Socrates lib. 1. cap. 17. Unde etiam facile est colligere, hominem istum, si quis contenderet illum omnino inter eos numerandum, qui Christi religionem profiterentur, de rebus

salibus.

talibus, id est, an essent verè auctores scriptorum Novi fœderis illi qui esse perhibentur, nec cogitasse quidem; sed de eo cogitare demum cepisse eos, qui posterioribus etatibus ab eo denominabantur, quos, facile est conjicere, alias ac diversas ab auctore isto suo sententias in religione sequutos fuisse: atque saltem primùm animadvertisse, non pauca scriptorum Novi Testamenti loca, suis sententiis maximè adversantia esse, & propterea, ut auctoritatem illorum minuerent, dicere cepisse, non eos fuisse illorum scriptores, qui esse dicebantur. quandoquidem alioquin de ipsorum scriptorum auctoritate dubitari a quocumque meritò nihil poterat, quemadmodum a nobis in superiore causa examinanda demonstratum est. Mirum autem proculdubio omnibus videri debet, cum de libri alicujus auctore minimè dubitari soleat, quin is sit qui esse traditur, nisi aperta & valida aliqua ratio contrarium suadeat atque ostendat, inveniri tamen homines, qui aut dubitent, aut etiam negent illos fuisse scriptores librorum Novi Testamenti, quorum nomina ipsi inscripta gerunt; quamvis nullam, nec firmam, nec evidentem rationem adferre possint, cur id faciant. De iis, qui a Christiana religione vel professione vel animo sunt alieni, ab eoq; abhorrent, ut vitam & mores suos ex istorum librorum præscripto componant, non adeò mirandum videtur; nec nos sanè cum ejusmodi hominibus nunc rem habemus: sed si id ab iis fiat, qui Christianam religionem & verbis & corde profitentur, cum quibus ut ab initio præfati sumus, in tota hac disputatione nobis

nobis res est, id sane valde mirum videri debet, cum; ut dictum fuit, si causse considerentur, propter quas statuendum sit, auctorem alicujus libri ejusq; nomen certum esse, ea potissimum, & multo uberiùs, quam in ullo alio libro, in Novi fœderis scriptis locum omnino habeant. Sed dicet fortasse quispian, tu ipse tamen non videris diffiteri, quadam esse scripta testamenti novi, in quibus causse istæ non habeant locum, ea videlicet quæ paullo ante, in iù recensendis, ubi prædictæ causse vigent, omisisti; nempe Epistolam ad Hebræos, Epistolam Iacobi, secundam Petri, secundam & tertiam Iohannis, Epistolam Iuda, & Apocalypsin. Ad hoc primùm dico, etiamsi concederem, istorum omnium scriptorum auctores esse incertos, ac proinde (quamvis ex hoc illud non sequatur, ut ante docuimus) ipsorum auctoritatem similiter esse incertam, id tamen non tam multum momenti haberet, ad quidquam de Christianæ religionis dogmatù, nec ne statuendum. Cum nihil sit vera in scriptis istis, quod in reliquis, quæ multò plura sunt, & de quorum auctoribus dubitari non posse docuimus, non similiter inveniatur. Deinde dicimus, posse nos ostendere, de bona ipsorum parte jam vix dubitari posse, si quò probabilitatem, ut hic fieri debet, sequi velit, quinam fuerint ipsorum auctores. Nò omittentes interim, quod modò indicavimus, nò propterea auctoritatem detrahendam esse ulli ex scriptis istis, etiamsi eorum auctor nesciatur. Ut igitur hoc, quod nunc quodammodo proposuimus, suo loco æquæquamur ac præstemus, rectè erit, ut per singulos

Novi Testamenti libros, eo ordine, quo illos dispositos habemus, percurrentes, aliquid nominatim de certitudine authorum disseramus, & ad ea respondeamus, si qua sunt quæ objiciantur, ad ostendendum non eos esse auctores quibus inscribuntur.

Primum igitur occurrit de Matthæi Evangelio, seu de eo Evangelio quod inscribitur secundum Matthæum, videre, an aliquid afferatur ad probandum Matthæum Iesu Christi Apostolum, non fuisse scriptorem illius historie. Antequam tamen aliud faciamus, repetendum hîc est, cum agitur, an sciatur nomen illius qui librum aliquem scripsit (de hac enim re in secunda causa, quam nunc tractamus, agitur) non esse intelligendum nominis voce seu appellatione ipsum nudum nomen, sed personam ipsam, de qua dubitetur, an ipsa, an verò alius quispiam librum, de quo agitur, scripserit, & propterea cum de ipso Evangelio, quod Matthæo inscribitur, quæstio est, an verè istius scripti auctor sciatur, non queri simpliciter, an auctor Matthæus nominaretur, sed, an auctor fuerit Matthæus ille, qui in numerum 12. Apostolorum a Christo fuit cooptatus. Iam quod Evangelium istud a Matthæo isto minime fuerit scriptum, tria, ut quibusdam placet, indicare videntur, isti verò quidam, ut refert Sixtus Senensis, non multò ante citato libro 7. suæ Bibliothecæ Sanctæ, partim fuerunt Manichei, partim quidam nostri heretici Anabaptistæ. Prima igitur ratio, quam præditi asserunt, ad ostendendum Matthæum Christi Apostolum, non fuisse scriptorem ejus libri, hæc est, quod in

libello isto cap: 9. fit mentio disertè ipsius Matthæi Apostoli, cum primùm a Christo vocatus est, & se sequi iussus, ac postmodum Apostolus declaratus, fit inquam ipsius mentio, tamquam personæ diversæ ab eo qui Evangelium istud scripsit; quippe qui tamquã tertia, ut loquuntur, persona nominetur, nec dicatur, vocavit me nomine Matthæum, ut videretur debuisse scriptum esse, si ipse Matthæus scriptum illud edidisset, sed scriptum legatur; Et cum transfret inde Iesus, vidit hominem sedentem in telonio, Matthæum nomine &c. Nam quòd quidam, ad hanc objectionem respondentem, ajunt, Iohannem similiter in suo Evangelio, de cuius auctore, & quin revera Iohannes Apostolus ejus scripti auctor fuerit, nihil dubitatur, de se ipso, ut de tertia persona, loqui, seipsum non semel nominans appellatione illa discipuli quem diligeret Iesus, hoc non videtur satis esse, ad confirmandum, Matthæum similiter potuisse de se ipso in tertia persona scribere; immo exemplo isto, ejus quod fecit Iohannes Apostolus in sua Evangelica historia, magis videtur confirmari objectio prædicta, indeq; suaderi, Matthæum Apostolum non fuisse scriptorem Evangelii, quod ipsius esse creditur, cum verisimile omnino sit, si scriptor illius historiae fuisset Matthæus ille a Christo vocatus, & in tertia persona a scriptore nominatus, subjecturum alicubi postea scriptorem fuisse, istum, quamvis in tertia persona nominatum, fuisse ejusdem illius historiae scriptorem. Nam Iohannes id fecit. Cum enim, videlicet ut dictum est, non semel

antea seipsum in tertia persona nominasset, antequam suae descriptioni finem imponeret, ad ipsum finem declarare voluit, istum ipsum in tertia persona nominatum, & discipulum quem Iesus diligeret appellatum, fuisse scriptorem illius ipsius historiae, inquit cap. ultimo v. 24. Hic est discipulus ille qui testimonium perhibet de his, & scripsit haec, &c. alia igitur ratio quaerenda est respondendi ad objectionem istam, Iohannis apostoli exemplo omisso, quod potius objectionem istam validiorem facit. Itaque dicendum est, mirum videri debere, quod quis ista objectionem uti ausus fuerit, cum, ut exempla non pauca prophanorum scriptorum indicare possunt, non infrequens res sit, ut scriptor alicujus historiae de se ipso, in ipsa historia tamquam de tertia persona loquatur. Sed omissis scriptoribus prophanis, unus sacer scriptor Moses solus, plusquam satis esse potest ac debet ad objectionem istam diluendam, ejusque fugacitatem ostendendam, de quibus partim plane constat, partim pro certo habetur, eos fuisse auctores scriptorum, in quibus de se, tamquam de tertia persona loquuntur. Moses certe millies in quinque illis libris, quos ipse scripsit, praeter primum, in quo ipsius, ut pote nondum nati, nulla fieri potuit mentio, de se ipso mentionem facit, & semper ac perpetuo in tertia persona. nam si quis sit fortasse, qui dubitet, an Moses revera libros istos scripserit, praeter perpetuam ac constantissimam famam atque sententiam, apud omnes cujuscumque generis scriptores, qui testati sunt Moysen ipsum illa scripsisse, probat id ipsum
 Christi

Christi inexpugnabilis auctoritas, cum alibi, tum cum Saduceis respondens de resurrectione mortuorum, ait; An non legistis in libro Moſis, super rubum quomodo dixerit illi Deus &c, ut habetur Marci cap: 12. v. 26. apparet enim evidentissimè, Christum ibi citare locum Exodi, qui est secundus ex illis quinq; libris cap: 3. v. 6. & tamen videtur quòd librum istum, librum Moſis appellat, quantumvis in eo ipso loco, quem citat, Moſis mentio in tertia persona fiat. Nam, si quis excipiat, potuisse librum Moſis, librum istum appellari a Christo, etiamsi Moſes ipse illum non scripserit, eam nimirum ob causam, quòd in eo Moſis acta scripta leguntur, ne diutius in hac exceptione refellenda immeremur, legat iste quid Lucas de hac eadem re scripserit cap: 20., ibi enim inveniet v. 37. ita ab ipso Christum loquentem inductum fuisse, Quòd verò resurgant mortui, & Moſes ostendit secus rubum, sicut dicit &c. Ecce Lucas diserse facit Christum affirmantem, ea, quae in loco isto Exodi scripta leguntur, & nominatim verba illa, nomine Dei ibi prolata, Ego sum Deus Abraham &c, a Moſe dicta, id est scripta, seu scribendo relata fuisse. Solent igitur scriptores, ut diximus, tam prophani, quàm sacri, in historiis suis de se ipsis, quatenus contingit ut ipsi ad historiam ipsam pertineant, in tertia persona loqui, idq; partim modestie cujusdam causa, partim quia volunt historias suas ita legi, ac si a veritatis ore, ut sic dixerim, illae manarent, & propterea de iis quae scribunt nihil dubitandum esset.

Absoluta prima ista obiectione, ad secundam
 veniamus. Ea autem est, quod aliqui scriptores te-
 stantur, Matthaeum apostolum, evangelium suum
 hebraicis litteris, hebraicaq; lingua scripsisse. id enim
 primum antiquissimus scriptor Papias scriptum re-
 liquit, quemadmodum testatur Eusebius historiae
 Ecclesiasticae libro tertio cap. ultimo. Idem testatus
 est Irenaeus lib. 3. cap. 7. Idem, ut aliorum testimonia
 non pauca silentio praetereamus, testatus est postre-
 mo Hieronymus, in Catalogo scriptorum Ecclesiasti-
 corum, qui etiam addit, istius Evangelii Hebraica
 scripti exemplum, sua aetate servatum fuisse in Ce-
 sariensi bibliotheca, indeq; se exemplum simile ha-
 buisse. quod si verum est, Matthaeum apostolum, suum
 Evangelium Hebraice scripsisse, videtur omnino sta-
 tuendum, istud, quod hodie Matthaeo inscriptum ha-
 bemus, ab ipso minime fuisse scriptum. cum multa
 docere videantur, Evangelium istud nostrum Graece
 scriptum fuisse, non autem ex Hebraico sermone in Grae-
 cum transfusum. Affert hujusce rei indicia non pau-
 ca Matthias Flacius Illyricus, in praefatione sua in i-
 dem Evangelium, quae sane magnam vim habere vi-
 dentur, & partim etiam ab aliis ante ipsum conside-
 rata, & in medium allata fuerunt, inter ipsa vero
 illud videtur esse satis insigne, quod Hebraica quae-
 dam verba ibi exposita inveniuntur, ut capite 1. ver-
 bum Emmanuel, cap. 27. verba illa Christi cruci jam
 affixi; Eli, Eli lama sabathani. Nam, inquit i-
 sti, Si Hebraice fuisset ista historia scripta, nullo pa-
 cto fieri potuisset, ut ista interpretatio Hebraicarum
 vocum

vocum in ipsa subjecta fuisset. Sed præter hoc, quod fortasse aliqua ratione dilui potest, id mihi potissimum considerandum videtur, quod contrarium statuere fortasse possumus ejus, quod Hieronymus in loco prædicto scribit, & affert ad probandum quod Evangelium istud Hebraicè fuerit scriptum. Inquit enim hujusce rei indicium esse, quod in eo citantur loca ex veteri testamento, quæ non habentur in Græca editione, sed tantum apud Hebræos. Nam potius videtur statuendum, ex citatione veteris testamenti agnoscere posse, Evangelium istud Hebraicè non fuisse scriptum. Etenim sine dubio, si hebraicè scriptum foret, quod potissimum propter Hebræos factum fuisset (ut quidem illi ipsi ajunt, qui Hebraicè scriptum fuisse contendunt) non fuissent citata loca, nisi ut planè in ipso Hebræo fonte leguntur: & tamen aliter factum videmus, ut cap: 2. In citando loco Michæ 5. ad probandum, quod Christus in Bethleem nasciturus erat, Et tu Bethleem &c. Aliter enim habet locus iste in ipso Hebræo fonte, quàm istuc in evangelio citatur. Capite etiam 21 ejusdem Evangelii, citatur locus ex Zacharia cap: 9. satù truncatè, ut ita loquar, & quidem quibusdam verbis omissis, quæ ad Christi præstantiam plurimum pertinent, illa inquam, justus & servator, quæ in Hebræo habentur. Alia, quæ afferuntur ad probandum, Evangelium istud Græcè scriptum fuisse, & ab aliis, potissimum verò, ut diximus, a Flaccio Illyrico colliguntur atque urgentur, non est cur nunc nos urgeamus, aut examinemus: potest unusquisque ipse istos scriptores per se consultare, quan-

re, quandoquidem nostrum potius est ostendere, quamvis concedam⁹, Evangelium istud nostrum, quod Mattheo inscriptum habemus, fuisse Græcè scriptum, non tamen inde sequi, hoc non illud fuisse quod Apostolus Matthæus scripsit, quippe scilicet, quod Evangelium suum non Græcè sed Hebraicè scripserit, cum enim breviter ostensuri sumus, eo non obstante, quod scriptores a nobis paullo ante enumerati & indicati testantur, nullo pacto verisimile videri, ut Matthæus apostolus Evangelium suum hebraicè scripserit, sed omnino censendum eum id Græcè scripsisse, idq; illud ipsum esse, quod hodie unà cum aliis Græcè scriptum habemus.

Paucula quædam auctoris desiderantur.
Reliqua prorsus auctor non absolvit.

Erratorum graviorum in hoc opere
 correctiones.

pag:	lin:	Errata	Correctiones.
5.	14	habere	habere
ibidem	26	ostensui	ostensuri
	28	satis constare, poterit	satis constare poterit.
6	9, 10.	deberi	debere
32	21.	de ipso	de se ipso
33	4	referendum	referenda
	26	est	fit
	ultima	faciunt	faciant
34	1.	faciant	faciunt
	3	pro dele.	
	18	non	nos
41	2	sonunt	sonant
43	21	ista	ita
	ultima	alium quendam	alium praterea quem- dam
46	20	nominatim	nominatum
47	20	fit	fit
49	17	fit	fi
51	4, 5, 6, 7, 8, 9.	<p>non quidem ob eam causam &c. usq; ad concipiebat in- clusivè, unum exēplar ita legit, nec tamen ob eam causam revera obscura atq; ambigua responsa a Diabo- lo dabantur, sed quia cum ipsemet id, quod futurum esset, nesciret, propterea verba sua ita concipere studebat, ut ad &c.</p>	
52	25, 26	verba ferunt	verba prae se ferunt
56	13	referantur	referuntur

pag:	lin:	Errata	Corrections.
57	14	<i>ciata</i>	<i>citata</i>
58	14	<i>anto</i>	<i>ante</i>
59	13	<i>deducitur aliud</i>	<i>deducitur nomen aliud</i>
62	10	<i>nunquam</i>	<i>inquam</i>
	21	<i>post virgo, dele comma.</i>	
65	16	<i>cognitum</i>	<i>cognitam</i>
68	1	<i>accipitur. Quæ</i>	<i>accipitur, quæ</i>
	4	<i>essentialia</i>	<i>exempli</i>
70		<i>penul: stabiliendam. Quare</i>	<i>stabiliendam: quare</i>
71	13	<i>post Nazareth dele colon.</i>	
72	9	<i>Metaphorica. Surculū metaphorica, surculū</i>	
73	<i>ultima</i>	<i>tantam</i>	<i>tantum</i>
77	5	<i>deductum</i>	<i>ducta</i>
78	16	<i>quod omnino</i>	<i>qui omnino</i>
79	<i>penul:</i>	<i>codicibus</i>	<i>codicibus</i>
80	25	<i>v. 12 incipiendo</i>	<i>a v. 12 incipiendo</i>
81	17	<i>quicquam facere</i>	<i>quicquam ad rē facere</i>
	24	<i>locus ad rem,</i>	<i>locus iste, ad rem</i>
	20	<i>pertinent</i>	<i>pertinet</i>
82	20	<i>recitent</i>	<i>recitant</i>
	12	<i>post argenteos comma</i>	
<i>ibidem</i>	18	<i>post projecerit interrogationis nota</i>	
	22		
	27		
85	4	<i>posset</i>	<i>posse</i>
	19	<i>nomen Hebraicum</i>	<i>vocem Hebraicam</i>
	22	<i>idq;</i>	<i>id quod</i>
87	24	<i>post Hieronymus, ponatur comma</i>	
92	2	<i>ad locum ipsum.</i>	<i>ad litteram</i>

pag:	lin:	Errata	Corrections.
94	11	in eum	in eo
96	11	post aliū dele comma.	
	12	prolatum fuisse	protulisse
97	17	qui ipsius	que ipsius
	19	quod ex	qui ex
98	17	videntur	videtur
100	7	subjungit. Animad:	subjungit, animad-
101	1	omnino sentiendum	omnino sic sentiendū
	24	desiderari. Et arbitror desiderari, & arbitror	
102	1, & 2.	que in apocryphis &c	quod in apocryphis
			tantum libris aliquid
			fortasse diceretur
	11	in scriptum	in scriptura
	25	ex amente	ex mente
105	9	operum	operam
107	7	quantum	quem
109	17	ex supra dicto	in supra dicto
111	24	Iechonium	Iechoniam
114	11	est istius Eli, Nec	esse istius Eli, nec tamē
115	5	ex ullo	ex nullo
		ante pen: hac sententia	eā sententiā
121	27	ad quem	ad quam
124	21	nominentur	nominantur
127	16	post obiret, pone comma	
151	29	divioarum	divinorum
158	24	conceptum	conceptum
	27	est	&

Pag:	lin:	errata	correctiones
	29	<i>viderit</i>	<i>videlicet</i>
161	<i>ultima</i>	post <i>cum</i> , dele comma	
163	3	post <i>testimonium</i> , dele comma	

Sunt & alia errata, ut in apicibus & accentibus litterarum, inq; vocum interpunctionibus, & inter se spaciis ac distinctionibus, quæ omnia unà cum ejusmodi aliis levioribus benignus ac prudens lector, & condonabit, & per se ipse corriget.



itte
spa
nodi
ndo

